

## **Barɲanii nba ki LUK din sɔb nae na**

*Ki jiin Luk gbouɲ na po*

Yennu maan nba ki Luk din sɔb na want a Yiisa-e tee Israel teeb\* tinntɔɔ nba ki Yennu din tur mɔsonn ki jiin u po, ki bia tee nisaarii kur tinntɔɔ.

1-4 Chanbaa Teofilus:

N loon ki a bann nan maan nba ki bi poɲ daan wanna na, li tee barmɔnii mɔniie.

Li piinu ni, nisiab din la linba tun ti leeb sinsuuk ni na, nan bi ninbina. Njamme tee binba din mɔontir maan maɲ, ki niib bonchiann kot bi mɔɲ paak ki sɔb linba ki bi wannib na. Li paak, n mɔɲ mɔɲ boi ki fiitir bonɲann ki la nan li bonsiar kur nba tee bianɲinba li piinu ni, nan laa saa bianɲinba, ki n dakin nan li ɲan nan ki n sɔb ki lii tɔok sɔnu, ki tura.

*Malaka nba pak baa saa mar Jɔɔnn bianɲinba*

<sup>5</sup> Yoo nba ki Herod din tee Judea yent bat-saakɔɔ na, ki Yennu manntɔɔɔ be ki u sann tee Sekaria, ki u tee manntɔɔ Abija paabu ni niro, ki u ɲaapoo tee manntɔɔ Aarɔnn yaaboonn, ki u sann tee Elisabef. <sup>6</sup> Bi banlee maɲ binbeɲ din ɲan Yennu boor, ki bi sak u wannu nan sennu kur nyiknyik; <sup>7</sup> ɲaan bi din ki mɔk biki, kimaan

---

\* : 1.0 Juu teeb sanleere tee Israel teeb.

Elisabef din tee pookanmatire, ki bi kur bia pon gar nan matuko.

<sup>8</sup> Nanne dasiar ki Sekaria paabu ni toontun-yoo tan baar, ki u din tan yaa wun tun u toonn ki tur Yennu, nan waa tuu tuun ki teeno bianjinba na. <sup>9</sup> Li yoo na ki bi to naatoot nan bi mannteeb kaar nba tee bianjinba, a bin gann wunba sii koo Yennu nasaakak na ni kii wubint bonnunubit. Baa to, Sekaria din dii. Li paak ki u tan saan koo njaak man ni, <sup>10</sup> njaan ki nibur na kur biar see nanyer ki mei Yennu, yoo nba ki u wubint bonnunubit na.

<sup>11</sup> Li yooe ki Yennu malaka dokit Sekaria paak, ki set bonnunubit binbintir na diitu po. <sup>12</sup> Sekaria nba din tan lau yoo nba, ki u yan put nmat, ki janmaanii sooro. <sup>13</sup> Ki malaka man beto a, "Sekaria, daa tiin janmaanii. Yennu pon gbat a miaruwa, ki a njaapoo Elisabef tan saa mar bonjak ki tura, ki a saa pur u sann Joonn. <sup>14</sup> Ki li tan saa manja ki a par n penn, ki niib bonchiann para mun tan saa penn u maaru man paak. <sup>15</sup> U tan sii tee nijaanne Yennu toonn, ki bia tan kii nyu dabooru kur. U tan saa gbee nan Yennu Seyeen u matuk yooewa. <sup>16</sup> U tan saa te ki Israel teeb† bonchiann n jen bi Yomdaano Yennu boor. <sup>17</sup> U sii mok Yennu Seyeen nan pan, nan Yennu sokinii Elaija nba din mok bianjinba na, ki tan saa donj liit ti Yomdaano, ki tunn motana nigbouj na yan, ki te ki waas nan bibaanba n namm taan kii mok duduknant, ki bia tunn moyetdamm yan ki

---

† **1:16** 1.16 Juu teeb sanleere tee Israel teeb.

bin bann yentinbinben, ki u bia tan saa te ki niib n teen siir kii guu bi Yomdaano.”

<sup>18</sup> Ki Sekaria bet malaka man a, “N saa teen nlee ki bann nan linba na tee monii? Kimaan n kpeta, ki n njaapoo mun bia kpeta.” <sup>19</sup> Ki malaka man jiino a, “Mine tee Gabriel wunba be Yennu toonn na; ki u tumin a boor, a n tan pak nana ki wanna barnanii na. <sup>20</sup> Naan a saa muu nan li yoo nba tan saa baar ki lin teen monii, kimaan a ki teen n maan nba saa teen monii na yada.” <sup>21</sup> Ton, niib nba biar see nanyer ki guu Sekaria na, li din bakitib kimaan waa yukir Yenjiantu nasaakak ni bianinba na. <sup>22</sup> Waa ji din tan nyii yoo nba, u din ki fit piaki, ki bi ji bann nan u la yirintue Yenjiantu nasaakak na ni; ki u ji piak muutir ki labin nii ki teemm. <sup>23</sup> Yoo nba ki u toona din tan gbenn Yenjiantu nasaakak ni na, ki u kun njaak ni.

<sup>24</sup> Li poorpoe ki u njaapoo Elisabef din soor poor, naan borii u mon njaak ni tatata nan njaarii nanmu, <sup>25</sup> ki din tan yet u mon a, “Linba nae ki Yennu tun turin ki tinin ninbaauk ki nyinnin fei ni.”

### *Malaka nba pak baa saa mar Yiisa bianinba*

<sup>26</sup> Ton, Elisabef poor sooru njaarii nanloob nie, ki Yennu tun u malaka Gabriel a wun saan doo nba be Galilii yent ni, ki bi yi doo man Nasaref na, <sup>27</sup> ki saa pak tur sapaanmunn nba ki u sann tee Meeri na. Sapaamo man din tee jasoo sarkpepe, ki u sann tee Joosef. Joosef din tee kpanbar Defid yaabonne. <sup>28</sup> Ki malaka na tan baar Meeri boor ki yeto a, “N foonta. Yennu par mei a paak, ki u bia be nana.” <sup>29</sup> Waa yet

bianjinba na, ki Meeri yan ji put ki saa baa nook ni, ki u ji dukii maan man paak. <sup>30</sup> Ki malaka na bia beto a, “Meeri, daa tiin janmaanii, kimaan Yennu par mei a paak. <sup>31</sup> A tan saa soor poor ki mar bonjak, ki tan saa pur u sann Yiisa. <sup>32</sup> U tan sii tee nijaanne, ki bi yiu Yabint Yennu Bija. Ti Yomdaano Yennu saa te ki wun di u yeeja Defid naan, <sup>33</sup> ki u sii tee Jakob yaaboona ni kpanbar mokmok nan mokmok, ki u naan bia kan mi gbenni.”

<sup>34</sup> Nanne ki Meeri boi malaka man a, “N tee sapaanmunne, ki nlee ki n saa soor poori?” <sup>35</sup> Ki malaka na yeto a, “Yennu Seyeen saa sik a ni, ki Yabint Yennu man pan n bakin a paak; li paak, bik nba ki a tan saa maro man sii tee popeendaano, ki bi yiu Yennu Bija. <sup>36</sup> Naan bant nan a niipoo Elisabef, wunba kpeta na, motana u soor poora ki saa mar bonjak. U nmaarii njanloobu na, noo nba ki bi din yiu pookanmatir na; <sup>37</sup> kimaan siar kaa ki Yennu kan fit tumi.” <sup>38</sup> Ki Meeri beto a, “Ton, n tee Yennu daabire. Naant ki lin teen nan faa betin bianjinba na.” Ki malaka na ji yaat nyiko.

### *Bianjinba ki Meeri saan gon Elisabef*

<sup>39</sup> Li poorpo ki Meeri fiir yiama ki saan Juda yent nba mok kunkona na dosau ni, <sup>40</sup> ki koo Sekaria naak ki foont Elisabef. <sup>41</sup> Yoo nba ki Elisabef gbat Meeri foontii na, ki bik nba daa be Elisabef poor ni na ji kpir kutib. Li yoo na ki Yennu Seyeen gbee Elisabef, <sup>42</sup> ki u yikin sanpaapowa a, “Wuya, wuya, Yennu piisin be a paak ki gar pooleeb kura, ki u piisin bia be bik

nba be a poor ni na paak. <sup>43</sup> Bee ki li teenin nna ki n Yomdaano naa tan baar n boori? <sup>44</sup> Maa gbat a foontii yoo nba, ki bik nba be n poor ni na ji kutib nan parpeenn. <sup>45</sup> Faa teen yada nan Yennu maan nba ki u pak tura na tan saa teen monii na, parpeenn tee a yare.”

*Meeri nba din pak Yennu bianinba*

<sup>46</sup> Nanne ki Meeri ji din yet a  
 “N piak Yennu n par ni,  
<sup>47</sup> ki mok parpeenn, Yennu nba tee n Tinntoo na paak,  
<sup>48</sup> kimaan u tin min nba tee u sapaandaabir na ninbaauk,  
 naan ki n pon ki tee siari.  
 Laa jii dinna ki saa, nighbouŋ kur tan sii yeen a n tee parpeenn daano,  
<sup>49</sup> kimaan paŋ daano Yennu tun toonjaana ki turin,  
 ki u sann tee kasii.  
<sup>50</sup> U bia mok ninbatinu nan nighbouŋ kur nba tiino.  
<sup>51</sup> U tant u nuu ki tun paŋ toona,  
 ki yat karinbaandamm ki biir bi lora,  
<sup>52</sup> ki liat kpanbara, naan donn tatimm,  
<sup>53</sup> ki gboon komma jeŋant, naan te ki mokita ŋmat niikoonii.  
<sup>54</sup> Waa din senn moŋonn ki tur ti yeejamm Israel teeb  
 nba tee u toontunna na,  
 u tian li po ki sommitib.  
<sup>55</sup> U bia tian ki tiin Abraham nan u yaaboona ninbaauk  
 mokmok nan mokmok.”

<sup>56</sup> Tɔn, li din teen nan n̄maarii n̄ntaa na ki Meeri daa be Elisabef boor, ki tan n̄mat kun.

*Baa mar Jɔɔnn nba din wuur niib Yennu nyunwuru na bianjinba*

<sup>57</sup> Li poorpoe ki Elisabef matuk yoo tan baar, ki u mar bonjak. <sup>58</sup> Ki bi n̄akpiasnba nan u ninjamm din gbat bianjinba ki Yennu tino ninbaauk bonchiann na, ki bi kur ji mɔk parpeenn nano.

<sup>59</sup> Tɔn, ki li daa n̄anniin daare ki bi baar a bin pot bik maɲ punn, ki loon bin jii u baa sann ki purɔ; <sup>60</sup> n̄aan ki u naa gatib a, “Aaii, u sanne tee Jɔɔnn.” <sup>61</sup> Ki bi yetɔ a, “N̄aak na ni, sɔɔ sann ki yi Jɔɔnn-i.” <sup>62</sup> N̄anne ki bi pak muutir nan bik maɲ baa, a bin boi ki laan u loon bii yi u bik maɲ bee; <sup>63</sup> ki u wann muutir ni a bin jii dapɔuk turɔ. Baa jii ki turɔ ki u sɔb a, “Bik maɲ sanne tee Jɔɔnn.” Ki li ji bakit bi kura.

<sup>64</sup> Li taakpaak ni ki Sekaria muut, ki ji piin maan paku ki piak Yennu. <sup>65</sup> Ki janmaanii soor bi doo niib kura. Ki labaar na mɔont yat Juda yent nba mɔk kunkona na kur po, <sup>66</sup> ki li tur binba kur gbat nna maɲ dudukit, ki bi boi bi leeb a, “Bik na tan sii tee niboorbee?” kimaan bi poɲ la nan Yennu paɲ be nano.

*Bianjinba ki Sekaria din sɔkint Yennu maan*

<sup>67</sup> Li yoo na ki Yennu Seyeen din gbee Jɔɔnn baa Sekaria, ki u sɔkint Yennu maan ki yet a:

<sup>68</sup> “N̄aant man ki tin pak timm Israel teeb Yomdaano Yennu,

kimaan u baar a wun somm u niib ki fat n̄aabe.

<sup>69</sup> U turit Tinntɔɔ nba mɔk paɲ

ki tee Yennu toontunnɔ Defid yaaboonn.

<sup>70</sup> Yaayoo ni, Yennu din pak nan u popeenn  
sɔkiniinba ki turit,

<sup>71</sup> ki yet a u tan saa nyinnit ti datai nii ni,  
ki bia tan saa nyinnit binba kur namit na nii ni.

<sup>72</sup> U bia yet a u sii mɔk ninbatinu nan ti yeejamm,  
ki kan mi tamm u popeenn mɔsonn

<sup>73</sup> nba ki u din senn ki tur ti yeeja Abraham na.

<sup>74</sup> U din senn a u saa nyinnit ti datai nii ni,  
ki tin fit jiantɔ ki jaŋmaanii daa mɔkiti,

<sup>75</sup> ki ti sii tee popeendamm nan burchimm u boor  
nan ti manfoa gbennu.

<sup>76</sup> N bik, bi tan sii yia, ‘Yabint Yennu sɔkiniie.’  
A saa gar ti Yomdaanɔ tɔɔnne ki ŋamm u sɔnii  
ki turɔ,

<sup>77</sup> ki wann u niib ki bin bann nan u tan saa tinnib  
yoo nba ki u nyik chab bi biit na.

<sup>78</sup> Barmɔniie, Yennu mɔk ninbatinu nan  
burchint,

ki ti tinnu daar maŋ tan sii tee nan yondoor nae,

<sup>79</sup> ki li tan saa yent sanpaapo

ki tur binba be kuun bunbɔnn ni na;

ki bia yent ti taa ni ki tin tɔkin parmaasir sɔnjouk  
na.”

<sup>80</sup> Bik maŋ din kpaatire ki pukii nan Yennu  
bannu, ki kɔɔ muuk ki saa be tatata nan yoo nba  
tan baar nan wun dɔkit Israel teeb† paak.

## 2

### *Baa mar Yiisa bianjinba (Matiu 1.18-25)*

---

† **1:80** 1.80 Juu teeb sanleere tee Israel teeb.

<sup>1</sup> Li yoo na ki kpanbara yudaano Ɔgustus tur mob u yent ni a bin sob soo kur sann nikant ni. <sup>2</sup> Nanne tee sinsinn nikant sobu, ki Kirinius tee Siria tij yudaano li yoo. <sup>3</sup> Li paak, soo kur din kun u doo ni a bin saa sob u sann, <sup>4</sup> ki Joosef mun din nyii Nasaref nba be Galilii yent ni na, ki saan Judea yent ni, ki kun kpanbar Defid doo Betlehem, kimaan u din tee Defid yaaboonne. <sup>5</sup> Ton, ki u kpen a bin sob Ɔoo nan u sarkpen Meeri sana; li yoo, ki Meeri mok poor.

<sup>6</sup> Baa din daa be Betlehem na, ki Meeri maaru yoo tan jan, <sup>7</sup> ki u mar u sapaanmar bonjak, ki jii tana ki bobino, ki biro bonkobit burgbetir ni, kimaan saamm diiuk na ji din ki mok yiar nba ki bi saa doori.

### *Ki jii pekpaarii nan malakanba po*

<sup>8</sup> Pekpaarii mun din be doo man ni ki kpaar pei nyiok, muuk ni. <sup>9</sup> Ki Yennu malaka tan dookit bi paak, ki Yennu man yentsaakar yent lintib. Ki janmaanii soorib bonchiann. <sup>10</sup> Naan ki malaka na betib a, “Daa tiin janmaanii man, kimaan n baar nan barjaniie maa n wannu, linba saa tur niib kur parpeenn. <sup>11</sup> Dinna nyiok na bi mar i Tinntoo, wunba tee Yennu Niganntoo Masia na. Bi maro Defid doo nie. <sup>12</sup> I saa la sanpantik na boob tana ki doo bonkobit burgbetir ni; linba nae sii tee nyinn ki turi.”

<sup>13</sup> Li yoo na ki Yendoun ni malakanba bonchiann dookit ki pukin malaka na po, ki yiin piak Yennu a:

<sup>14</sup> “Dont Yennu sann sanpaapo man;



parmaasir-ii be u nigannkab paak, tingboun na ni.”

<sup>15</sup> Ki malakanba na tan nyik pekpaarii na, n̄aan n̄mat doo Yendoun ni. Ki bi yet bi leeb a, “N̄aant man ki tin saan Betlehem ki saa got linba tun, ki ti Yomdaano Yennu betit na.”

<sup>16</sup> N̄anne ki bi fiir saan yian yian ki saa baar ki la Meeri nan Joosef; ki sanpantik maŋ doo bonkobit burgbetir ni. <sup>17</sup> Baa baar lau yoo nba, ki bi moont linba ki malaka na betib ki jiin bik maŋ po. <sup>18</sup> Ki binba gbat pekpaarii na nba moont linba na, ki li bakit bi kur. <sup>19</sup> N̄aan Meeri din tian linba tun na kur, ki dukii li po u par ni bonchiann. <sup>20</sup> Li poorpoe ki pekpaarii na n̄mat bi pei boor muuk ni. Baa saa na, ki bi piak dont Yennu sann, linba kur ki bi gbat ki la na paak; ki li set tee nan malaka nba betib bianjinba na.

### *Yiisa sanpuru labaar*

<sup>21</sup> U maaru daa n̄anniin nie ki bi din pot u punn ki pur u sann Yiisa, sann nba ki malaka din pur n̄aan ki u poor daa ki soor na.

### *Baa din jii Yiisa ki tur Yennu bianjinbae na*

<sup>22</sup> Ton, li din tan jaŋ nan Joosef nan Meeri n tun nan Moses sennu nba wann bianjinba, ki mann maruŋ ki n̄amm bi moŋ Yennu boor na. N̄anne ki bi ji din jii bik na ki saan n̄ano Jerusalem, a bin saa jiiu ki tur Yennu, <sup>23</sup> nan laa sob Yennu sennu ni na a, “Bikperik kur nba tee bonjak sii tee Yennu yooe.” <sup>24</sup> Ki bi bia mann maruŋ nan Yennu nba din senn bianjinba na a, “Bin lon lanjerii banlee koo n̄manbira banlee ki mann.”

<sup>25</sup> Li yoo na ki jasoo nna be Jerusalem, ki u sann tee Simeonn. U din tee burchimo nan yentinnoe, ki Yennu Seyeen be u ni, ki u guu yoo nba ki Yennu tan saa tinn Israel\* teeb. <sup>26</sup> Yennu Seyeen man pon din fiit ki wann a u kan kpo see ki u tan la Yennu Niganntoo Masia, wunba ki u din senn masonn a u saa tumo na. <sup>27</sup> Li yoo na ki Yennu Seyeen man te ki Simeonn koo Yenjiantu nasaakak ni, ki saa la Yiisa baa nan u naa ki bi baar nana a bin teeno nan sennu nba wann bianjinba na. <sup>28</sup> Ki Simeonn gaar bik man njan pak Yennu ki yet a:

<sup>29</sup> “N Yomdaano, min nba tee a daabir na, njan ki n saan nan parmaasir nan faa pon din betin bianjinba na,

<sup>30</sup> kimaan n mon mon ninbinn la Tinntoo nba ki a tumo nawa,

<sup>31</sup> wunba ki a gann ki senno ki tur nibooru kura.

<sup>32</sup> U sii tee yentu ki fiit a sonu ki wann binba ki tee Israel teeb na,

ki bia baar nan dontir ki tur a niib Israel teeb.”

<sup>33</sup> Ton, Simeonn nba pakib ki jin bik man po bianjinba na, ki li bakit bik na baa nan u naa bonchiann. <sup>34</sup> Ki Simeonn sat Yennu piisin bi paak, njan bet bik na naa Meeri a,

“Nnara, Yennu nyinn bik na ki senno a Israel teeb bonchiann n baa yann u paak; ki leeb bonchiann mun bia tan saa tinn u paake. Njoe tan sii tee nyinn nba ki niib bonchiann saa pak ki biir na;

<sup>35</sup> linba na saa te ki bi woonin ni dudukit n nyi paanu. Njan bonsiar tan saa tun ki biir a mon mon par bonchiann.”

---

\* **2:25** 2.25 Juu teeb sanleere tee Israel teeb.

<sup>36</sup> Tɔn, ki Yennu sɔkiniilɔɔ mun be lej ki tee poo, ki u sann tee Anna, wunba tee Fanuel bik, ki bia tee Aser booru ni nirɔ, ki din tee pookperchianwon, wunba din yoo bina njanlore, <sup>37</sup> ki u sɔrɔ kpo njaan nyikɔ pakɔɔk ki u ji tee binpiinniin nan njanba; njaan u din tuu ki nak Yenjiantu njasakak na ni yonnu nan nyiok, ki jiantir Yennu ki lorin mɔb ki meio. <sup>38</sup> Li yoo na ki u baar ki lab ki teen Yennu niipoouk, ki din piak bik na po ki teen binba kur din guu yoo nba ki Yennu yaa wun tinn Jerusalem teeb na.

### *Baa nmat kun Nasaref bianjinba*

<sup>39</sup> Ki Joosef nan Meeri nba din tun gbenn Yennu sennu nba wann bianjinba na, li yoo ki bi nmat kun Nasaref nba be Galilii yent ni na. <sup>40</sup> Ki bik na tan kpaat nan paɲ nan subinii bonchiann, ki Yennu par mei u paak.

### *Yiisa nba tun bianjinba u bisin ni*

<sup>41</sup> Tɔn, binn kur ki Yiisa baa nan u naa tuu saan Jerusalem ki saa di yukitgar† tiaru jaamm. <sup>42</sup> Yoo nba ki Yiisa din tan baar binpiik nan njanlee na, ki bi saan a bin saa di jaamm maɲ nan bianjinba ki bi tuu tee na. <sup>43</sup> Jaamm daa maɲ nba din tan gbenn yoo nba, ki bi ji piin kunu, njaan Yiisa biar be Jerusalem, ki u damm ki mi nan u biari. <sup>44</sup> Bi din dukii a u be nibur na nie, ki bi somm daar maɲ kur; njanne ki bi ji loonɔ bi niib ni nan bi leeb ni, <sup>45</sup> njaan ki ki lau. Ki bi din nmat saan Jerusalem ki saa loonɔ lej. <sup>46</sup> Daa nantaa daar

---

† **2:41** 2.41 Yennu malaka din kpɔi Ijipt teeb bijakpera, njaan nyik Israel yab. (Nyinu 12.29)

ki bi tan lau Yenjiantu nasaakak ni, ki u lakin kar nan wannteeb yudamm ki gbiintir bi maan n̄aan bia boib buboit. <sup>47</sup> Ki li bakit binba kur gbiintirɔ na, nan waa teen bianjinba ki m̄ok bannu ki piak ki j̄iintib na. <sup>48</sup> Ki u baa nan u naa nba lau len na, ki li bakitib bonchiann; ki u naa ji boio a, “N bik, bee ki a teent nna? A ki mi a min nan a baa la parbiir hei ki loomani-i?”

<sup>49</sup> Ki u j̄iin ki boib a, “Bee ki i loonimi? I ki mi nan n saa fabir kii be n Baa toona nie-e?” <sup>50</sup> N̄aan bi din ki bann u maan maŋ paaki.

<sup>51</sup> N̄anne ki bi din n̄mat nan Yiisa ki sik Nasaref, ki u saak bi m̄ob. Ki u naa tian linba tun na kur u par ni. <sup>52</sup> Ki Yiisa kpaatir ki pukii nan subinii, ki Yennu nan nisaarii para mei u paak.

### 3

*J̄oonn nba din wuur niib Yennu nyunwuru bianjinba*

*(Matiu 3.1-12; Mak 1.1-8; J̄oonn 1.19-28)*

<sup>1</sup> Kpanbara yudaanɔ Taiberias nba din dii naan bina piik nan n̄an̄mu ni, ki Ponsius Pailat mun tee Judea yudaanɔ, ki Herod mun tee Galilii batsaakɔɔ, ki u waarɔ Filip mun tee Iturea nan Trakonitis batsaakɔɔ, ki Laisanias tee Abilene batsaakɔɔ, <sup>2</sup> ki Annas nan Kayafas mun tee mannteeb yudamm, li yoo na ki Yennu j̄ii u maan ki tur J̄oonn nba tee Sekaria bija na; ki u din be muuk ni. <sup>3</sup> N̄anne ki J̄oonn din lin J̄oodann m̄okir po kur, ki m̄oontir ki teen niib a bin nyik bi toonbiit ki wun wurib Yennu nyunwuru,

ki Yennu n nyik chabib. <sup>4</sup> Linba na tee nan Yennu sokinii Aisaya nba din sob Yennu gboun ni bianjinba nae a:

“Nisoo be muuk ni ki hoot a:

‘Nammit man ti Yomdaano baaru sonu ki turo,  
ki namm u sonii ki lii took.

<sup>5</sup> Baat kur saa gbee ki naa;

ki joot nan kunkona kur saa bit ki naa.

Sonu nba nmar siaminba kur, li saa sont fanu;  
sonboota saa piin ki lat naa,

<sup>6</sup> ki tingboun niib kur saa la bianjinba ki Yennu  
saa tinnib.’ ”

<sup>7</sup> Nann mane ki niib bonchiann din baar Joonn boor a wun wurib Yennu nyunwuru; ki u betib a, “Yimm waalabirii na. Nmee kpaani a yin tin nyi Yennu wutoor nba yaa lin baar i paak na ni?

<sup>8</sup> Ii tuun man linba saa wann nan i set nyik i toonbiita. I daa daan i para ni nan Abraham tee i yeeja. N beerie, Yennu saa fit fiin tana nba na ki lin kpant Abraham yaaboona. <sup>9</sup> Pajar pon teen siira a wun choo tiinii; ki tiik nba kur ki loon loonana, bi saa choore ki lu muu ni.” <sup>10</sup> Ki nibur man din boio a, “Ki ti ji saa teen nlee?”

<sup>11</sup> Ki u jiin a, “Wunba mok liata nanlee, see ki u paat yenn ki tur wunba ki moki, ki wunba mok jeet, wun wat tur wunba ki moki.” <sup>12</sup> Nanne ki lampogaartesiab mun baar a wun wurib Yennu nyunwuru, nan boio a, “Chanbaa, timm saa teen nlee?”

<sup>13</sup> Ki u betib a, “I daa gaan likirii ki gaar baa senni bianjinba na.” <sup>14</sup> Ki kunkonkonna mun baar ki tan boio a, “Ki timm muni, ti saa teen nlee?” Ki u betib a, “I daa mukisir soo ki

gaan siari, koo ki fa faak ki paa niib; i numm n gboo i paauk nba ki i gaan na.”

<sup>15</sup> Tɔn, ki niib ji piin ki dukii dudukit bi para ni ki mɔk dindann Jɔonn po, a li pasiar u sii tee Yennu Niganntɔɔ Masia-e. <sup>16</sup> Li yoo maŋ ki Jɔonn bet bi kur a, “Min ŋarin wuuri nyume, ŋaan wunba cheen baat. N ki ŋan nan ki n lot u taasanmii. Njɔɔe saa jii Yennu Seyeen nan muu ki wuur i para. <sup>17</sup> U dia dilenn ŋmanii a wun lenn bonŋann, ki nyinn dibin ki wuun u boor ni, ŋaan lu fouŋ na muu nba kan mi kpeen ni.”

<sup>18</sup> Jɔonn nba din mɔɔntir barŋanii maŋ ki teen niib na, u din pak pinpakbooru booru ki kpaamm. <sup>19</sup> U bia din kpaan batsaakɔɔ Herod, kimaan u din fat u mɔŋ waarɔ ŋaapoo Herodias ki kɔɔn, ki bia tun toonbiit bonchiann ki pukin. <sup>20</sup> Li poorpoe ki u tan kɔɔn Jɔonn dansarik, ki li mantik tee bonbiir.

*Jɔonn nba din wur Yiisa Yennu nyunwuru bianjinba*

*(Matiu 3.13-17; Mak 1.9-11)*

<sup>21</sup> Yoo nba ki Jɔonn din wur niib na kur Yennu nyunwuru na, ki Yiisa tan baar u boor, ki u wur u mun Yennu nyunwuru. Leŋ maŋe ki Yiisa mei Yennu, ki sanpaapo tan loot, <sup>22</sup> ki Yennu Seyeen sik u paak ki tee nan ŋmann na, ki kunkɔr nyii sanpaapo ki yet a, “Fine tee n Bilonkak; fine ki n numm gboo.”

*Ki jiiin Yiisa yeejamm po*

*(Matiu 1.1-17)*

<sup>23</sup> Yoo nba ki Yiisa din piin Yennu toonn na, ki u tee nan bina piintaa na.

Niib din mi a u tee Joosef bijae.  
Joosef baa din tee Heli-e,  
24 ki Heli baa tee Matat, ki Matat baa tee Liifai,  
ki Liifai baa tee Melki, ki Melki baa tee Janai,  
ki Janai baa tee Joosef,  
25 ki Joosef baa tee Matatias, ki Matatias baa  
tee Amos,  
ki Amos baa tee Nahum, ki Nahum baa tee Esli,  
ki Esli baa tee Nagai,  
26 ki Nagai baa tee Maat, ki Maat baa tee  
Matatias,  
ki Matatias baa tee Semeinn, ki Semeinn baa  
tee Josek,  
ki Josek baa tee Joda,  
27 ki Joda baa tee Joanann, ki Joanann baa tee  
Resa,  
ki Resa baa tee Serubabel, ki Serubabel baa tee  
Sealtiel,  
ki Sealtiel baa tee Neri,  
28 ki Neri baa tee Melki, ki Melki baa tee Adi,  
ki Adi baa tee Kosam, ki Kosam baa tee El-  
madam,  
ki El-madam baa tee Er,  
29 ki Er baa tee Joosua, ki Joosua baa tee Elieser,  
ki Elieser baa tee Jorim, ki Jorim baa tee Matat,  
ki Matat baa tee Liifai,  
30 ki Liifai baa tee Simeonn, ki Simeonn baa tee  
Juda,  
ki Juda baa tee Joosef, ki Joosef baa tee Joonam,  
ki Joonam baa tee Elayakim,  
31 ki Elayakim baa tee Melea, ki Melea baa tee  
Menna,  
ki Menna baa tee Matata, ki Matata baa tee  
Natann,

ki Natann baa tee Defid,  
<sup>32</sup> ki Defid baa tee Jese, ki Jese baa tee Obed,  
 ki Obed baa tee Boas, ki Boas baa tee Salmonn,  
 ki Salmonn baa tee Nasonn,  
<sup>33</sup> ki Nasonn baa tee Aminadab, ki Aminadab  
 baa tee Admynn,  
 ki Admynn baa tee Arni, ki Arni baa tee  
 Hesronn,  
 ki Hesronn baa tee Peres, ki Peres baa tee Juda,  
<sup>34</sup> ki Juda baa tee Jakob, ki Jakob baa tee Aisak,  
 ki Aisak baa tee Abraham, ki Abraham baa tee  
 Tera,  
 ki Tera baa tee Nahor,  
<sup>35</sup> ki Nahor baa tee Serug, ki Serug baa tee Reu,  
 ki Reu baa tee Peleg, ki Peleg baa tee Eber,  
 ki Eber baa tee Sela,  
<sup>36</sup> ki Sela baa tee Kainann, ki Kainann baa tee  
 Afaksad,  
 ki Afaksad baa tee Sem, ki Sem baa tee Nowa,  
 ki Nowa baa tee Lamek,  
<sup>37</sup> ki Lamek baa tee Metusela, ki Metusela baa  
 tee Enok,  
 ki Enok baa tee Jared, ki Jared baa tee Maha-  
 laleel,  
 ki Mahalaleel baa tee Kainann  
<sup>38</sup> ki Kainann baa tee Enos, ki Enos baa tee Sef,  
 ki Sef baa tee Adam, ki Adam baa tee Yennu.

## 4

### *Bianjinba ki Sintaanii jamm Yiisa (Matiu 4.1-11; Mak 1.12-13)*

<sup>1</sup> Li yoo na ki Yiisa nyii Joodann mōkir po, ki  
 gbee nan Yennu Seyeen, ki Seyeen man te ki u  
 koo muuk ni, <sup>2</sup> ki be leŋ daa piinna, ki Sintaanii



jammɔ. Ki u ki dii siar daa maŋ ni; ki kon ji din tan sooro.

<sup>3</sup> Ki Sintaanii yeto a, “Li-i tee ki a set tee Yennu Bijaie, fan yet tann na ki lin kpant jeet.” <sup>4</sup> Ki Yiisa yeto a, “Li sob Yennu gbouŋ ni a, ‘Jeet kuukoo kaa te ki nirɔ be.’ ” <sup>5</sup> Li poorpoe ki Sintaanii ji jiiu ki doo nano sanpaapo, ki saa wannɔ tingbouŋ na yent kur yama, <sup>6-7</sup> ŋaan beto a, “N bo saa tura paŋ nan mɔkint na kur. Bi din tur mine paŋ nan mɔkint maŋ, ki n mun saa fit tur wunba ki n loon. Li-i tee ki a bo saa gbaan ki jiantin, li kur bo sii tee a yare.” <sup>8</sup> Ki Yiisa beto a, “Li sob Yennu gbouŋ ni a, ‘Nirɔ-ii jiantir u Yomdaano Yennu kuukooe, kii bia kii waa ŋoo kuukoo.’ ”

<sup>9</sup> Ŋanne ki Sintaanii bia jiiu ki saan nano Jerusalem, ki saa doo nano Yenjiantu ŋasaakak mɔpin-yerik paak, ŋaan beto a, “Li-i tee ki a set tee Yennu Bijaie, fan yukir ki sik, <sup>10</sup> kimaan li sob Yennu gbouŋ ni a, ‘U saa te ki u malakanba-ii guua fanu.’ <sup>11</sup> Li bia sob a, ‘Bi sii dia-a nan bi nii ki a taar kan gbiat tann gbaa.’ ”

<sup>12</sup> Ki Yiisa yeto a, “Yennu gbouŋ bia yet a, ‘Soɔ daa bikii u Yomdaano Yennu.’ ”

<sup>13</sup> Sintaanii nba jamm Yiisa ki tan goo na, ki u daa nyiko.

*Yiisa nba din piin u toonn Galilii yent ni bianjinba*

*(Matiu 4.12-17; Mak 1.14-15)*

<sup>14</sup> Yiisa din gbee nan Yennu Seyeen paŋ, ki tan ŋmat saan Galilii. Ki bi moont u labaar ki li yat tiŋ maŋ kur po. <sup>15</sup> U din wantib Yennu maan, bi Yenjiantu diit ni; ki niib kur piako.

*Bianjinba ki Nasaref doo ni teeb yêb Yiisa  
(Matiu 13.53-58; Mak 6.1-6)*

<sup>16</sup> Li poorpoe ki Yiisa din saan Nasaref, siaminba ki u din tan n̄mant nirɔ na. Ki foon daar ki u tan kɔɔ Yenjiantu diiuk ni, nan waa poŋ din tuu kɔɔ bianjinba na, ki tan fiir a wun karin Yennu gbouŋ. <sup>17</sup> Ki bi jii gbouŋ nba ki Yennu sokinii Aisaya din sɔb na ki turɔ; ki u pint gbouŋ na ki la siaminba ki li sɔb a:

<sup>18</sup> “Yennu Seek be n ni,  
ki u gannin a n mɔɔnt barnanii ki tur tatimm.  
U tumin a n tan bet yommii a n saa nyinnib yann,  
ki bia bet jɔɔnii ki bin nyɔɔnt,  
ki bia fat binba be biak ni ki lub yann,  
<sup>19</sup> ki bia mɔɔnt a li jaŋ nan Yennu n tinn u niiba.”

<sup>20</sup> Yiisa nba karin gbenn yoo nba, ki u pin gbouŋ na ki jiin tur Yenjiantu diiuk toontunnɔ, n̄aan kar. Ki niib kur nba be diiuk na ni ji goriiɔ.  
<sup>21</sup> Ki u piin piak ki teemm a, “Maan nba ki n karin Yennu gbouŋ ni na, li teen barmɔnii dinna, laa baa i tuba ni na.” <sup>22</sup> Ki bi kur ji piakɔ; ki li bakitib nan mamamm nba ki u pak na, ki bi ji boi bi leeb a, “Joosef bija na kaa na-a?”

<sup>23</sup> Li yoo na ki u betib a, “N kan biris nan i tan saa betin barjouk nae a, ‘Fin tebtɔɔ, tebin a mɔŋ mɔŋ,’ ki bia tan saa betin a n tun bakitnaun̄ toonjaana n mɔŋ doo ni, nan bianjinba ki i gbat ki n tun Kapenaum na. <sup>24</sup> Barmɔniie ki n beeri na, niib kan gaar Yennu sokinii u mɔŋ mɔŋ doo ni. <sup>25</sup> Barmɔniie, pakɔi bonchiann din be Israel tiŋ ni, yoo nba ki Elaija daa din be na. Yoo maŋ ni, saak din ki baa bina n̄antaa nan n̄maarii n̄anloob, ki kon din tan baa bonchiann tiŋ maŋ

kur po, <sup>26</sup> ɲaan Yennu din ki tun Elaija soɔ boor faba tinj maɲ ni; u din tumɔ pakɔɔk nba din be Sarefaf doo nba be Sidonn tinj ni na boore. <sup>27</sup> Yoo nba ki Elaisa daa din be na, gbaata bonchiann din be Israel tinj ni, ɲaan bi soɔ din ki la laafia tinj maɲ ni; Naamann nba din tee Siria joo na, ɲoo kuukooe din la laafia.”

<sup>28</sup> Ki niib kur nba be Yenjiantu diiuk maɲ ni nba gbat Yiisa maan maɲ na, ki bi ji donn wutoa u paak, <sup>29</sup> ki fiir ber nyinnɔ doo na ni, ki saa nanɔ kunkonn nba ki bi maa bi doo na kpɪɲ, a bin lu-u baauk ni, <sup>30</sup> ɲaan ki u buut bi ni ki yaat.

*Joo nba ki narinbiiuk din be u ni na labaar  
(Mak 1.21-28)*

<sup>31</sup> Li poorpo ki Yiisa sik Kapenaum nba be Galilii yent ni na. Foon daar ki u koo Yenjiantu diiuk ni ki want niib Yennu maan; <sup>32</sup> ki u wannu maɲ bakitib bonchiann, kimaan u maan na din mɔk paɲ. <sup>33</sup> Ki jasoo nba ki narinbiiuk be u ni na din be Yenjiantu diiuk na ni ki tian sanpaapo a <sup>34</sup> “Fin Yiisa nba tee Nasaref nirɔ na, timm nan fin, nlee mantiki? A baar a a tan biirite-e? N mi faa tee wunba; a tee Yennu popeendaano nae.” <sup>35</sup> Ki Yiisa yakii nan narinbiiuk maɲ a, “Nminin fuut, ɲaan nyi joo na ni.” Ki narinbiiuk na lu joo na tinj ni, bi sinsuuk ni, ɲaan nyii u ni; waa lek lu-u tinj ni na, ɲaan u ki paano danj. <sup>36</sup> Ki li teen soɔ kur yaarlituk, ki bi boi bi leeb a “Mɔbonboor-bee na? U mɔk yikoo nan paɲ ki teen narinbiit mɔb, ki bi nyi niib ni.” <sup>37</sup> Li paak, ki bi din moont Yiisa sann tinj maɲ kur po.

*Bianjinba ki Yiisa te ki baatib bonchiann la laafia*

*(Matiu 8.14-17; Mak 1.29-34)*

<sup>38</sup> Li yoo na ki Yiisa nyii Yenjiantu diiuk na ni ki saan Simonn n̄aak, ki saa la Simonn dianpook yiar yiaru nba paar, ki bi fabin tur Yiisa ki jiin poo na po. <sup>39</sup> Ki Yiisa baar ki set waa d̄oo siaminba na, n̄aan tur yiaru na m̄ob, ki li gbenn; ki poo na fiir yiama ki teemm saauŋ. <sup>40</sup> Yonnu nba tan baa yoo nba, ki binba kur m̄ok baatib bi n̄ei ni na jiib ki baar namm Yiisa boor; ki bi yiar yiarbooru booru. Ki u yii yii u nii baatib na kur paak ki te ki bi la laafia. <sup>41</sup> U bia din te ki narinbiit nyii niib bonchiann ni. Baa nyi yoo nba, ki bi tian sanpaapo a, “A tee Yennu Bijae.” N̄aan ki u din ki sak ki bi pak jikii, kimaan bi mi nan u tee Yennu Nigannt̄oo Masia-e.

*Yiisa nba din m̄ontir barnanii Judea digbana ni bianjinba*

*(Mak 1.35-39)*

<sup>42</sup> Laa din yent ki Yiisa nyii doo na ni ki saan muuk ni; ki niib na din tan lin loon̄o ki saa lau. Baa lau yoo nba, ki bi ji gooro a u daa yaatir n̄aan nyikitibi. <sup>43</sup> Ki u betib a “See ki n saan digbanlia biak kii sakii m̄ontir barnanii nba jiin Yennu naan po, kimaan li paake ki Yennu tumin.” <sup>44</sup> N̄anne ki u lin Judea digbana ki k̄oo Yenjiantu diit ni ki want niib barii maŋ.

*Bianjinba ki Yiisa din gann u sinsinn poor-poweiteeb*

*(Matiu 4.18-22; Mak 1.16-20)*

<sup>1</sup> Dasiar ki Yiisa din see Genesaret mɔkgbenjir\* boor ki want niib Yennu maan; ki nibur tut baat a bin gbiint u maan maɲ. <sup>2</sup> Ki burgbeta ɲanlee be mɔkgbenjir maɲ gbingbann, ki jansoor-teeb nyikir ɲaan chat saan a bin wuur bi janlaant. Yiisa nba din la burgbeta maɲ yoo nba, <sup>3</sup> ki u kɔɔ Simonn yar ni, ɲaan betɔ a wun chatir waan ki sikin nyun ni. Waa chat sikin na, ki Yiisa kar burgbetir maɲ ni, ɲaan want nibur na Yennu maan.

<sup>4</sup> Waa din wann niib na ki gbenn yoo nba, ki u bet Simonn a “Jirin nyunsunsun po ki lu i janlaant ki soor janii.” <sup>5</sup> ɲaan ki Simonn jiin a, “Chanbaa, wonn nyiok munna ti won yabir a ti soor janii, ɲaan ki fit soor siari. Tɔn, faa pak linba na, ɲann n saa lu ki got.” <sup>6</sup> Ki Simonn nan u leeb na ji lu bi janlaant na ki soor janii bonchiann; ki bi janlaant ji yaa lin pat. <sup>7</sup> Li paak, ki bi kabint bi leeb nba be burgbetleer na ni a bin baar ki sommib. Baa baar yoo nba, ki bi donn janii na ki tan gbeen bi burgbeta ɲanlee na kur, ki li din kpiak ki ji yaa lin kpil nyun ni.

<sup>8</sup> Ki Simonn Piita nba la linba tun na, ki u gbaan Yiisa tɔonn ɲaan yetɔ a “N Yomdaano, n tee biitdaano. N ki ɲan nan ki n nakinani. Nyikimin ɲaan kii saa,” <sup>9</sup> kimaan baa soor janii bonchiann bianjinba na, ki li bakit Simonn Piita nan u naasinyɔɔsnba na kur, <sup>10</sup> nan u leeb, Jeems nan Jɔonn nba din tee Sebedii waas na. Ki Yiisa

---

\* **5:1** 5.1 ɲanne bia din tee Galilii mɔkgbenjir.

bet Simonn a “Daa tiin janmaanii. Laa jii dinna ki saa, a saa saan kii daak niib kii baat namm n boor.”

<sup>11</sup> Nanne ki bi ji din tut bi burgbeta manj ki donn gbingbann, ki nyik bi bont kur lej njaan waa Yiisa.

*Yiisa nba din te ki gbaatir la laafia bianjinba  
(Matiu 8.1-4; Mak 1.40-45)*

<sup>12</sup> Sianyoo ki Yiisa be dosau nna ni, ki gbaatir† be lej, ki yiaru na be u paak bonchiann. Waa din tan la Yiisa yoo nba, ki u baar ki fabin u tɔɔnn ki miarɔ a “N Yomdaano, li-i tee ki a loon, a saa fit te ki n njaauk na n gbenna.”

<sup>13</sup> Ki Yiisa tant nuu ki siiu, ki yetɔ a “N loon nna. A njaauk manj n gbenn.” Li taakpaak ni ki u njaauk na set gbenn. <sup>14</sup> Njaan ki Yiisa kpaano a “Daa piak soɔ barii na. Ii saa Yennu manntɔ boor ki jii a mɔɔ ki wannɔ, ki bia mann maruɔ ki tur Yennu, nan Moses nba din senn ki jiin gbaata laafia lanu po na, ki soɔ kur n bann nan a njaauk manj set gbenna.”

<sup>15</sup> Barmonii, Yiisa sann set din doo bonchiann ki gar sinsinn yoo na, ki nibur din lakin u boor a bin gbiint u maan, ki baatib nba be lej na bia loon bii laat laafia. <sup>16</sup> U din tuu nyie ki saa muuk ni ki mei Yennu.

*Yiisa nba din te ki gbanankpeenn daano la  
laafia bianjinba*

*(Matiu 9.1-8; Mak 2.1-12)*

<sup>17</sup> Sianyoo ki Farisiinba nan sennu wantteeb mun din nyii Galilii doi kur ni, nan Judea doi kur

---

† 5:12 5.12 Bi maan ni, njaauk paak tee gbanant paak yiar yoonne.

ni, nan Jerusalem doo ni, ki baar Yiisa boor. Li daar ki Yiisa want niib Yennu maan n̄asiak nna diiuk ni, ki Farisiinba nan sennu wanteeb maŋ kar lenj, ki Yennu paŋ din be Yiisa ni a wun te ki niib n la laafia. <sup>18</sup> Ki nisiab tan baat ki jii baatɔɔ lian paak, wunba ki u gbanant kpowa, ki bi koor a bin kɔɔ nano diiuk maŋ ni ki birɔ Yiisa tɔɔnn, <sup>19</sup> n̄aan bi din ki la yiar nba saa kɔɔ, kimaan niib din yab bonchiann. Li paak ki bi jiiu ki doo nano diiuk na yur paak,<sup>†</sup> ki chɔɔ loot, ki sikinɔ nan lian na ki tan birɔ Yiisa tɔɔnn, niib na sinsuuk ni. <sup>20</sup> Yiisa nba la baa teenɔ yada bianjinba na, ki u bet jɔɔ na a “N yɔɔk, n nyik chab a biita.” <sup>21</sup> Ki sennu wanteeb nan Farisiinba na ji dukii bi para ni a “Nilanɔpoe mun piak nna ki yekint u mɔŋ nan Yennu? N̄mee saa fit nyik chab nirɔ biiti, ki li ki tee Yennu kuukɔɔ kaa?”

<sup>22</sup> Yiisa n̄arin din mi baa dukii bianjinba, ki u boib a “Bee ki i dukii nna? <sup>23</sup> Maa yet baatɔɔ na a ‘N nyik chab a biit,’ koo maa saa yetɔ a ‘Fiit kii somm na,’ maan munlee na lannpoe paari? <sup>24</sup> N ji saa wannɔ nan min nisaarik Bik mɔk yikoo tingboun na ni ki saa nyik chab niib bi biit.” N̄anne ki u bet jɔɔ nba ki u gbanant kpo na a “Fini, fiit ki jii a lian kii kun a n̄aak ni.” <sup>25</sup> Li taakpaak ni ki jɔɔ maŋ fir set bi numm po, ki jii u lian maŋ, ki kun. Waa saa na ki u piak dontir Yennu. <sup>26</sup> Ki li bakit bi kura, ki janmaanii bia soorib; ki bi piak dont Yennu ki yeen a “Dinna ti jia la durinya-a.”

---

<sup>†</sup> **5:19** 5.19 Bi diit yura paak, bi din tuu sere.

*Yiisa din yiin sɔɔ ki u sann tee Liifai  
(Matiu 9.9-13; Mak 2.13-17)*

<sup>27</sup> Li poorpoe ki Yiisa din nyii njaak man ni ki saa, ki saa la lampogaartɔɔ, ki u sann tee Liifai, ki u kar u toonn paak, lampogaar-diiuk ni; ki Yiisa betɔ a “Fiit kii waan.” <sup>28</sup> Ki u nyik bont kur njaan fir ki waau.

<sup>29</sup> Nanne ki u tan teen jaangbenjir u njaak ni ki tur Yiisa; ki lampogaarteeb nan niib bonchiann din baar ki lakin dii namm. <sup>30</sup> Ki Farisiinba siab nan sennu wantteeb nba tee Farisiinba na baar ki burin nan Yiisa poorpoweiteeb a, “Bee ki i di ki nyu nan lampogaarteeb nan biitdammi?”§

<sup>31</sup> Ki Yiisa gatib a “Binba mɔk laafia ki loon tebtɔɔ; binba yiar, njamme loon. <sup>32</sup> N ki baar a n yiin popeenn damm kaa, njaan n baar maa n bet biitdamme a bin nyik bi toonbiit.”

*Mɔloru labaar  
(Matiu 9.14-17; Mak 2.18-22)*

<sup>33</sup> Nanne ki nisiab din yet Yiisa a “Jɔɔnn poorpoweiteeb yɔɔ lorin mɔi ki mei Yennu, ki Farisiinba poorpoweiteeb mun bia tee nna, njaan a poorpoweiteeb njarin di ki nyu.”

<sup>34</sup> Ki u boib a, “Poochiann-i be, sɔɔ saa fit ki te ki saamm n lor mɔi, yoo nba ki pooyookir sɔɔ daa be bi boor ni nawa-a? Aaii. <sup>35</sup> Njaan yoo baat, ki bi tan saa nyinn pooyookir sɔɔ na bi boor; li yooe ki bi saa lor mɔi.”

<sup>36</sup> Yiisa din yimm barjouk biak a “Sɔɔ kan pat tapaann chabir ki lik takperi. Li-i tee ki u teen nnaie, u saa biir tapaann manje, njaan chabpaann

---

§ 5:30 5.30 Biitdamm din tee binba ki waa bi sennu fanu nae.



nan takper maŋ bia lek kii jami. <sup>37</sup> Nnae mun ki sɔɔ kan jii dapaanin ki liak kɔrkper ni. Li-i tee ki u teen nnaie, dapaanin na-i mɔ yoo nba, li saa put kɔruk nae, ki daan maŋ n mɔɔn yann, ki kɔruk na n mun biir. <sup>38</sup> See ki a jii dapaanin ki liak kɔrpaann ni. <sup>39</sup> Wunba nyu dakper, u-i la dapaanin, u ki loonir. U saa yet a ‘Dakper nae man.’ ”

## 6

### *Ki jii foon daar po*

*(Matiu 12.1-8; Mak 2.23-28)*

<sup>1</sup> Tɔn, foon dasiar ki Yiisa nan u poorpoweiteeb din gaar dii kpaab ni, ki u poorpoweiteeb na din somm kɔnii dikara ki pinii ŋman. <sup>2</sup> Ki Farisiinba siab boib a “Bee ki i tuun linba ki ti sennu want nan ti daa tuun foon daari?”

<sup>3</sup> Ki Yiisa jii boib a “I ki mi karin Yennu gboun ni, Defid nba din tun bianjinba na-a? Kon nba din mɔk ŋɔɔ nan u jɔɔmu na, <sup>4</sup> ki u din kɔɔ Yenjiantu ŋaak ni ki saa jii Yennu boroboro ki ŋman, ki bia tur u jɔɔmu na, ŋaan sennu na din ki chab nan sɔɔ n di boroboro maŋ see mannteeb kuukɔɔ.”

<sup>5</sup> Ki Yiisa bia betib a “Min nisaarik Bike yen foon daar.”

*Yiisa nba din te ki nuukpeenn daanɔ la laafia bianjinba*

*(Matiu 12.9-14; Mak 3.1-6)*

<sup>6</sup> Foon daleer ki Yiisa kɔɔ Yenjiantu diiuk ni ki wann niib Yennu maan, ki jasɔɔ be leŋ ki u niidiitu kpo. <sup>7</sup> Ki sennu wannteeb nan Farisiinba siab mun din be leŋ, ki gorii Yiisa a bin laan u

saa turɔ laafia foon daari,\* kimaan bi din loon bin la linba ki bi saa biirɔe. <sup>8</sup> Naan Yiisa din mi linba be bi dudukit ni, ki bet joo nba ki u nuu kpo na a “Fiit ki set toonn po.” Ki joo manj fiir set. <sup>9</sup> Ki Yiisa yetib a “N yaa n boi-ie ki laan ti sennu sak nan ti somm niib foon daar koo ti biiribi? Ti tinn niib koo ti kpibi?” <sup>10</sup> Nanne ki u got lint niib manj kura naan bet nuukpeenn daano na a, “Tantir a nuu manj.” Ki u tant, ki li la paŋ.

<sup>11</sup> Ki sennu wanteeb nan Farisiinba na ji din yaa bin put nan wutoa, ki ji piin beer leeb baa saa teen Yiisa bianjinba.

*Yiisa nba din gann u toomiinba piik nan banlee bianjinba*

*(Matiu 10.1-4; Mak 3.13-19)*

<sup>12</sup> Li daa nba tan gar ki Yiisa doo kunkonn paak a wun saa miar Yennu, ki din saa mei Yennu nyioɔk nan laa tan yent. <sup>13</sup> Ki sanyiok ni ki u yiin u poorpoweiteeb ki tan gann piik nan banlee ki yib toomiinba.† <sup>14</sup> U din gann Simonn (wunba ki u din purɔ Piita na) nan Simonn waarɔ Andru, nan Jeems nan Joonn, nan Filip nan Batolomiu, <sup>15</sup> nan Matiu nan Tomas, nan Jeems nba din tee Alfeus bija na, nan Simonn (wunba ki bi din yiu Nikakitik na), <sup>16</sup> nan Judas nba din tee Jeems bija na, nan Judas Iskariot (wunba din tan nyii Yiisa poor na).

*Yiisa nba din want niib ki bia te baatib laat laafia bianjinba*

*(Matiu 4.23-25)*

---

\* **6:7** 6.7 Wunba tun toonn foon daar, bi din tuu kpiue. † **6:13** 6.13 Njamme din tuu saa moontir Yennu maan.

<sup>17</sup> Yiisa nba din nyii kunkonn na paak ki sik namm yoo nba, ki u saan set paanu ni; ki u poorpojoomu lakin bonchiann; ki niib bonchiann mun dɔŋ nyii Judea nan Jerusalem ki pukin Taya nan Sidonn doi kur nba kpia mɔkgbenjir na, <sup>18</sup> ki baar a bin gbiint u maan, ki bia loon wun te ki bin la laafia. Binba ki narinbiit daamiib na mun din baar, ki u te ki bi la laafia. <sup>19</sup> Ki soɔ kur nba yiar loon wun sii Yiisa, kimaan paŋ din nyi u nie ki te ki bi kur laat laafia.

*Parpeenn nan parbiir labaar*  
(*Matiu 5.1-12*)

<sup>20</sup> Li yoo na ki Yiisa got u poorpoweiteeb na ŋaan yet a “Yimm tatimm, parpeenn tee i yare, kimaan Yennu naan tee i yare. <sup>21</sup> Yimm nba ki kon mɔki mɔtana, parpeenn tee i yare, kimaan i tan saa gboowa. Yimm nba mɔ mɔtana, parpeenn tee i yare, kimaan i tan sii laae.

<sup>22</sup> “Niib-i nami ki bokitiri, ki sukii-i ki biir i sana, kimaan yaa waa min nisaarik Bik na paak, parpeenn tee i yare. <sup>23</sup> Ii mɔk parpeenn kii kpamm, kimaan i nyɔɔt tan sii yab Yendɔuŋ ni; bi yeejamm mun din tee Yennu sɔkiniinba na nnae.

<sup>24</sup> “Yimm mɔkita, li sii bi i paak, kimaan i dɔŋ la i yanboota.

<sup>25</sup> “Yimm nba gboo mɔtana, li sii bi i paak, kimaan kon tan saa gbatiwa.

“Yimm nba laa mɔtana, li sii bi i paak, kimaan i tan sii fabin ki mɔ.

<sup>26</sup> “Yimm nba ki niib kur piaki, li sii bi i paak; bi yeejamm mun din piak faak sɔkiniinba na nnae.

*Ii mək lomm nan i datai man  
(Matiu 5.38-48; 7.12a)*

<sup>27</sup> “Yimm nba gbiintir n maan na, n beerie, ii mək lomm nan i datai, kii tuun linba njan kii teen binba nami na. <sup>28</sup> Binba porintiri mɔpora, yin jiimm a ‘Yennu piisin-ii be i paak.’ Binba sarikiti, ii mei Yennu kii teemm. <sup>29</sup> Wunba peba tanpak, fan n̄mant leer po ki wun peb. Wunba jii a liatir, fan n̄aan ki wun gaar a soot pukin. <sup>30</sup> Wunba kur miara siar, fan turɔ. Wunba fat a bona, a ji daa waa gaani. <sup>31</sup> Bianjinba ki i loon niib-ii tuun kii teeni na, ii muni tuun nna kii teemm.

<sup>32</sup> “Li-i tee ki i loon binba looni na kuukɔɔie, nlee ki Yennu saa pukinini? Biitdamm mun loon binba loomm na gbaa. <sup>33</sup> Li-i tee ki i tuun linba njan ki teen binba tuun linba njan ki teeni na, nlee ki Yennu saa pukinini? Biitdamm mun tuun linba na gbaa. <sup>34</sup> Li-i tee ki i kpentir ki teen binba ki i daan nan i tan saa gaar, nlee ki Yennu saa pukinini? Biitdamm mun kpentir nnae, ki teen bi leeb, ki bia tuu tan gaar bi bont bian.

<sup>35</sup> “Li paak, ii mək lomm nan i datai man, kii tuun linba njan kii teemm. Li-i tee ki i kpent niro ki li yukir, yaa daa biir i para li paaki, kimaan i nyɔɔt tan sii yab, ki i bia tan sii tee Yabint Yennu waas, kimaan n̄ɔɔe tuun linba njan ki teen binba ki teenɔ niipoouk, nan binba tee biitdamm na.

<sup>36</sup> Ii mək ninbatinu man nan i Baa Yennu nba mək ninbatinu bianjinba na.

*Leeb buut bunu labaar  
(Matiu 7.1-5)*

<sup>37</sup> “I daa bu leeb buuti, ki Yennu kan bu i buuti. Daa piak biir niro ki gbentɔ, ki Yennu kan biir ki

gbenniini. Nyikin chab niib, ki Yennu saa nyik chab i mun. <sup>38</sup> Li teen niib, ki Yennu mun sii teeni. Li sii tee nan Yennu nba saa jii u nmanbanj ki chaat dii, ki lin tan gbee nan mɔgbana, ki wun ji dinn ki lin tan gbee ki saa mɔ, ki jii turi bianjinba ki i saa fit dia nae. Yaa jikit nmanbanj ki chaatir bont bianjinba ki teen niib na, Yennu mun saa chaat nnae ki turi.”

<sup>39</sup> Li poorpo ki Yiisa yimm barjouk na a, “Jooj ki fit daar u loo. Bi kur saa baa bootuk nie. <sup>40</sup> Tumiitoo ki gar u wantoo; ki tumiitoo-i bann gbenn, naan noo nan u wantoo sii jame.

<sup>41</sup> “Bee ki a laat moonu nba be a loo ninbinn ni, naan ki ki la dajinn nba be a moj moj ninbinn ni na? <sup>42</sup> Nlee ki a saa bet a loo a ‘N yook, naant ki n nyinn moonu nba be a ninbinn ni na,’ naan ki ki laat dajinn nba be a moj ninbinn ni na? Fin kpinkpanni daano na, nyint dajinn nba be a ninbinn ni na sinsinn, ki ji fit la fanu ki nyinn moonu nba be a loo ninbinn ni na.

*Ki jii tiik nan u loona po  
(Matiu 7.16-20; 12.33-35)*

<sup>43</sup> “Tinjan kan lon loonbiiti, ki tikpeeun mun kan lon loonjana. <sup>44</sup> Tiik loona nie ki bi banto. Bi ki po kinkana kunkon paak ki bia ki po gaa jagotuk paaki. <sup>45</sup> Niñanoe tuun toonjana, kimaan u par ni nan; ki nibiiuk mun tuun toonbiit, kimaan u par ni bi. Linba be niro par ni, nanne ki u piak.

*Namaara banlee labaar  
(Matiu 7.24-27)*

<sup>46</sup> “Bee ki i yin i Yomdaanoŋ ŋaan ki tuun maa loon bianjinba? <sup>47</sup> Wunba kur baat n boor ki gbiintir n maan ki saak ki tuun li bian, n saa wannu waa naan wunba; <sup>48</sup> u naan joo nba din maa u ŋaak nae. Sinsinn u din gbiir fiakir ki li sun, ki saa tuu tanpiiuk, ki u ji fokin fiakir man li paak. Li poorpo ki saak tan baa bonchiann, ki kpenu gbee, ki nyunmonn doo ki yir ŋaak man, ŋaan ki li ki baa, kimaan u din maar bonŋanne. <sup>49</sup> ŋaan wunba gbiintir n maan ŋaan yêl li weiu, u naan nan joo nba mun din maa u ŋaak tanbiinii ni, ŋaan ki ki gbiir fiakir nae, ki nyunmonn din tan gbee ki saa doo ki yir ŋaak man, ki li baa yيامa. Bia ninboŋe na jiaki.”

## 7

### *Ki jiin Rom tinj kunkonkonna yudaanoŋ yada po (Matiu 8.5-13)*

<sup>1</sup> Yiisa nba din wann niib bont na kur ki gbenn yoo nba, ki u ji gar saan Kapenaum. <sup>2</sup> Ki Rom tinj kunkonkonna yudaansoo be lej ki mok u daabilonkak, ki yiaru sooro, ki u per kuuma. <sup>3</sup> Li yoo man ki kunkonkonna yudaanoŋ na gbat Yiisa po, ki tun Juu teeb saakab u boor, a bin saan ki saa barimoŋ ki wun baar ki tan te ki u daabir na n la laafia. <sup>4</sup> Ki bi saan Yiisa boor ki saa barimoŋ bonchiann ki yeto a, “Joo man jan nan fan sommowa, <sup>5</sup> kimaan u loon ti niib. U bia maa Yenjiantu diiuk ki turita gbaa.”

<sup>6</sup> ŋanne ki Yiisa weib saan. Waa saa per ŋaak man yoo nba, ki kunkonkonna yudaanoŋ man tun u yoonsba ki betib a bin yet Yiisa a, “N Yomdaanoŋ, daa bakint a moŋ ki baati, kimaan n

ki njan nan fan baar koo n njaak ni. <sup>7</sup> N bia ki njan nan ki n nakin a boori. Njan pakin mɔbonne, ki n daabir n la laafia, <sup>8</sup> kimaan n mɔk binba garin ki yenin, ki n mun dia kunkɔnkɔnna ki yemm, ki fit tian yeno paak a ‘Baat,’ ki u baat; ki tian loo paak a ‘Saant,’ ki u saa; ki bia te ki n daabir tuun maa loon bianinba.”

<sup>9</sup> Yiisa nba din gbat linba na, ki li yaar litɔ, ki u jiant ki got nibur nba waa u poorpo na ki betib a “N beerie, n daa ki mi la soo ki u teenin yada na booru, yimm Israel teeb\* booru ni gbaa.”

<sup>10</sup> Li yoo manje ki kunkɔnkɔnna yudaano man yooosnba na nmat saan u njaak ni, ki saa baar soo daabir man la laafiawa.

*Yiisa nba din fin pakook bija kuun ni bianinba*

<sup>11</sup> Li poor po ki Yiisa saa doo nba ki bi yi Neenn na, ki u poorpoweiteeb nan nibur waau. <sup>12</sup> Waa din saa baar doo man tammɔb ni yoo nba, ki u la ki niib bonchiann nyii doo man ni ki jii kuun a bin saan pii. Kpeemmo man naa din tee pakooke; nɔoe tee u bijayemmir. <sup>13</sup> Yiisa nba la pakook na, ki ninbaauk sooro, ki u yeto a “Daa mo,” <sup>14</sup> njan saan sii kuun na lian, ki binba jiiu na set. Ki Yiisa yet a “Naasimo, fiit.” <sup>15</sup> Ki kpeemmo man manfoor jen, ki u fiir kar, ki piin piak. Ki Yiisa jiiu ki kubin u naa.

<sup>16</sup> Ki janmaanii ji soor niib nba be lej na kur, ki bi dont Yennu sann. Bi din yeen leeb a “Yennu sokiniijaann be ti sinsuuk ni. Yennu-e sik a wun

---

\* **7:9** 7.9 Juu teeb sanleere tee Israel teeb.

somm u niib.” <sup>17</sup> Yiisa labaar na din yat Judea yent nan digbankpinii nba kpia lej man kur.

*Jɔɔnn nba din wuur niib Yennu nyunwuru na labaar*

*(Matiu 11.2-19)*

<sup>18</sup> Li poorpoe ki Jɔɔnn nba wuur niib Yennu nyunwuru na poorpoweiteeb din saan ki saa betɔ li labaar kur; ki u tan yiin u poorpoweiteeb banlee, <sup>19</sup> ki tumm Yiisa boor, a bin saa boio a “Fine tee wunba yaa wun tan baar na, koo tii daa kii guu sɔɔ?” <sup>20</sup> Ki bi din saan Yiisa peɲ ki saa betɔ a “Jɔɔnn nba wuur niib Yennu nyunwuru nae tunt a peɲ a ti tan boia ki laan fine tee wunba yaa wun tan baar na koo tii daa kii guu sɔɔ?”

<sup>21</sup> Li yoo mane ki Yiisa din te ki baatib nan baatpaaruk damm bonchiann la laafia, ki u bia nyinn narinbiit siab ni, ki nyɔɔnt jɔɔnii bonchiann. <sup>22</sup> Ki u ji bet Jɔɔnn toonii na a, “I ɲmat man ki saa bet Jɔɔnn linba ki i la ki bia gbat na; a i la ki jɔɔnii nyɔɔntir, ki wɔbii taa naatir ki bi somm, ki gbaata ɲaat gbent, ki tuukpaa ji gbia, ki kpeemm fi kuun ni, ki talasdam gbiintir barɲanii na mɔɔntii. <sup>23</sup> Parpeenn be wunba ki birisin na paak.”

<sup>24</sup> Jɔɔnn toomiinba na nba din ɲmat na poorpoe ki Yiisa ji piin ki boi niib buboit ki jiin Jɔɔnn man po a “Yaa daan saan Jɔɔnn peɲ muuk ni na, i daan dukii a i saa la bee? I daan mi a i saa la muuk nba ki wouɲ damm nae-e? <sup>25</sup> I mantik jia daan saan a i saa la bee? Nirɔ ki u lia taɲanti-i? Niib nba lia taɲant ki be bi yamani na be kpanbara ɲei nie. <sup>26</sup> Tɔn, wantin man nibooru



nba ki i daan saan muuk na ni a i saa la. I daan dukii a i saa la Yennu sokiniie-e? Barmõniie ki n beeri na, Jõonn ñarin gar sokiniwa. <sup>27</sup> U poe ki li sob Yennu gbouj ni a, ‘N saa tun n toomu ki wun liit a tõonn, ki ñamm a baaru sonu.’ ” <sup>28</sup> Ki Yiisa bia yetib a “N beerie, bi daa ki mi mar soo ki u chee Jõonn-i, ñaan wunba joont tarik Yennu naan ni chee Jõonn.”

<sup>29</sup> Ki niib kur nan lampogaarteeb din sak a Yennu ñan, kimaan bi din gbat Jõonn mõontii, ki te ki u wurib Yennu nyunwuru, <sup>30</sup> ñaan ki Farisiinba nan sennu wantteeb na ki gaar linba ki Yennu lor turib na, kimaan bi din ki sak Jõonn n wurib Yennu nyunwuru.

<sup>31</sup> Ki Yiisa bia yetib a “Yimm mõtana nigbouj na, n saa bikini nan bee na? N mi i taan tee niboorbee na? <sup>32</sup> I naan nan waas nba tuu tikir kar daak ni ki tian leeb paak nae a ‘Ti peeb yerii ki teeni, ñaan ki i ki waa. Ti mõ kpemõnii ki teeni, ñaan ki i ki fabini.’ <sup>33</sup> Yimm mõtana nigbouj na naan waas manje, kimaan Jõonn din baar ki ki di jemõnti, ki bia ki nyu daami, ki i yaa u waate; <sup>34</sup> ki min nisaarik Bik mun tan baar ki di ki nyu, ki i bia yaa ‘Gotir man, u tee podaano nan danyuuruko; ki bia tee lampogaarteeb nan biitdamm yock.’ <sup>35</sup> Tõn, binba gaar Yennu bannu nae want nan bannu manj tee barmõnii.”

### *Yiisa nba din be Farisiisõo ñaak bianjinba*

<sup>36</sup> Farisiisõo din be, ki tan yiin Yiisa a wun baar ki di jeet u ñaak ni; ki Yiisa saan joo manj ñaak, ki bi saa lakin kar ki dii. <sup>37</sup> Poosõo mun din be doo manj ni ki tee bonchonchon. Waa tan gbat a Yiisa di jeet ñaak manj ni na, ki u baar

nan salenḡann nba gbee nan tulaarii, <sup>38</sup> ki din set Yiisa poor po, u taapant boor, ḡaan mō; ki u ninnyuut baa Yiisa taapant paak ki tan matik; ki u jii u yut ki fiar Yiisa taapant, ki mōtir u taapant maḡ,† ki tan but tulaarii na li paak. <sup>39</sup> Ki Farisii nirō nba yiin Yiisa na nba la linba na, ki u dukin u par ni a “Jōō na-i tee Yennu sōkiniie nan barmōnii, u bo saa bann poo nba siinō na nba tee wunbawa. U bo saa bann nan u tee biitdaanōe.”

<sup>40</sup> ḡanne ki Yiisa yet Farisii maḡ a “Simonn, n mōk mōbonsiar ki yaa n beta.”

Ki Simonn jiin a, “Wanntōō, betirin.”

<sup>41</sup> Ki Yiisa yetō a “Jab banlee din be ki mōk lik-kpentitōō pann. Yenō din mōk u pann salimpeena kobii ḡanḡmu, ki lōō na mun mōk u pann salimpeena‡ piinḡmu. <sup>42</sup> Bi banlee maḡ sōō din ki fit pa. ḡanne ki u chab bi kura a bii saa. Tōn, a dukii nan ḡmee mantik sii loon lik-kpentitōō maḡi?”

<sup>43</sup> Ki Simonn jiin a, “N dukin nan li sii tee wunba pann yab ki u chabō nae.”

Ki Yiisa yetō a “A mōk mōnii,” <sup>44</sup> ki din jiant got poo na, ḡaan bet Simonn a, “A la poo na-a? N kōō a ḡaak nna, ki a ki turin nyun ki n wuur n taapant, ḡaan poo na ḡarin wuur n taapant nan u ninnyuut, ki bia jii u yut ki fiarin. <sup>45</sup> Fin ḡarin ki mōot n tankpinii,§ ḡaan ḡōō ḡarin ki nyik n taapantmōotu, maa baar yoo nbawa nan mōtana.

---

† **7:38** 7.38 Bi binbenḡ ni, waa mōtir u taapant na, li want lomm bonchiann. ‡ **7:41** 7.41 Salimpeenn din tee daar paauko.

§ **7:45** 7.45 Bi binbenḡ ni, bi din tee nnae ki want lomm.

<sup>46</sup> A bia ki soor n yut kpami,\* ñaan poo man bia jii tulaarii ki soor n taapanta. <sup>47</sup> N beerae, n nyik u biit nba yab ki chabowa, li paake ki u mantik loonin. Ñaan wunba ki n nyik chab u biit waaminna, u mun loonin waaminnae.”

<sup>48</sup> Ñanne Yiisa jiant ki yet poo na a “N nyik a biit ki chabawa.” <sup>49</sup> Ki niib nba kar ki di na ji piin boi bi leeb a “Wuya, ñmapoe saa fit nyik chab nirɔ biiti?”

<sup>50</sup> Ki Yiisa bet poo na a, “Faa teenin yada na, a la tinnuwa. Li paak, ii saa nan parmaasir.”

## 8

### *Poob nba din waa Yiisa na labaar*

<sup>1</sup> Li poorpoe ki Yiisa din lin digbansaakara ni nan digbanbis ni, ki moontir Yennu naan baaru po, ki u poorpoweiteeb piik nan banlee na waau.

<sup>2</sup> Poob nba ki u din nyinn narinbiit bi ni, ki bia te ki bi yiarii gbenn na mun din be leŋ man ki waau. Yenɔ din tee Meeri (wunba ki bi din yiu Magdaliinn na). Ñooe tee wunba ki Yiisa din nyinn narinbiit banlore u ni na; <sup>3</sup> ki leeb mun tee Chusa ñaapoo Joana (Chusa din tee Herod ñaatoontunna saakooe), nan Susaana, nan pooleeb bonchiann. Ki bi kur din jikit bi moŋ moŋ bona ki teen Yiisa, ki sommit ñoo nan u poorpoweiteeb na.

### *Tanburtɔɔ barjouk (Matiu 13.1-9; Mak 4.1-9)*

---

\* **7:46** 7.46 Bi din tuu moon kpame saamo yur paak, ki turo nyun wun wuur u taapant.

<sup>4</sup> Niib din nyi digbana ki baat Yiisa boor. Baa tan yabit yoo nba, ki Yiisa yimm barjouk a:

<sup>5</sup> “Jasoo din doo kpaab a wun bur tan. Waa din buur yoo nba, ki bonboorii na yenn-nba yat baa sonjouk ni; ki niib gaar nmaat li paak, ki noonii bia tokii ki di. <sup>6</sup> Ki leer mun baa tanpuut paak. Bonboorii man nba din tan pia yoo nba, ki li kpo, kimaan li din ki baa maatuk ni. <sup>7</sup> Ki leer mun baa kunkonii jiina ni, ki tan lakin pia ki kpaat namm, ki kunkonii na nmabirir. <sup>8</sup> Naaan ki leer mun baa tinjan ni, ki pia kpaat bonnann, ki tan nan nyik nyik nyik.”

Yiisa nba yimm barjouk man ki gbenn yoo nba, ki u yet a “Wunba mok tuba ki saa gbat, wun ghiint.”

*Barjokit yinu paak*

*(Matiu 13.10-17; Mak 4.10-12)*

<sup>9</sup> Li poorpoe ki u poorpoweiteeb na boio a “Barjouk na paaki-i?” <sup>10</sup> Ki u jiin a “Yimm narin, Yennu chab a yin bann woonin ni barii ki jiin u naan po, naan nilee narin, u yiimm barjokite, a bin got naan daa laati, ki bia ghiint, naan daa bant li paaki.”

*Tanburtoo barjouk na paak*

*(Matiu 13.18-23; Mak 4.13-20)*

<sup>11</sup> “Barjouk na paak tee nnae: Bonboorii nae tee Yennu maan. <sup>12</sup> Ki linba baa sonjouk ni na naan niib nba ki n maan koo bi tuba ni, naan ki Sintaanii baar ki nyinnir bi para ni, a bi ji daa tee-n yada ki laat tinnu na. <sup>13</sup> Ki linba mun baa tanpuut paak na naan binba gbat n maan nan parpeenn, naan ki li daa ki sik bi para ni

fanu, ki bi tuu teenin yada yoo waaminna, ñaan yoo nba ki jinjammii baarib, bi tuu yêt n weiuë.

<sup>14</sup> Ki linba mun baa kunkonii ni na ñaan binba gbat n maan mañ, ñaan binben na daamii nan məkint lomm nan nianbiiuk nba be tingbouñ na ni tuu nyakin maan mañ bi para ni, ki lin ñakit.

<sup>15</sup> Ki linba mun baa tinñan ni na ñarin naan nan popeendamm nba gbat n maan mañ, ki bi para ni be fanu, ki bi dia maan na kenken, ki bia mək sukuru, ki nan bonñann nae.

*Ki jün fitir po*

*(Mak 4.21-25)*

<sup>16</sup> “Soo kan joo fitir ñaan likin ñmañ li paaki, koo ki gurir gado louñ ni. See ki u jiiir toon bont nba dəkii paak, ki niib-i jiki koo yoo nba, bii laat yentu na. <sup>17</sup> Bariii nba kur woo, see ki li tan nyii paanu; ki linba mun liik, see ki li likit.

<sup>18</sup> “Li paak, ii mi man yaa gbiintir Yennu maan bianjinba. Tɔn, wunba gbat ki gaar bonñann, u saa ñamm gaar ki pukin, ñaan wunba ki gbiintir, u saa koñ linba ki u dukii a u mək nawa gbaa.”

*Yiisa waarii nan u naa labaar*

*(Matiu 12.46-50; Mak 3.31-35)*

<sup>19</sup> Li yoo na ki Yiisa waarii nan u naa baar, ñaan ki ki fit la sonu nba ki bi saa nakinɔ, kimaan niib din yabita. <sup>20</sup> Ki soo tan beto a “A naa nan a waarii be nanyer po ki loon bin la-a.”

<sup>21</sup> Nanne ki u yetib a “Binba gbia Yennu maan ki saak ki bia tuun li bian, ñamme tee n naa nan n waarii.”

*Wouñ nan nyun nba sak Yiisa mɔb bianjinba*

*(Matiu 8.23-27; Mak 4.35-41)*

<sup>22</sup> Dasiar ki Yiisa nan u poorpoweiteeb din koo burgbetir ni; ki u betib a, “Naant man ki tin poot mɔkgbenir na gbingbanleer po.” Ki bi piin saanu. <sup>23</sup> Baa saa yoo nba, ki Yiisa dɔɔr goon. Ki wonpaaruk tan fikit ki da mɔkgbenir man paak, ki nyunpana pir ki koo burgbetir na ni ki tan yaa lin gbee, ki bi ji koo ninboŋ ni. <sup>24</sup> Ki u poorpoweiteeb na baar ki fiinto ki yi a “Chanbaa, chanbaa, ti be kuun nie.” Ki u fiir ki tian wouŋ nan nyunpana na paak a bin ŋmin, ki li ji din maak ki ŋmin soon. <sup>25</sup> Ki u jiant boi u poorpoweiteeb na a, “I ki teenin yada-a?”

Ki janmaanii din soorib, ki li bia yaar litib, ki bi boi bi leeb a “Jaboor bee na? Ki u yeen ki wouŋ nan nyunpana saak u mɔbu.”

*Ki jiiŋ joo nba ki narinbiit din be u ni na po  
(Matiu 8.28-34; Mak 5.1-20)*

<sup>26</sup> Ki bi tan baar Gerasa tiŋ ni, ki set, ŋaan ki Galilii yent biar pootir po. <sup>27</sup> Yiisa nba nyii burgbetir ni na, ki Gerasa joo nba ki narinbiit be u ni na cheto. U din ki lia siar ki li yukir hei. U bia din ki saak kaar ŋaak ni, ŋaan dɔɔr kaat ni. <sup>28-29</sup> Yoo kur narinbiit man din tuu fiir u nie, ki u doo ni teeb tuu guu-u, ki baan u nii nan u taa jarit, ŋaan wun yan jarit na; ki narinbiit man beero ki kooŋto muuk. Waa din la Yiisa yoo nba, ki u yikin sanpaapowa, ŋaan gbaan Yiisa tɔɔnn ki tian yet a “Yiisa, wunba tee Yabint Yennu Bija, min nan fin, nlee mantiki? N barimae, a daa mukisirimi.” U din yet nna kimaan Yiisa poŋ yakii nan narinbiit naewa a wun nyi joo na ni.

<sup>30</sup> Ki Yiisa boio a, “A sanni-i?”

Ki u jiin a “N sann tee bure;” li paak tee narinbiit bonchianne be u ni. <sup>31</sup> Li yoo na ki narinbiit maŋ ji barin Yiisa a u daa te ki bi saa bootsunsuŋ na ni.

<sup>32</sup> Doorii bonchiann din be kunkonn na paak ki di; ki narinbiit na barin Yiisa a wun chabib ki bin saan koo doorii maŋ ni; ki Yiisa chabib sonu. <sup>33</sup> Nanne ki narinbiit na nyii joo na ni ki saan koo doorii na ni; ki doorii na kur tin burburbur, ki nyii kunkonn na paak, ki sik ki saa baa mokgbenjir na ni, ki dii nyun.

<sup>34</sup> Dookpaarii na nba din la linba teen maŋ, ki bi chiar li yoo na, ki saan moont li labaar, doo ni nan kpaant ni. <sup>35</sup> Ki niib baar a bin la linba tun na, ki baar Yiisa boor, ki soo joo nba ki narinbiit poŋ nyii u ni na kar Yiisa boor, ki mok laafia nan u dudukit kura fanu, ki ji lia tiat; ki janmaanii soor niib na. <sup>36</sup> Ki binba lar nan bi nunii na betib bianjinba ki Yiisa te ki joo na la laafia. <sup>37</sup> Nanne ki Gerasa tij ni niib kur baar Yiisa boor ki barimo a wun seet kii saa, kimaan janmaanii soorib hei.

Ki Yiisa ji koo burgbetir na ni a wun nmat poot; <sup>38</sup> naan waa din yaa wun nmat yoo nba na, ki joo nba ki narinbiit nyii u ni na barimo ki yeen a “Naant ki min nan fin n lakin saan.” Ki Yiisa te ki u nyik naan beto a, <sup>39</sup> “Ii nmat kii kun a njaak ni ki saa moont toonjaann nba ki Yennu tun ki tura na.”

Ki u nmat ki lin doo na kur po, ki moontir toonjaann nba ki Yiisa tun ki turo na.

*Jairus bonpobik baatuk labaar  
(Matiu 9.18-26; Mak 5.21-43)*

<sup>40</sup> Yoo nba ki Yiisa ηmat ki saa poot məkɓbenjir na, ki sɔɔ ki nibur tookito nan parpeenn, kimaan bi kur poŋ din guu u baarue. <sup>41</sup> Jasɔɔ din be leŋ ki bi yiu Jairus; ki u tee Yenjiantu diiuk saakɔɔ; ki u tan baar ki gbaan Yiisa tɔɔnn ki barimo a wun baar u ŋaak ni, <sup>42</sup> kimaan u bonpoyemmir nba tee bina piik nan ŋanlee nae yiar, ki per kuuma.

*Poosɔɔ nba sii Yiisa liatir ki la laafia bianjinba  
(Matiu 9.20-22; Mak 5.25-34)*

Ŋɔɔ nan Yiisa nba tok saa na ki nibur na mun waa u ki gbin muk ki tuto. <sup>43</sup> Ki poosɔɔ mun be leŋ, ki tee wunba siik fabouŋ ki tan jaŋ bina piik nan ŋanlee, ki din yat u bont kur ki tur tebbeb, ŋaan bi sɔɔ ki fit tebo ki u la laafia. <sup>44</sup> Ki u tan baar Yiisa poor po ki sii u liatir mɔgbann. Li taakpaak ni, ki u fabouŋ na ji jit. <sup>45</sup> Ki Yiisa boi a “Ŋmee siimi?” Ki sɔɔ kur nba be leŋ na yeen a “Min kaa, min kaa.” Ki Piita tan boio a “Chanbaa, a ki la niib nba muki-i?”

<sup>46</sup> Ŋaan ki Yiisa yet a “Sɔɔ siima, kimaan n bann nan paŋ nyii n niwa.” <sup>47</sup> Ŋanne ki poo na ji bann nan u kan fit bor u moŋ Yiisa boori, ki ji din nyii paanu ki jekir, ki tan gbaan Yiisa tɔɔnn, ŋaan yeto sɔɔ kur numm ni linba paak ki u siiu, nan bianjinba ki u la laafia yiama na. <sup>48</sup> Ki Yiisa beto a, “N niipoo, faa teenin yada na paake ki a la laafia. Ii saa nan parmaasir.”

*Yiisa nba fin bonpobik na kuun ni bianjinba  
(Matiu 9.23-26; Mak 5.35-43)*

<sup>49</sup> Yoo nba ki Yiisa daa din see ki piak na, ki toomu nyii saakɔɔ maŋ ŋaak ni ki baar yet a



“A bonpobik na taan kpowa; ki a ji daa bakint Wanntoo.”

<sup>50</sup> Naan ki Yiisa gbat nna ki jiant bet saakoo na a “Daa tiin janmaanii; teent yada kuukoo, ki u saa la laafia.”

<sup>51-53</sup> Yiisa nba baar koo naak man ni yoo nba, ki u la nibur be len ki bui kpemonii ki fabin bik man kuun paak. Ki Yiisa betib a “I daa mo man; bik na ki kpo kaa, u goonte.” Naan ki bi laau, kimaan bi mi nan bik na pon kpowa. Li yoo na ki u ki sak ki soo n weio ki koo kpediuk na ni, see Piita nan Joonn nan Jeems, ki pukin bik na baa nan u naa. <sup>54</sup> Yiisa din soor bik na nuue naan yiin a “N bik, fiit.” <sup>55-56</sup> Ki u manfoor jen, ki u fiir yama. Ki li ji bakit u baa nan u naa bonchiann. Ki Yiisa betib a bin tur bik na jeet ki wun di; naan bia kpaamm a bii mi ki bin bet soo linba tun na.

## 9

*Bianinba ki Yiisa tun u poorpoweiteeb piik nan banlee na*

*(Matiu 10.5-15; Mak 6.7-13)*

<sup>1</sup> Li poorpo ki Yiisa din tan yiin u poorpoweiteeb piik nan banlee na ki lakimm, ki turib yikoo nan pan nba ki bi sii nyint narinbiit kur, ki bia te ki baatib-ii laat laafia. <sup>2</sup> U din yetib a bin yat kii lin kii moontir Yennu naan po, ki bia te ki baatib-ii laat laafia, <sup>3</sup> ki bia betib a “I daa jikit siar ki saa nanni; i daa dia patii, koo miat-kora, koo jeet, koo likirii, koo liata nanlelee. <sup>4</sup> Naak nba ki i saa koo, yin biar len nan yaa tan saa nyi doo man ni. <sup>5</sup> Siaminba kur ki niib ki tooki nan parpeenni, ii nyii doo man ni ki pit i taapant ni

tant ki bir li doo ni, ki lin wannib nan bi mok biit.”

<sup>6</sup> Nanne ki u poorpoweiteeb na nyii lin digbanbis kur ni, ki moontir Yennu barnanii, ki bia te ki baatib laat laafia.

*Ki jiin Herod yanɲmatuk po*

*(Matiu 14.1-12; Mak 6.14-29)*

<sup>7</sup> Galilii batsaakoɔ Herod din tan gbat linba tun na kur, ki li ɲmat u yan, kimaan siab din yaa Joɔnn-e fiir kuun ni, <sup>8</sup> ki leeb yaa Yennu sokinii Elaija-e\* dookit, ki leeb mun yaa yaayoo ni sokiniinba yence fiir kuun ni. <sup>9</sup> Ki Herod yet a “N daan te ki bi pot Joɔnn yura, ɲaan ɲmee ki n gbia u po na muni?” Ki u ji din koor li yoo na a wun la Yiisa.

*Bianɲinba ki Yiisa dinn jab tusaa ɲanɲmu*

*(Matiu 14.13-21; Mak 6.30-44; Joɔnn 6.1-14)*

<sup>10</sup> Li poorpoe ki toomiinba† man tan jen ki bet Yiisa linba ki bi saan tun. Ki u ji jiiɓ ki bi saan dosau nba ki bi yi Bef-saida na, bi kuukoɔ.

<sup>11</sup> Nibur na nba din gbat nna man, ki bi wei Yiisa ki saan. Waa la ki bi baat yoo nba, ki u tookib nan parpeenn, ki wannib Yennu naan po, ki bia te binba yiar na la laafia.

<sup>12</sup> Yonnu nba din tan maakit yoo nba, ki u poorpoweiteeb piik nan banlee na baar u boor ki yeto a “Naant ki nibur na n saan digbanbis nan kpaant nba kpia na ni ki la jeet nan dindoɔboa, kimaan nna na tee muuk nie.” <sup>13</sup> Ki u jiin a, “I

---

\* **9:8** 9.8 Yennu din jii Elaija-e ki saan nana Yendouɲ ni. (2 Kpanbara 2.11) † **9:10** 9.10 Toomiinba man din tee u poorpoweiteeb piik nan banlee na.

mɔŋ n turib jeet ki bin di.” Ki bi yetɔ a “Ti ki mɔk siar ki pukin boroboro kuna ŋanŋmu nan janii ŋanlee po, nɔkira ki ti saan saa daa jeet ki tan dinn nibur na.” <sup>14</sup> (Jab nba din be leŋ na teen nan tusaa ŋanŋmu nawa.)

Ki u bet u poorpoweiteeb na a, “Ŋaant ki niib na n bɔkit kar piinŋmunŋmu.”

<sup>15</sup> Ki u poorpoweiteeb na te ki bi kur bɔkit kar paabu paabu. <sup>16</sup> Ki u jii boroboro kuna ŋanŋmu nan janii ŋanlee na, ki yaat got sanpaapo, ki tur Yennu niipoouk jeet na paak, ki ji ŋmit ŋmit ki tur u poorpoweiteeb na, a bii toor niib na. <sup>17</sup> Ki bi kur dii ki tan gboo. Ki u poorpoweiteeb na tikir jeet nba ki niib na dii ki tenn na, ki li gbee kpanchibit piik nan ŋanlee.

*Piita nba din pak barjaann nba ki jiin Yiisa po (Matiu 16.13-19; Mak 8.27-29)*

<sup>18</sup> Sianyoo Yiisa din mei Yennu u kuukɔɔ, ki u poorpoweiteeb tan baar u boor li yoo na; ki u boib a “Niib yaa n tee ŋmee?”

<sup>19</sup> Ki bi jiin a, “Siab yaa a tee Jɔɔnn nba din wuur niib Yennu nyunwuru nae, ki leeb yaa a tee Elaija-e,† ki siab mun yaa yaayoo ni sɔkiniinba yence fiir kuun ni.” <sup>20</sup> Ki u boib a “Ki yimm ŋarin yaa n tee ŋmee?”

Ki Piita jiinɔ a, “Fine tee Masia, wunba ki Yennu gann na.”

*Yiisa nba din pak u biak dinu po bianjinba (Matiu 16.20-28; Mak 8.30-9.1)*

---

† **9:19** 9.19 Elaija tee Yennu sokinii nba din be yaayoo ni.

<sup>21</sup> Nanne ki Yiisa kpaamm nan ninmɔnn a bi daa beer sɔɔ labaar maɲi, <sup>22</sup> ki bia yetib a “Li kpaa talas nan min nisaarik Bik n di biak bonchiann; ki ti tiɲ ni saakab nan Yennu mannteeb yudamm nan sennu wannteeb saa yêtin, ki bia kpima, ɲaan li daa ɲantaa daar, Yennu saa fiinin kuun ni.”

<sup>23</sup> Nanne ki u yet bi kur a “Wunba-i loon wun wein, see ki u likin u saanmaɲ ki jii u kuun dapunpunn daar kur kii waa-n. <sup>24</sup> Wunba ki sak wun jii u manfoor ki turin, ɲɔɔe tan saa kɔɲ u manfoor, ɲaan wunba likin u saanmaɲ n paak, ɲɔɔe tan saa la u manfoor nan barmɔnii. <sup>25</sup> Nirɔ-i la tingbouɲ na mɔkint kur, ɲaan biir u mɔɲ binbenɲ ki kɔɲ u manfoor, nyɔlannpoe ki u saa la? <sup>26</sup> Wunba tiin fei ki jiin min nan n wannu na po, min nisaarik Bik-i taɲi jen nan n yentsaakar, nan n Baa Yennu nan u malakanba yentsaakar, li yoo maɲ n tan saa tin fei nan man jii li daanɔ ki pukin n niib niwa. <sup>27</sup> Barmɔniie ki n beeri na, siab be nna ki kan kpo see ki bi tan la Yennu naan baaru yoo.”

*Yiisa gbanant lebitu labaar  
(Matiu 17.1-8; Mak 9.2-8)*

<sup>28</sup> Waa din pak nna poorpoe, ki li teen nan daa ɲanniin na, ki u jii Piita nan Jɔɔnn nan Jeems, ki doo namm kunkonn paak a wun saa miar Yennu. <sup>29</sup> Waa din mei Yennu na ki u numm po tan kpint, ki u tiat penn ki nyirik. <sup>30-31</sup> Li yoo na ki jab banlee nna lekit leɲ, ki bi tiat nan bi gbanant nyirii. Jab maɲ din tee Moses nan Elaija-e, ki bi piak nan Yiisa ki jiin u kuun po, nan

bianjinba ki u saa kpo Jerusalem ki gbeen Yennu loomm na. <sup>32</sup> Naan goon din soor Piita nan u leeb na bonchiann, ki bi goon ki tan yerik, ki la ki yentsaakar yent ki lint Yiisa, ki bia la jab banlee nba see u boor na. <sup>33</sup> Jab man nba din tan nyikit Yiisa na, ki Piita yeto a “Chanbaa, li nan nan taa be nna na. Ti saa faa lanbont nantaae, ki yenn-ii tee a yar, ki leer-ii tee Moses yar, ki leer mun-ii tee Elaija yar.” Piita nba din pak linba man, u kpan din gbia u pake.

<sup>34</sup> Waa din daa piak nna man, ki sanpagbouŋ dokit ki piimm, ki janmaanii soor noo nan u leeb na nan sanpagbouŋ nba dokit ki piimm na. <sup>35</sup> Ki bi gbat kunkor sanpagbouŋ na ni, ki li yet a “N Bija nba ki n gannoe na. Gbiintir u mob man.” <sup>36</sup> Kunkor na nba din pak gbenn yoo nba, ki bi ji la Yiisa kooe biar see. Ki bi ji din biar nmin ki jiin baa la linba na po, ki ki kumii soo labaar man, ki li yoo tan gar.

*Yiisa nba nyinn narinbiiuk naasinbik ni bianjinba*

*(Matiu 17.14-18; Mak 9.14-27)*

<sup>37</sup> Li din tan yent ki Yiisa nan u poorpoweiteeb bantaa na nyii kunkonn na paak ki sik, ki nibur tooko. <sup>38</sup> Jasoo din be nibur na ni, ki tian yiin Yiisa a “Wanntoo, n barimae, tan gotir n bija na; kimaan nooe kpan tee n biyemmir, <sup>39</sup> ki narinbiiuk tuu fiir u ni ki te wun yikin ki baa gbitgbiir ki tabit, ki mosankunkouŋ nyi u mob ni, ki li nammit fi u ni ki gbiau, ki tuu tan bariko waamina, naan ki ki nyikito. <sup>40</sup> Ki n barin a

poorpoweiteeb a bin nyinn narinbiiuk na, n̄aan ki bi gbar.”

<sup>41</sup> Ki Yiisa yetib a “Yimm m̄otana niib nba kaa yada, ki bia ki waa Yennu fanu na, n saa yukir nani nlee ki di sukuru nani mantiki?” U bia din bet j̄oo maŋ a “Baat nan a bija maŋ.”

<sup>42</sup> Ki bik na nba baat Yiisa boor yoo nba, ki narinbiiuk na libiro nan tiŋ gbakit, ki u d̄oo tabit. Li yoo maŋe ki Yiisa tian narinbiiuk na paak, ki te ki bik na la laafia, ki u j̄iuu ki tur u baa.

<sup>43</sup> N̄anne ki li yaar lit niib na kur nan Yennu paŋ nba yab bianjinba.

*Yiisa nba n̄amm pak u kuun po bianjinba  
(Matiu 17.22-23; Mak 9.30-32)*

Li daa din bakit nibur nae nan waa tuun linba kur na, ki Yiisa n̄mat bet u poorpoweiteeb na a, <sup>44</sup> “Lootir i tuba man ki gbat linba ki n yaa n paki na fanu. Bi tan saa j̄ii min nisaarik Bik ki kubin niib nuu ni.” <sup>45</sup> N̄aan bi lek din ki bann li paaki, kimaan Yennu d̄okin bi yame a bi daa banti; ki bi bia tiin jaŋmaanii nan bin boio li maan paak.

*N̄mee tee nijaanni?  
(Matiu 18.1-5; Mak 9.33-37)*

<sup>46</sup> Li poorpoe ki m̄oniok tan baar u poorpoweiteeb na sinsuuk ni, ki bi noi ki yaa, “N̄mee tee nijaann ti sinsuuk ni na?” <sup>47</sup> Ki Yiisa bann baa dukii bianjinba. N̄anne ki u j̄ii bik nna ki senn u numm ni, <sup>48</sup> n̄aan betib a “Wunba gaar bik nba na n sann paak, u gaar mine; ki wunba mun sak ki gaarin, u gaar wunba tumin nae mun. Ki wunba mun tee tarik i ni, n̄ooe tee nijaann ki gar i kura.”

*Wunba ki kɔn nan Yiisa, u see u poore  
(Mak 9.38-40)*

<sup>49</sup> Nanne ki Jɔɔnn betɔ a “Chanbaa, ti daan la jasɔɔ ki u taan a sann ki nyint narinbiit niib ni, ki ti betɔ a wun nyik, kimaan u ki tee ti ni yeno.”

<sup>50</sup> Ki Yiisa yet a, “I daa beerɔ mani, kimaan wunba kur ki kɔn nani, u see i poore.”

*Samaria digbanbik niib nba yêt Yiisa bianjinba*

<sup>51</sup> Tɔn, yoo nba din tan per nan Yiisa n do Yendɔun ni na, ki u faa par ki soor sɔnu a wun saan Jerusalem, <sup>52</sup> ŋaan tur mɔb a bin gar ki saa yet a u be sɔnu, ki bin teen siir ki sɔɔ ki u baar, ki bi dɔŋ gar ki saa baar Samaria teeb digbanbik nna ni; <sup>53</sup> ki leŋ niib na ki sak u baaru manj, kimaan bi din mi nan u saa Jerusalem-e. § <sup>54</sup> Ki u poorpoweiteeb Jeems nan Jɔɔnn nba gbat nna manj, ki bi boio a “Ti Yomdaano, a loon ki ti te ki muu n nyi sanpaapo ki sik di biiribi-i?”

<sup>55</sup> Ki Yiisa jiant ki gaar jat bi paak. <sup>56</sup> Ki ŋɔɔ nan u poorpoweiteeb saan digbanleer ni.

*Binba loon bin wei Yiisa na labaar  
(Matu 8.19-22)*

<sup>57</sup> Yoo nba ki bi din saa na ki jasɔɔ tan yet Yiisa a “N saa weia siaminba kur ki a saa.”

<sup>58</sup> Ki Yiisa yetɔ a “Lunlona mɔk forii, ki nɔɔnii mun bia mɔk tiat, ŋaan min nisaarik Bik ki mɔk dindɔboori.”

<sup>59</sup> Ki u tan yet jalɔɔ a “Ii waa-n.” Ki jɔɔ manj betɔ a “N Yomdaano, ŋaant ki n saan ki pii n baa sinsinna.”

---

§ 9:53 9.53 Samaria teeb din ki loon Jerusalem teebi.

<sup>60</sup> Ki Yiisa beto a, “N̄aant ki kpeemm-i-i\* pii bi kpeenleeb. Fin, ii saawa kii sakii moontir Yennu naan po kii teen niib.”

<sup>61</sup> Ki loo mun yeto a “N Yomdaano, n saa weiawa, n̄aan n̄aant ki n kun ki saa chab n n̄aateeb sinsinna ki lian weia.”

<sup>62</sup> Ki Yiisa beto a “Soo kan fit dia naasok ki ko n̄aan gorii poor po. Li-i tee wunba gorii nna man, u ki n̄an wun teen Yennu naan na toontunno.”

## 10

### *Yiisaweira piinlore nan banlee tumu labaar*

<sup>1</sup> Li poorpoe ki ti Yomdaano n̄amm gann jaleeb piinlore nan banlee ki yaa wun tumm banlee-lee ki bin doŋ gar doi ni, siaminba po kur ki u saa baar. <sup>2</sup> N̄anne ki u betib a “Dii na beer yaba, n̄aan ki dijaara waar. Li paak, ii mei man dii na daano ki wun n̄amm pukin dijaara, ki te bin jaan dii\* man. <sup>3</sup> Ii saa man. N tuumiie, ki i sii tee nan pebis na kinkata sinsuuk ni. <sup>4</sup> N̄aan i daa jikit likboorii koo miat-n̄manii koo taasaati. I bia daa see sonu ni ki foont soo. <sup>5</sup> N̄aan n̄aak nbae ni ki i saa koo, yin doŋ yet a ‘Parmaasir-ii be n̄aak na niib paak.’ <sup>6</sup> Ki n̄adaano man-i loon parmaasir, u saa gaarir. Li-i kii tee nna, parmaasir man bia saa jen i paaka. <sup>7</sup> Li-i tee ki i koo n̄aak nbae ni, ii be leŋ kii di kii nyu linba ki bi teeni, kimaan toontunno n̄an ki wun gaar u paauko. I daa lin loon nei ki doo. <sup>8</sup> Li-i tee ki i baar doo nbae ni

---

\* **9:60** 9.60 Kpeemm tee binba ki waa Yiisa nae. \* **10:2** 10.2 Dii na tee niib nba saa teen Yiisa yada, n̄aan daa ki miu nae.



ki bi tooki nan parpeenn, ki turi jeet nba, yin di;  
<sup>9</sup> njaan bia te ki baatib-ii laat laafia doo maŋ ni,  
 kii beer niib maŋ a ‘Yennu naan nakiniiwa.’ <sup>10</sup> Li-  
 i tee ki i baar doo nbae ni, ki niib na ki gaari, yin  
 nyi set sɔnii ni njaan kii yeen a <sup>11</sup> ‘Ti taapant nba  
 tab i doo na tanbiinii nba na, ti pit njanne ki lubin  
 ki chabiti. Ii mi man nan Yennu naan poŋ baar ki  
 nakiniiwa.’ <sup>12</sup> N beerie nan buut daar, doo maŋ  
 niib tubdatu tan saa gar Sodom teeb yara.”

*Ki jiin binba ki nyik bi toonbiit na po  
 (Matiu 11.20-24)*

<sup>13</sup> “Li sii bi yimm Korasinn teeb paak; li sii  
 bi yimm Bef-saida teeb mun yaa paak; kimaan  
 mi-i bonni tun bakitnaun toonjaana Taya nan  
 Sidonn doi ni nan maa daan tun i doi ni na, bi  
 bo saa nyik bi toonbiite yiama, ki lia soot nba tee  
 bonsisiok, ki puk bi moŋ tanpent, a lin wann nan  
 bi nyik bi toonbiit tumue. <sup>14</sup> Daar nba ki Yennu  
 tan saa bu niib buut na, i tubdatu saa gar Taya  
 nan Sidonn teeb yarawa. <sup>15</sup> Yimm Kapenaum  
 teeb, Yennu saa donni sanpaapowa-a? Aaii, u tan  
 saa sikini kpeen tiŋe.”

<sup>16</sup> Li yoo na ki u bet u poorpoweiteeb a “Wunba  
 gbia i maan, u gbia n maame; njaan wunba yêti,  
 u yêt mine; ki wunba yêt min, u yêt Yennu nba  
 tumin nae mun biak.”

*Yiisaweira piinlore nan banlee na jenu*

<sup>17</sup> Njanne ki Yiisaweira piinlore nan banlee na  
 din tan jen nan parpeenn ki beto a “Ti Yomdaano,  
 a sann paŋ nie ki narinbiit gbaa saak ti moi.”

<sup>18</sup> Ki u betib a “N la Sintaanii nyii sanpaapo  
 nan sanyikintii na ki tan baa. <sup>19</sup> Gbiintir man,

n ponj turi yiikoo nba ki i sii ηmaat wai nan nani, kii nyant i dataak Sintaanii panj kur; ki siar kan teeni. <sup>20</sup> Naan i daa mək parpeenn nan narinbiit nba saak i moi na kuukoo paak kaa, ηaan kii biaki mək parpeenn nan baa ponj sob i sana Yendouj ni na.”

*Yiisa nba la parpeenn bianjinba  
(Matiu 11.25-27; 13.16-17)*

<sup>21</sup> Li yoo manj ki Yennu Seyeen te ki Yiisa mək parpeenn hei, ki ji yet a “N Baa Yennu, wunba tee sanpaapo nan tingbouj na Yomdaano, n piaka, kimaan a bor labaar manj subindamm nan banteeb, ηaan fiit wann waase; nnae ki a loon ki tun.” <sup>22</sup> Ki Yiisa ηamm yet a “N Baa Yennu-e wannin barii na kura; ki soo ki mi maa tee wunba see n Baa manj, ηaan soo mun bia ki mi n Baa manj nba tee wunba, see min u Bija na, nan binba ki n loon ki n fiit wannib na.”

<sup>23</sup> Li yoo na ki Yiisa ji ηmat got u poorpoweit-eeb ηaan bor betib a, “Parpeenn tee i yare nan yaa laat linba na. <sup>24</sup> N beerie nan Yennu sokiniinba nan kpanbara bonchiann din loon bin la linba ki i laat na, ηaan ki la, ki bia din loon bin gbat labaar nba ki i gbia na, ηaan ki gbati.”

*Ki jiin Samaria burchimo na po*

<sup>25</sup> Sennu wantosoo din fiir set ki loon wun bikin Yiisa, ki boio a “Wantoo, n saa teen nlee ki la manfoor nba kaa gbennu?” <sup>26</sup> Ki Yiisa ηmat boio a “Li sob nlee Yennu sennu gbouj ni? A karin ki laat nlee?”

<sup>27</sup> Ki joo na jiin a “Ii loon a Yomdaano Yennu; kii mantik kii loono nan a par kur, kii bia kii

loonɔ nan a seek kur, nan a paŋ kur, nan a dudukit kur, kii bia kii loon a loo nan faa loon a moŋ bianjinba na.”

<sup>28</sup> Ki Yiisa yeto a “A jiinu na ŋan. Ii tuun nna ki tan la manfoor maŋ.”

<sup>29</sup> Ŋaan ki sennu wanttoɔ na lek loon wun wann nan u ki mok biit ki jiin sennu na po, ki boi Yiisa a “Ton, ki ŋmee tee n loo?”

<sup>30</sup> Ki Yiisa jiino a, “Jasoo din nyii Jerusalem ki siik Jeriko; ki fat-teeb tan pikino ki liat u tiat ki fat, ki boou bonchiann, ki tan tenn u kuun darik darik nna, ŋaan nyiko. <sup>31</sup> Li poor po ki Yennu manntoo nna mun tok li sonu ki siik, ki tan la joo na doo, ki u lok gar ŋaan nyiko. <sup>32</sup> Ŋanne na biak, ki Liifai jasoo mun baat ki tan la joo maŋ ki bia lok gar ŋaan nyiko. <sup>33</sup> Ki Samaria jasoo mun tok li sonu ki baat, ki tan dokit joo maŋ paak. Waa lau yoo nba, ki ninbaauk sooro bonchiann, <sup>34</sup> ki u baar ki jii kpan nan daan† ki baŋ u fiat na ŋaan fin tana, ki jiiu paan u boŋ paak, ki saan nana saamm ŋaak ni ki saa goto. <sup>35</sup> Laa tan yent yoo nba, ki u jii salimpeena‡ ŋanlee ki tur wunba gorii saamm ŋaak na, ŋaan beto a, ‘Ii gorii joo na, ki mi-i tanji jen daar nba, n saa pa-a linba ki a dinno ki pukin na paak.’ ”

<sup>36</sup> Yiisa nba pak nna ki gbenn, ki u boi sennu wanttoɔ na a “Jab bantaa na ni, ŋmee want nan u tee wunba ki fat-teeb fato na loo? A dukii nlee?”

<sup>37</sup> Ki u jiin a “Wunba tino ninbaauk na.”

---

† **10:34** 10.34 Bi din dia tilɔnae ki tee daan. ‡ **10:35** 10.35 Salimpeena ŋanlee din tee daa ŋanlee paauko.

Ki Yiisa yeto a “Ton, ii saa kii tuun li bian mun.”

*Yiisa nba din gon Maata nan Meeri bianinba*

<sup>38</sup> Li poorpoe ki Yiisa nan u poorpoweiteeb din saa bi sonu, ki saa baar digbanbik nna ni; ki pooso be lej ki bi yiu Maata, ki u gaar Yiisa nan parpeenn u njaak ni. <sup>39</sup> U din mok u niipowaarik, ki u sann tee Meeri; ki Meeri man baar ki tan kar tinj ni, ki nakin Yiisa taa po ki gbiintir u maan. <sup>40</sup> Njan ki Maata mun gbaa nan saauj kur kur, ki tan baar bet Yiisa a “N Yomdaano, maa gbaa nan saauj, n kuukoo, njan ki n naa bik na ki sommitin na, a baka kaa li po-o? Betiro ki wun baar ki tan sommin.”

<sup>41</sup> Ki Yiisa jiino a “Maata, n mi nan a gbaa nan bona bonchiann, ki li mukisa ki biir a par, <sup>42</sup> njan bonyennkooe kpaa talas. Meeri narin gann linba nane, ki soo kan nyinnir u ni.”

## 11

*Ki jin Yenmiaru po*

*(Matu 6.9-13; 7.7-11)*

<sup>1</sup> Yiisa din be siarpo ki mei Yennu. Waa miar gbenn yoo nba, ki u poorpoweiteeb yeno tan beto a, “Ti Yomdaano, wantit taa sii mei Yennu bianinba, nan Jonn nba din wann u poorpoweiteeb na.”

<sup>2</sup> Ki Yiisa betib a “Yaa sii mei Yennu bianinbae na:

Ti Baa, njan ki a sann n la baakir.

Njan ki a naan n baar.

<sup>3</sup> Luunt dinna mann.

<sup>4</sup> Nyikin chab ti biit nan taa mun nyikit ki chabit binba tuumit biit bianinba na.

A daa te ki ti koo jinjammii ni.”

<sup>5-7</sup> Li yoo manj ki Yiisa bia betib a “Li-i tee ki saamɔ baar a ɲaak ni nyioɔk, ki a ki mɔk jeet ki saa turo, ɲaan ki a mun mɔk a yook ki saan u ɲaak ni tansuunii na, ki beto a wun kpenta boroboro kuna ɲantaa, a ki saamɔ baar a ɲaak ni; a yook sii be u diiuk ni ɲaan beta a ‘Daa mukisimi; n ponj kpar ganna; min nan n waas bia doora; n kan fit fiir turani.’ <sup>8</sup> Barmɔnii, u kan sak fiir ki tura jeet manj, a faa tee u yook na paaki; ɲaan li-i tee ki a ki tiin fei ki bia meio, see ki u tan tat fiir ki tura bianjinba ki a loon.

<sup>9</sup> “Li paak, n beerie, miat Yennu man, ki u saa turi; lomin man, ki i saa lawa; kpaan gann man, ki u saa loot ki turi; <sup>10</sup> kimaan wunba kur mei Yennu, u gaane; ki wunba mun loon, u laate; ki wunba kpaan gann, bi lootir teeno. <sup>11</sup> Yimm baanba, i ɲmee ki u bija saa miarɔ janj ki wun jii waauk ki turo? <sup>12</sup> koo ɲmee ki u saa miarɔ jenn ki wun jii nanj ki turo? <sup>13</sup> Ki li-i tee yimm nba tee biitdamm na mi bianjinba ki i saa tur i waas bonɲana, i Baa Yennu nba be sanpaapo na mantik kan jii u Seyeej manj ki tur binba meio li po na-a?”

*Yiisa nan narinbiit bat Beelsebul labaar  
(Matiu 12.22-30; Mak 3.20-27)*

<sup>14</sup> Ton, joo nba ki narinbiiuk teeno muuk na din be lej. Ki Yiisa nyinn narinbiiuk manj joo na ni; ki u muut, ki ji fit piak. Ki li bakit nibur na bonchiann. <sup>15</sup> ɲaan ki yemm din yet a “Narinbiit

bat Beelsebul-e\* teen Yiisa yiikoo a wuu nyint narinbiit niib ni.”

<sup>16</sup> Naan ki siab mun din loon bin bikin Yiisa, ki yaa wun tun nyinn ki lin wann nan Yennu set mi u po. <sup>17</sup> Ki Yiisa bann baa dukii linba, ki betib a “Naan niib-i ηmat ki kɔn tookit bi leebi, bi naan maŋ saa biira; ki ηaak niib-i munii ηmat kɔn nan leebi, li kan seti. <sup>18</sup> Nnae mun biak, li-i tee ki Sintaanii yent bokitir u mɔŋ ki kɔn nan leeb, nlee ki li saa seti? <sup>19</sup> I yaa Beelsebul-e teenin yiikoo a mii nyint narinbiit niib ni; ki yimm muni, ηmee chab i niib a bii nyint narinbiiti? I mɔŋ niib maŋ toonae want nan i ki mɔk mɔnii. <sup>20</sup> Tɔn, min ηarin, Yennu paŋ nie ki n nyint narinbiit niib ni; ηanne mun bia want nan Yennu naan poŋ baar i boor niwa.

*Yiisa paŋ nba gar Sintaanii yar bianjinba*

<sup>21</sup> “Jawakitir† nba teen siir nan u jatiat ki guu u ηaak, soɔ kan fit fat u siari, <sup>22</sup> ηaan u paaro mun-i taŋi pikino ki paako, u saa fat u jatiat nba ki u maa li paak nae, ki bia jii u mɔkint na ki tor niib.

<sup>23</sup> “Wunba ki see n poor, u kɔn nanime; ki wunba mun ki tikii niib ki teenimi, u yatibe.

*Narinbiiuk nba tuu jen koo niro ni bianjinba  
(Matu 12.43-45)*

<sup>24</sup> “Li-i tee ki narinbiiuk tan nyii niro ni, u tuu yeeke ki lin kunkoouk paak, ki loon foon boor, ηaan ki ki laati; li paak, u tuu tan yet u mɔŋe a ‘N saa ηmat saan ηaak nba ki n

\* **11:15** 11.15 Sintaanii sanleere din tee Beelsebul. † **11:21** 11.21 Jawakitir na tee Sintaaniie.

daan nyii na nie;’ <sup>25</sup> wu ji kii ηmat baar, wun la ki bi piar ki ηamma, <sup>26</sup> u tuu ηmat nyie ki saa yiin narinbileeb banlore nba bi ki cheeu, ki baar namm, ki bin kɔɔ ki lakin be; ki nirɔ maŋ binbenj sii bi bonchiann ki gar waa tuu be sinsinn bianjinba na.”

*Ki jiin barmɔnii parpeenn po*

<sup>27</sup> Yiisa nba pak nna maŋ, ki poosɔɔ be nibur na ni ki yet sanpaapowa a “Poo nba mara ki mɔɔna na, parpeenn tee u yare.” <sup>28</sup> Ki Yiisa jiino a, “Binba gbia Yennu maan ki saakir na, ηamme ki parpeenn tee bi yar.”

*Ki jiin binba loon bin la nyinn na po  
(Matiu 12.38-42)*

<sup>29</sup> Nibur nba din gbin Yiisa boor yoo nba na, ki u yetib a “Mɔtana nigbouŋ na tee biitdamme, kimaan bi loon bin la nyinn, ηaan n kan mi wannib nyinsiari; Jona nyinbooru na kuukɔɔe ki n saa wannib. <sup>30</sup> Bianjinba ki Jona din tee nyinn ki kpaan Ninefe teeb na, li bianje mun ki min nisaarik Bik saa teen nyinn ki kpaan mɔtana nigbouŋ na. <sup>31</sup> Buut daar, poobat nba din nyii diitu po na tan saa set wann nan mɔtana nigbouŋ na mɔk biit, kimaan u din nyii digbanbanfɔkirewa ki tan baar a wun gbiint Bat Solomonn yanfoon na pinpauk; ki gotir mani, wunba chee Solomonn be nna. <sup>32</sup> Buut daar, Ninefe teeb tan saa set wann nan mɔtana nigbouŋ na mɔk biit, kimaan Jona nba din mɔɔnt Yennu maan ki turib na, bi din nyik bi biite; ki gotir mani, wunba chee Jona be nna.”

*Gbanant yentu labaar*  
(*Matiu 5.15; 6.22-23*)

<sup>33</sup> “Soo kan joo fitir n̄aan jii ki teen woonin ni, koo ki likin n̄man̄ li paaki. See ki u jiir ki t̄oon bont nba dokii paak ki lin yent, ki niib-i jiki koo yoo nba, bii laat yentu na. <sup>34</sup> A ninbinae tee a gbanant fitir; a ninbina-i n̄ani, a gbanant kur sii m̄ok yentue; n̄aan a ninbina-i kii n̄ani, a gbanant kur sii be bunb̄onn nie. <sup>35</sup> Ii mi man ki yentu nba be i ni na daa tee bunb̄onni. <sup>36</sup> T̄on, a gbanant kur-i yeen bon̄nann ki siar po ki b̄oni, li sii yeene ki nyirii pirpirpir, ki naan fitir nba yeen ki teena yeen̄anu na.”

*Yiisa nba din pak biir Farisiinba nan sennu wannteeb bian̄inba*  
(*Matiu 23.1-36; Mak 12.38-40*)

<sup>37</sup> Yoo nba ki Yiisa pak gbenn na, ki Farisiisoo beto a wun weio ki bin saa di jeet. Ki u din wei saan ki saa koo kar a wun di. <sup>38</sup> Ki li teen Farisii niro na bakitnaū nan Yiisa nba ki nit n̄aan yaa wun di man̄. <sup>39</sup> Ki ti Yomdaano man̄ yeto a “Yimm Farisiinba, i sokii n̄manii nan senii poorpo kuukooe; n̄aan ki i para ni gbee nan fatu nan bonbiir. <sup>40</sup> Yimm jatit na! Yennu nba din nan nanyer po na, n̄oo kaa din nan n̄ook ni-i?†  
<sup>41</sup> Turin talasdamm linba be i n̄manii ni nan i senii ni, ki i nanyer po nan i n̄ook ni kur sii yeen.

<sup>42</sup> “Yimm Farisiinba, li sii bi turi. I jikit baarii nan nanjoi nan li bonlia piik n̄ook ni yennkoo, ki teen Yennu, n̄aan bakin buut bunu nba took,

---

† **11:40** 11.40 Li paak tee: Yennu mi niro nanyer po nan u n̄ook ni biak.



ki bia ki loon Yennu. Linba na nbae ɲan ki yii tuun, ki daa nyikit li yenn-nba tumu.

<sup>43</sup> “Yimm Farisiinba, li sii bi turi, kimaan i loon nijaana kaanii boa Yenjiantu diit ni, ki bia loon niib-ii foonti baakir foontii dai ni. <sup>44</sup> Li sii bi turi. I tee nan kaat nba ki niib tuu somm li paak ɲaan ki laatir nae.”

<sup>45</sup> ɲanne ki sennu wantɔyeno beto a, “Wantɔɔ, faa yet nna na, ɲann a sukiite na mun.” <sup>46</sup> Ki Yiisa yeto a “Yimm sennu wantteeb, li sii bi turi mun, kimaan i jint niib jik-kpiata nba paar nan bin jii, ɲaan i moɲ ki saak ki siin jika maɲ kii sommitibi. <sup>47</sup> Li sii bi turi, kimaan i maa sokiniinba kaat ki sent bonɲann; ɲamm maɲe tee sokiniinba nba ki i yeejamm din kpiib na. § <sup>48</sup> Yaa tuun nna na, ɲanne want niib nan i set sak i yeejamm nba din tun bianɲinba nawa. ɲamme din kpii sokiniinba maɲ, ɲaan ki i mun saan ki maa bi kaat na. <sup>49</sup> Li paak, ki Yandaano Yennu yet a ‘N saa tun sokiniinba nan toomiinba bi boor; ki bi saa kpi siab ɲaan mukis leeb,’ <sup>50</sup> a motana nigbouɲ n tan la tubdatu sokiniinba kur kpinu na paak. Kpinu maɲ din piin durinya namu yooewa, <sup>51</sup> baa din kpii Abel yoo nba na, ki tan tuu Sekaria kpinu, wunba ki bi din kpiiu Yennu maruɲ binbintir nan jiantu ɲasaakak sinsuuk ni na. N beeri barmoniie, motana nigbouɲ na tan saa la tubdatu sokiniinba kur kpinu na paaka.

<sup>52</sup> “Yimm sennu wantteeb, li sii bi turi, kimaan i dokin Yennu maan, a niib daa bant li paak. I

---

§ 11:47 11.47 Bi moɲ din ki sak sokiniinba maɲ wanneru.

mən yêṭ li bannue, ki bia dək binba koor a bin bannir na.”

<sup>53</sup> Yiisa nba seet leŋ na, ki sennu wannteeb nan Farisiinba wutoa ji doo bonchiann, ki bi ji piin boio bubeit ki jiin labaar bonchiann po, <sup>54</sup> ki lek koor a bin la u məbonkpetir ki fit biirɔ.

## 12

### *Kpinkpannii damm labaar*

*(Matiu 10.26-27)*

<sup>1</sup> Li yoo maŋ ki niib tusaa tusaa din lakin leeb ki muk, ki tan ŋmaat leeb taagbina, ki Yiisa din pak nan u poorpoweiteeb sinsinn ki yaa, “Ti mi man Farisiinba binbeŋ po, kimaan bi tee kpinkpannii damme. <sup>2</sup> Barsai kaa ki dɔɔk ki tan kan nyi paanu; siar mun ki be woonin ni ki bi tan kan banniri. <sup>3</sup> Li paak, labaar nba ki i pak woonin ni, ŋaan see ki li tan nyii paanu; linba ki i lek ləkin diit ni gbaa, ŋaan li tan saa woot ki nyiwa.”

### *Ti saa tin ŋmee jaŋmaanii?*

*(Matiu 10.28-31)*

<sup>4</sup> “N yɔɔsnba, gbiintir, i daa tiin niib jaŋmaanii man, kimaan bi saa fit kpi i gbanant kuukɔɔe; ŋaan i kuun poorpo bi ji kan fit teeni siari. <sup>5</sup> N yaa n wannu wunba ki i sii tiinɔe. Tinin Yennu, wunba saa fit kpi ki bia mək yiikoo nba saa lui muu nba kan mi kpeen na ni. N beerie, tinin ŋɔɔe man.”

<sup>6</sup> “Bi kɔi jinjera banŋmu kobu kuukɔɔe, ŋaan Yennu ki mi tamm bi yenɔkɔɔ po. <sup>7</sup> Yennu mi i yura paak yut kann gbaa. Li paak, i daa tiin

janmaanii, kimaan i mək nyoot ki gar jinjera bonchiann.

*I nyint a mən paanu nan a tee Yiisaweirə  
(Matiu 10.32-33; 12.32; 10.19-20)*

<sup>8</sup> “Wunba nyint u mən paanu niib boor nan u tee n weirə, min nisaarik Bik mun tan saa nyinnə paanu Yennu malakanba boor, <sup>9</sup> njan wunba yaa u ki tee n weirə, niib ni, min nisaarik Bik mun tan saa yet a n ki miu, Yennu malakanba boor.

<sup>10</sup> “Wunba pak məbonn ki biir min nisaarik Bik, Yennu saa fit nyik chabə; njan wunba sukii Yennu Seyeen, Yennu kan nyik chab li daanə.

<sup>11</sup> “Bi-i soori ki baar nani Yenjiantu diit ni, koo kpanbara boor, koo tin yudamm boor, i daa te ki li daamii-i nan yaa saa pak jiin bianinba, koo yaa saa pak linba, <sup>12</sup> kimaan li yooe ki Yennu Seyeen saa wannı bianinba ki i saa pak.”

*Məkitsə nba din tee jatuk labaar*

<sup>13</sup> Li yoo man ki jasə be nibur na ni ki yet Yiisa a “Wanntə, betir n yəəə na ki wun bəkit ti baa faar ki turin.”

<sup>14</sup> Ki Yiisa yetə a “Li ki lami nan ki n teen i barbuurə ki bəkit i faar ki turi.” <sup>15</sup> Njanne ki Yiisa namm pak nibur na a “Ii mi man məkint lonchiən po. Məkint bonchiann kaa saa te ki niro-ii mək manfoori.”

<sup>16</sup> Njanne ki u yimm barjouk na a, “Məkitsə din be ki mək kpaab, ki u kpaab na teenə jeet bonchiann; <sup>17</sup> ki u tan dukin dudukit a ‘N saa teen nlee, kimaan n ki mək yiar nba ki n ji saa teen n jeet na kur leni.’ <sup>18</sup> Li poor po ki u yet a,

‘N saa teen nnae; n saa yeer n bøkpera nae ɲaan ɲamm maa bɔsaakara. Leɲe ki n ji saa teen n dii nan n bonkokoot kura. <sup>19</sup> N ji saa yet n mɔɲ a: N mɔk jeet nba saa janin bina bonchiann; n ji sii foie ki di ki nyu ki mɔk parpeenn.’ <sup>20</sup> ɲanne ki Yennu yetɔ a, ‘Jajatuk na! Nyiɔk na, a manfoor saa kat. Ki laan a mɔkint nba ki a mɔk na, ɲmee saa yenti?’

<sup>21</sup> “Tɔn, wunba kur tikii mɔkint ki teen u mɔɲ, ɲaan ki mɔk mɔkint Yennu boori, u mun tee nan jajatuk na nae.”

*Teent Yennu yada  
(Matiu 6.25-34)*

<sup>22</sup> ɲanne ki Yiisa yet u poorpoweiteeb a, “Li paak ki n beeri, i daa te ki li mukisi i binben po nan yaa saa di linba, ki bia daa te ki li mukisi i gbanant po nan yaa saa lia linba, <sup>23</sup> kimaan manfoor gar jeeta, ki gbanant mun gar tiata. <sup>24</sup> Gotir nɔɔnii: bi ki buur jeeti, ki bia ki jaami, ki bia ki mɔk dii naapaat koo suka, ɲaan Yennu dintib; i ki mɔk nyɔɔt bonchiann ki gar nɔɔnii-i? <sup>25</sup> I ɲmee saa fit fɔkin u manfoor u dudukit nba mukisɔ na paaki? <sup>26</sup> Yaa ki fit tun bonmintik na, bee ki li sii daamii-i nan bonlia maɲi? <sup>27</sup> Gotir man puuk nan li ɲant. Bi ki tuun toona koo ki luu bi mɔɲ chinchena; ɲaan n beerie, kpanbar Solomonn nba lek din mɔk taɲant bianinba, u din ki mi lia tiat ki li ɲan nan puuk na gbaa. <sup>28</sup> Mɔɔt nba be dinna, ɲaan wonn ki bi joo muuwa na, Yennu nba faɲitir bianinba na, u kan lannini-i? Yimm yadkanpɔɔna damm na!

<sup>29</sup> “I daa gbaa nan yaa saa di linba koo yaa saa nyu linba, ki bia daa mukis i dudukit, <sup>30</sup> kimaan durinya na n̄aateeb tuu mukis bi dudukit linba na paake. N̄aan yimm n̄arin, i Baa Yennu poŋ mi nan i loon linba na. <sup>31</sup> Li paak, n̄aant ki i baka-ii be Yennu naan ni, ki u saa jii bona nba na ki turi.

*Yendouŋ ni m̄okint labaar*  
(*Matu 6.19-21*)

<sup>32</sup> “Yimm n niib nba ki yab na, i daa tiin janmaanii, kimaan i Baa Yennu-e yaa wun dinni naan, ki bia m̄ok parpeenn nan waa saa dinni na paak. <sup>33</sup> Li paak, koin i bona nba ki i m̄ok, ki jii li likirii ki tur talasdam, ki i tan saa la m̄okint nba ki m̄ok gbennu. M̄okint maŋ sii be Yendouŋ ni, ki kan wati, kimaan nanyuko kan kpian lenji, ki bonn̄min̄mabit bia kan n̄mamiri. <sup>34</sup> Siaminba ki a m̄okint be na, a dudukit mun be leje.

*Daaba nba teen siir barjouk*

<sup>35</sup> “Teent siir man ki daa yokitir i tiati, ki n̄aan ki i fita-ii di, <sup>36</sup> kii tee nan niib nba tuu guu bi chanbaa nba saa nyi poochiann ki kpent, ki tan baar yiin, ki bin loot yiama na. <sup>37</sup> Daaba nba ki bi chanbaa kpen ki lab ki bi guu u kpenu, parpeenn tee bi yare. Barm̄oniie ki n beeri na, bi chanbaa na saa te ki u daaba maŋ n kar ki wun baar nan jeet ki turib ki bin di. <sup>38</sup> Li-i tee ki bi chanbaa tan kpen tansuunii koo kojom̄ok, ki la ki bi guu-u, parpeenn sii tee daaba maŋ yare.

<sup>39</sup> “Nnara, li-i tee ki n̄aadaano poŋ mi yoo nba ki nanyuko saa baarie, u kan n̄aan ki wun koo; u sii guue. <sup>40</sup> Yimm mun-ii teen siir kii guu,

kimaan min nisaarik Bik tan saa jen yoo nba ki i ki daanime.”

*Daabir nba saa sak u chanbaa mɔb bianjinba  
(Matiu 24.45-51)*

<sup>41</sup> Nanne ki Piita boi Yiisa a “N Yomdaano, a yiin timme barjouk na amii soo kure?” <sup>42</sup> Ki Yiisa jiino a, “Daabilanoe tee yandaano ki tuun u chanbaa nba wanto bianjinba? Nɔoe tee wunba ki u chanbaa saa teeno daabiyudaano, ki wuu gorii daaba kur nba be u njaak ni, kii teemm mann yoo nba jan. <sup>43</sup> Li-i tee ki u chanbaa tan kpen ki la ki u tuun nna, parpeenn sii tee daabir man yare. <sup>44</sup> Barmoniie ki n beeri na, u chanbaa man saa jii u mokin kur ki teen daabir man nuu nie a wuu gorii. <sup>45</sup> Naaan li-i tee ki daabir man yet u moŋ a u chanbaa kan jen yiami, ki ji piin boo daabilia na, li jab nan poob, ki bia di ki nyu daan ki yib, <sup>46</sup> u chanbaa tan saa jen daar nba nan yoo nba ki daabir man ki daan nan u saa jene. U chanbaa na saa dat u tubir bonbiir, ki teeno nan baa tuu teen moyêtdamm bianjinba na.

<sup>47</sup> “Daabir-i mi linba ki u chanbaa loon wun tun, njaan ki teen u moŋ siiri, ki bia ki tumi, bi saa boou kpaasir bonchiann. <sup>48</sup> Daabir-i kii mi linba ki u chanbaa loon wun tun, ki kpet tun bonkpetir nba jan nan boot, bi saa boou waaminnae njaan njaau.

“Wunba ki bi turo ki li yab, nɔoe ki bi tan saa boi gaar linba yab; njaan wunba ki bi turo ki li yab bonchiann na, nɔoe ki bi tan saa boi ki gaar bonchiann mun.

*Bokitue labaar*  
(*Matiu 10.34-36*)

<sup>49</sup> “N baar maa n lu muue tingbouŋ na ni, ŋaan n sunman ki li poŋ yinna. <sup>50</sup> Bi saa te ki n sik nyun yiaka. Li turin parbiir bonchiann mɔkmɔk nan laa tan saa tun ki gbenn. <sup>51</sup> I dukii nan n baar nan parmaasire tingbouŋ na ni-i? Aaii. N beerie, n baar nan bokitue. <sup>52</sup> Laa jii dinna ki saa, niib banŋmu-i tanji be ŋaak ni, bi tan saa bokit; ki bantaa sii biir banlee, ki banlee na mun biir bantaa maŋ. <sup>53</sup> Baanba tan sii biir bi waas, ki waas mun biir bi baanba; ki naanba tan sii biir bi bonpoi, ki bonpoi mun biir bi naanba; ki siponaanba tan sii biir bi sipoi, ki sipoi na mun biir bi siponaanba.”

*Yoo bannu labaar*  
(*Matiu 16.2-3*)

<sup>54</sup> Li yoo maŋ ki Yiisa pak tur nibur na a, “Yoo nba ki i tuu tan la sanpagbant do yonbaa po na,\* i tuu yete yiama a saak saa baawa, wun set tan baa. <sup>55</sup> Yoo nba ki i laat wouŋ nyi diitu po ki da na, i tuu yaa naauk sii be, ki lin set tan toŋ. <sup>56</sup> Yimm kpinkpanni damm na, i fit bukitir saak nan naauk baaru yoo, ŋaan bee teen ki i kan fit bann motana yoo na paaki?

*Maan ŋammu labaar*  
(*Matiu 5.25-26*)

<sup>57</sup> “Bee teen ki i kan fit dukin ki bann linba tooki? <sup>58</sup> Li-i tee ki fin nan soo mɔk maan kii saa nan maan maŋ bat boor, yaa daa be sonu paak ki saa na, li bo ŋan ki i kot ki ŋamm maan

---

\* **12:54** 12.54 Bi tinj ni, saak nyi yonbaa poe.

manj. Li-i kii tee nnai kaa, u saa dat baar nana barbuuro boor, ki barbuuro na mun saa jiia ki teena dansarguutoo nuu ni, ki dansarguutoo na mun saa koonna dansarik. <sup>59</sup> N beerie, bi kan mi njaa-ani, see ki a tan pa likirii nba ki bi jiiara na kur, nan jinjema kan tenni.”

## 13

### *Niro-i kii nyik toonbiit tumu u saa kpo*

<sup>1</sup> Li yoo na ki nisiab baar ki yet Yiisa ki jiiin Galilii teeb kpinu po, binba ki Pailat\* din kpiib, yoo nba ki bi mann maruj ki teen Yennu na. <sup>2</sup> Ki Yiisa boib a, “Galilii teeb nba la biak manj bianjinba na, i dukii a bi mantik din tee biitdamm ki gar bi leeb kure-e? <sup>3</sup> Aaii; njaan n beerie, li-i tee ki i ki nyik i toonbiit, i kur mun tan saa kpo nnae. <sup>4</sup> Donfoouk nba din be Siiloam ki tan baa ki nyak niib piik nan banniin ki kpiib na, i dukii a niib manj din jia mantik tee biitdamm ki gar leeb nba kur be Jerusalem nae-e? <sup>5</sup> Aaii; njaan n beerie, li-i tee ki i ki nyik i toonbiit, i kur mun tan saa kpo nnae.”

### *Tiik nba ki loon loona barjouk*

<sup>6</sup> Nanne ki Yiisa yimm barjouk a, “Jasoo din mok tilontik u kpaab ni, ki tan baar a wun poor loona, njaan ki la siari. <sup>7</sup> Nanne ki u bet u kpaguuro na a ‘Nnara, bina njantaae na ki n yoo baat tiik na boor maa n poor loona, njaan ki ki laat siari. Choomo lu. Bee ki li sii see biir tinj yanni?’ <sup>8</sup> Ki u kpaguuro na yeto a, ‘Chanbaa, daa

\* **13:1** 13.1 Pailat din tee Rom teeb yudaance.



nyikin binn na, ki n gbiir li nyakir ni ki pii lulin,  
 9 ki tin got laan li saa lon loona binn po-o? Li-i  
 tee ki li ki lonie, fan ji njaan bin choou.’ ”

*Yiisa nba te ki poowaagorik la laafia foon daar  
 bianjinba*

10 Foon dasiar ki Yiisa din want niib Yennu  
 maan, Yenjiantu diiuk ni; 11 ki poosoo be diiuk  
 man ni, ki narinbiiuk be u ni, ki teeno yiaru  
 binpiik nan njanniin, ki ji tan teeno waagorik,  
 ki u ki fit naatir faba. 12 Yiisa nba tan lau, ki u  
 yiino a wun baar, ki yeto a “A yiaru man njaawa,”  
 13 njaan jii u nii ki yii poo man paak. Li taakpaak  
 ni ki u naat u moŋ ki ji piak Yennu.

14 Nanne ki Yenjiantu diiuk yudaano wutoor  
 doo, kimaan Yiisa nba te ki niro la laafia foon  
 daar na paak; ki u bet niib na a “Daa njanloobe  
 bakoi nook ni ki ti tuu sii tuun toonn. Ii tuu baar  
 li daa ni kii laat laafia, njaan i daa baat foon daar  
 ki loon laafia.”

15 Ki Yiisa gato a “Yimm kpinkpanni damm na,  
 i kur tuu lootir i nei nan bonii bonkob-loi ni ki  
 saa namm ki nyuntib foon daa. 16 Ki poo nba tee  
 Abraham yaaboonn na, njooe ki Sintaanii teeno  
 yommik binpiik nan njanniin, li ki jan nan ki n  
 nyinno yommisin ni foon daari-i?” 17 Yiisa nba  
 pak linba na yoo nba, ki u datai na kur ji dii  
 fei; ki nibur na ji mok parpeenn nan waa tuun  
 bakitnaun toona nba kur na.

*Bonboorik barjouk*

*(Matiu 13.31-32; Mak 4.30-32)*

18 Li poorpo ki Yiisa boi niib man a, “N saa  
 bikin Yennu naan nan lannpoe? N saa nannir

nan bee na? <sup>19</sup> Li naan nan kanperik binn nba ki nirō tuu jii ki bur u kpaab ni, ki lin kpaat ki teen tiik, ki n̄on̄ii baat ki tia tiat li yiinii paak nae.”

*Datiŋ barjouk*  
(*Matiu 13.33*)

<sup>20</sup> Ki Yiisa bia ŋamm boib a, “N saa bikin Yennu naan nan lannpoe? <sup>21</sup> Yennu naan tee nan datin̄ nba ki poo tuu jii ki ŋmat nan boroboro yon nba yab, ki lin tan miik ki ji fuut do nae.”

*Tamm̄oyebik k̄ōnu labaar*  
(*Matiu 7.13-14, 21-23*)

<sup>22</sup> Yoo nba ki Yiisa din be s̄onu paak ki saa Jerusalem na, u din gaar digbangben̄a nan digbanbis ni, ki want niib Yennu maan; <sup>23</sup> ki s̄ō tan boiō a, “Chanbaa, niib nba tan saa la tinnu na, bi tan sii tee waamina amii bi sii yaba?”

Ki Yiisa yetib a <sup>24</sup> “See ki i yabir i m̄ōŋ ki k̄ō tamm̄oyebik na ni. N beerie, niib bonchiann tan sii loon bin k̄ō leŋ, ŋaan gbar k̄ōnu. <sup>25</sup> Ŋaadaan̄-i tani fiir ki loon tamm̄ob na, ŋaan ki i biar see nanyer po, ki kpaan tamm̄ob ki yi ki yaa, ‘Chanbaa, lootir turit,’ ŋaan li yoo, u tan saa jiini a, ‘N ki miini; i nyii lee?’ <sup>26</sup> Ki i tan saa jiinō a, ‘Ti din tuu di ki nyu nana; ki a wantit Yennu maan ti doi ni.’ <sup>27</sup> Ki u bia saa jiin ki beti a ‘N ki mi yaa nyii siami, yimm biitdamm na kur, seetir nna man.’ <sup>28</sup> Ki u tan saa jii-i ki lui nanyer; ŋaan ki i gorii Abraham nan Aisak nan Jakob nan Yennu s̄okiniinba kura, ki bi be Yennu naan ni; ŋaan ki i m̄ō fabin ki ŋman nyana. <sup>29</sup> Niib tan saa nyi yondo po nan yonbaa po nan diitu po

nan ganj po, ki tan koo Yennu naan ni ki kar ki di jeet. <sup>30</sup> Nisiab nba joont tan saa doŋ liik, ki siab nba mun doŋ liik na tan saa joont.”

*Yiisa nba din loon Jerusalem teeb bianjinba  
(Matiu 23.37-39)*

<sup>31</sup> Li yoo na ki Farisiinba siab baar Yiisa boor, ki yeto a, “See ki a nyii nna ki saan siar po, kimaan Herod loon wun kpiae.”

<sup>32</sup> Ki Yiisa betib a “Noo lunlonn,† ii saa man, ki saa yeto a ‘Gotirii, dinna nan wonne ki n sii beer narinbiit niib ni njan bia te ki niib-ii laat laafia, ki daa nantaa daar n saa gbenn n toonn.’ <sup>33</sup> Laa jii dinna nan wonn ki saa, see ki n lek fabir somm n somma. Bi kan kpi Yennu sokinii siar po, li-i kii tee Jerusalem-i kaa.

<sup>34</sup> “Jerusalem teeb, nbaayoo-o, yimm nba kpi Yennu sokiniinba, ki bia jaat u toomiinba nba ki u tumm i boor ni na tana, bikinu taar munjaae ki n gbaa maa n lakini yomm, nan korik nba tuu lakin u kobis u kpinkpant ni na, ki i ki saki.

<sup>35</sup> Gotir man, Yennu nyik i jiantu nasaakak nawa. N beerie, laa nyii dinna ki saa, i ji kan mi lan ki saa tuu daar nba ki i tan saa yet a ‘Piisin be wunba baat Yennu sann ni na paak.’ ”

## 14

*Yiisa nba din te ki baatoo la laafia bianjinba*

<sup>1</sup> Ton, foon dasiar ki Yiisa din tan koo Farisiinba yudaansoo njaak, a wun di jeet; ki binba be lej man diisiro. <sup>2</sup> Li yoo na ki baatsoo baar u

---

† **13:32** 13.32 Bi boor, lunlonne tee bonkobit nba sub ki bia ton.

tóonn, wunba ki bonwuunkar wuunɔ. <sup>3</sup> Nanne ki Yiisa boi sennu wantteeb nan Farisiinba a “Ti sennu sak a nirɔ n te ki baatɔ n la laafia foon daari-i?” <sup>4</sup> Ki bi ŋmina. Ki Yiisa te ki baatɔ na baar u boor, ki u te ki u la laafia. Li poorpo ki u chabɔ a wuu saa, <sup>5</sup> ŋaan betib a “I yeno-i mɔk bik koo naab ki u tan kpet baa bunbunn ni foon daar, u kan donno foon daar maŋi-i?”

<sup>6</sup> Ki bi ki fit jiino siari.

*Ki jiin sikin-n-mɔŋ nan saamm gaaru po*

<sup>7</sup> Li yoo na ki Yiisa la binba tikir na loon bin gann yudamm kaanii boa ki kar. Li paak, ki u yimm barjouk na a: <sup>8</sup> “Bi-i yiina poochiann ki a baar, faa daa kaar yudamm kaanii boori, li pasiar bi poŋ bo yiin soɔewa, wunba cheea, <sup>9</sup> ki yiintɔ maŋ saa baar a boor ki tan yeta a, ‘Fiit ŋaan turɔ kaanu.’ Li yoo na, ki fan ji di fei ki fiir ki saan kar kpiŋ. <sup>10</sup> Tɔn, bi-i yiina poochiann ki a baar, fan kar kpiŋ; ki yiintɔ n tan fit baar ki yiina a, ‘N yɔk, baat ki tan kar yudamm kaanii boor.’ Li yoo na ki a saa la baakir a leeb boor. <sup>11</sup> Kimaan wunba kur dont u mɔŋ, Yennu tan saa sikino; ŋaan wunba sikint u mɔŋ, Yennu tan saa donno.”

<sup>12</sup> Nanne ki Yiisa bia yet wunba yiino na a “Li-i tee ki a yiin jaamm, faa daa yi a yɔɔsnba, koo a yɔɔrib, koo a ninjamm, koo a mɔkitleebi, kimaan ŋamm tan saa jiinawa, ki a gaar a pann. <sup>13</sup> Li-i tee ki a yiin jaamm, fan yiin talasdamm nan wobii nan dianii nan jɔonii, <sup>14</sup> ki Yennu saa pukina, kimaan bi kan fit jiina baa dii linba na. Yennu-e tan saa jiina, daar nba ki burchimm tan saa fiir kuun ni na.”

*Jaangbenjir barjouk*  
(*Matiu 22.1-10*)

<sup>15</sup> Binba din di nan Yiisa na yeno nba gbat linba ki u pak na, ki u yeto a “Binba tan saa di jaamm Yendoun naan ni na, parpeenn tee bi yare.”

<sup>16</sup> Ki Yiisa yeto a “Jasoo din be ki tan yaa wun di jaangbenjir, ki poi niib bonchiann. <sup>17</sup> Jaamm na yoo nba tan baar, ki u tun u daabir a wun yiin niib nba ki u daan poib na, ki jeet na kur teen siira. <sup>18</sup> Ki bi kur piin ki loon sonu nba ki bi saa yet saanu: Ki sinsinn yoo na bet daabir na a, ‘N daa kpapaan, li paak, chabimin ki n saan saa got;’ <sup>19</sup> ki loo beto a ‘N daa naakookii piik, li paak, chabimin ki n saan bikimm;’ <sup>20</sup> ki loo na mun bia beto a ‘N daa yonn poopaane, li paake ki n kan fit baari.’ <sup>21</sup> Nanne ki daabir man nmat ki saa bet u chanbaa linba na kur. Ki u chanbaa na wutoor doo bonchiann, ki u bet daabir na a, ‘Nyimin ki saan doo ni yian yian, ki saa got sonii ni, ki yiin talasdamm nan wobii nan dianii nan joonii ki jen namm na.’ <sup>22</sup> Li poorpoe ki u daabir na saan ki jen yet a ‘Chanbaa, n tun faa yet linba nawa, njan ki yiar bia tenn.’ <sup>23</sup> Nanne ki u chanbaa na yeto a, ‘Nyimin biak ki saan digbankpinii ki saa got pana paak nan sonjobis ni, ki te niib n baar, ki n njaak na n gbee. <sup>24</sup> Njan binba ki n daan yiimm, ki bi yet baaru na, bi soo pon kan lemm n jaamm jeet na kaawa.’ ”

*Yiisa weiu labaar*  
(*Matiu 10.37-38*)

<sup>25</sup> Sianyoo ki nibur waa Yiisa; ki u tan jiant yetib a <sup>26</sup> “Wunba loon wuu be nanin, see ki u

loonin ki gar waa loon u baa, nan u naa, nan u poo, nan u waas, nan u yoorib, nan u waarii, nan u moŋ manfoor bianjinba na. Li-i kii tee nnai kaa, u kan fit teen n poorpoweitoo. <sup>27</sup> Wunba ki likin u saanmanj ki jii u kuun dapunpunn ki waami, u kan fit teen n poorpoweitoo.

<sup>28</sup> “Wunba loon wun maa doonj, see ki u kar sinsinn, ki dukin waa saa teen bianjinba ki soor li mob, ki laan u likirii saa janj koo li kan janj; <sup>29</sup> kimaan li-i kii janj, njaan ki u fokin fiakir ki tan ki fit kaar maaru manj, ki niib tan la nan u ki fit kaar doonj manj, bi ji sii laaue ki sarikito. <sup>30</sup> Bi ji sii yeen a ‘Joo na daan fokin u doonj njaan tan gbar kaaruwa.’

<sup>31</sup> “Kpanbar-i mok niib tusaa piinlee ki saan namm a wun kon nan kpanbar loo nan u niib tuspiik mun, nlee ki kpanbar nba mok niib tuspiik na saa teeni? See ki u kar sinsinn ki dukin ki bann baa saa janj nan baa kan janj nan u tooku. <sup>32</sup> Bi-i kii janje, see ki u tun toonii ki bi njak faauk, waa daa be banfokira na.

<sup>33</sup> “Ton, niro-i kii nyik u mokint kuri, u kan fit teen n poorpoweitoo.

*Yaarin labaar  
(Matiu 5.13; Mak 9.50)*

<sup>34</sup> “Yaarin man; njaan li manu-i tani saat, nlee ki li ji sii mani? <sup>35</sup> Li lek ki njan ki a jiiir ki pak kpaab ni, ki bia ki njan ki a pukin lulin po. See ki a lu. Wunba mok tuba, wun gbiint.”

# 15

## *Pebotikauk barjouk (Matiu 18.12-14)*

<sup>1</sup> Sianyoo ki lampogaarteeb nan biitdamm bonchiann din baat Yiisa boor ki gbiintir u maan.

<sup>2</sup> Ki Farisiinba nan sennu wantteeb burin ki yeen a “Joo na gaan biitdamm ki bia di namm.”

<sup>3</sup> Li paak, ki Yiisa yimm barjouk na a <sup>4</sup> “I yeno-i mok pei kobik, ki yeno tan boti, u saa teen nlee? See ki u nyik pei piinyia nan banyia na muuk ni, njaan saan lon peeuk nba bot na nan waa tan saa lau. <sup>5</sup> Wuu lau yoo nba, ki u ji mok parpeenn. Li yoo wun jiiu ki bukoo bopiat paak, <sup>6</sup> ki kun njaak ni, ki yiin u yooosnba nan njaakpianba ki lakimm ki yet a, ‘Ii mok parpeenn man, kimaan n la n pebotikauk nawa.’ ”

<sup>7</sup> Ki Yiisa bia yet a, “Nanne mun ki n beeri, biitdaanyeno-i nyik u biit, parpeenn sii be Yendoun ni ki jiin li daano po, ki gar laa sii be bianjinba niburchimm piinyia nan banyia nba li ji ki kpaat alas bin lebit na po.

## *Likbinn nba bot barjouk*

<sup>8</sup> “Ki poo mun-i mok likbina piik, ki yenn tan boti, u saa teen nlee? See ki u joo fitir ki piar u diiuk, ki lon fanu nan waa tan saa lar. <sup>9</sup> Wuu jiki lar yoo nba, wun yiin u yooosnba nan njaakpianba ki lakimm ki yet a ‘Ii mok parpeenn man, kimaan n laa n likbinn nawa.’ ”

<sup>10</sup> Ki Yiisa bia yet a, “Nanne mun ki n beeri, li-i tee ki biitdaanyeno nyik u biit tumu, Yennu malakanba sii mok parpeenn ki jiin u po.”

## *Barjouk nba jiin bibotikak po*

11 Nanne ki Yiisa namm yet a “Jasoo din mok bonjai banlee, 12 ki waaroo po tan yet u baa a ‘N baa, n loon ki a jii faar nba ki n tan saa gaar nae ki turin.’ Nanne ki u baa bokit faar manj ki turo. 13 Li ki yukiri ki waaroo po na jii u mokint kur ki yaat saan digbann banfokir. 14 Waa saa be doo na ni, ki u teen yana yana ki biir u likirii kur. Likirii na nba gbenn yoo nba, ki kon baa tinj manj ni bonchiann, ki gbatoo hei. 15 Nanne ki u ji saan be jasoo njaak, doo manj ni, ki u tuumoo u kpaab ni ki u dint doorii. 16 Ki u tuu loon wun di doorii jeet na; njaan ki soo ki teenoo jesiati. 17 Li poorpo ki u subir, ki yet a ‘N baa toontunna kura laat jeet di ki li janjib, ki bia tent, njaan ki n tan kpenn kon nna na. 18 Laa ji be na, n saa kun n baa boore ki saa yetoo a, Chanbaa, n tun bonbiir ki biir Yennu nanawa. 19 N ji ki njan nan ki a yiinin a bija. Teentin a toontunna na yeno.’ 20 Nanne ki u ji fiir ki nmat kun u baa boor.

“Yoo nba ki u daa be banfokir ki kpent na, ki u baa lau; ki ninbaauk sooro bonchiann, ki u chiar ki baar puur woboo ki moot u tankpin.\* 21 Nanne ki bik na yet a, ‘N baa, n tun bonbiir ki biir Yennu nanawa. N ji ki njan nan ki a yiinin a bija.’ 22 Njaan ki u baa yet u daaba na a, ‘Teent yiama ki jii tanant, nan banj, nan taasaat, ki lannoo, ki bia pirimoo banj nan taasaat na, 23 njaan kii saa man ki saa soor naajakpammir na ki kpiu ki tin teen jaamm. 24 N tuu mi a n bija na kpoe, njaan ki u be; ki bia mi a u bote, njaan ki u tan jenna.’ Nanne ki bi ji piin bi jaamm dinu ki mok parpeenn.

\* 15:20 15.20 Bi din tee nna ki want lomme.



25 “Li yoo na ki u bijakper na daa be kpaab ni, ki ji tan kpent ki per nyaak ki gbat fuut, ki jeruk jerin ki siak waa. 26 Ki u yiin u baa toontun-yenɔ ki tan boio a, ‘Bee fuute fu nyaak ni na?’ 27 Ki toontunno na yeto a ‘A waarɔ nae kpen, ki a baa te ki bi kpil naajakpammir, kimaan u jen nan laafiae.’ 28 Nanne ki u yooɔɔ man wutoor ji doo hei, ki u yet nyaak na ni koonu. Ki u baa nyii ki barimo a wun koo. 29 Nnan ki u yet u baa a, ‘Barmonii, mine tuuma bina bonchiann. N bia ki mi yet a mobu, nnan a pon taan ki mi turin buuk ki n kpil ki yiin n yoonba, ki ti dii ki mok parpeenni. 30 A bija nae biir a faar kur, ki wei poochonchona. Waa tan jen yoo nba, ki a bia kpil naajakpammir ki turo.’ 31 Ki u baa yeto a ‘N bik, fin narin pon tuu be nanin yoo kure; ki linba kur ki n mok, li tuu tee a yare. 32 Li nnan tin teen jaamm kii mok parpeenn, kimaan n tuu mi a a waarɔ na kpoe, nnan ki u be; ki bia mi a u bote, nnan ki u tan jenna.’ ”

## 16

### *Toona saakoo barjouk*

1 Ki Yiisa yet u poorpoweiteeb a “Mokitsoo din be ki mok u toona saakoo, ki bi din tan kumii mokitoo na a u toona saakoo na biir u likirii nan u bona. 2 Nanne ki mokitoo na yiino ki tan boio a, ‘Bee teen ki n gbia a po nna? A ji kan mi teen n toona saakoo. Ii saa ki sob faa mok n bona nba ki tan turin.’ 3 Ki toona saakoo man ji dukin dudukit a ‘N chanbaa yaa wun berin u toonn nie na. N saa teen nlee? N ki mok pan nba saa ko, ki n bia tiin fei nan mii mei. 4 N mi maa saa

teen bianjinba ki niib n gaarin bi nei ni, yoo nba ki n chanbaa nyikin ki gbenn na.’ <sup>5</sup> Nanne ki u yiin u chanbaa pandamm na kur yeno yeno; ki boi sinsinn yoo a, ‘A mək n chanbaa pann yinŋae?’ <sup>6</sup> Ki u jiin a, ‘Kpaboba kobike.’ Ki u beto a, ‘Jiin kadaauk ki saan kar yian ki sob kpaboba piinŋmu.’ <sup>7</sup> Ki u bia yiin loo ki tan boio a, ‘Fini, yinŋae ki a mək n chanbaa panni?’ Ki u jiino a ‘Dii bootii kobike.’ Ki u yeto a ‘Jiin kadaauk ki sob dii bootii piinniin.’ <sup>8</sup> Tɔn, yoo nba ki u chanbaa na gbat u toona saakoo fobdiiro na nba tun bianjinba na, ki u kpakito, a u tun nan yame.” Ki Yiisa ŋamm yetib a “Binba waa tingboun na sonue mək yan bi moŋ niib sinsuuk ni ki gar binba waa yentu sonu na. <sup>9</sup> Mine beeri na, ii dia tingboun na likirii kii sommit niib; ki likirii na-i tani gbenn yoo nba, Yennu saa gaari Yendoun ni, nei nba sii yoo be na ni. <sup>10</sup> Wunba tuun toonbik fanu, u bia saa tun toongbenjir fanue. Wunba di fobit nan likmintik, u bia saa di fobit nnae nan likchiŋ. <sup>11</sup> Li-i tee ki a di fobit tingboun na ni, Yennu saa jii sanpaapo məkint ki teen a nuu niwa-a? <sup>12</sup> Li-i tee ki a di leeb yar fobit, ŋmee saa tura a yari?

<sup>13</sup> “Tɔn, daabir kan fit tun ki tur chanbaanba banlee. U sii nan yenoe ŋaan loon loo; koo u sii chorin yenoe ŋaan sian loo na. A kan fit waa Yennu ki bia waa likirii.”

*Ki jiin Yiisa mɔbonsia po*

*(Matiu 11.12-13; 5.31-32; Mak 10.11-12)*

<sup>14</sup> Yoo nba ki Farisiinba gbat linba na, ki bi ji daan Yiisa nyatuk, kimaan bi din tee liklonnae.

15 Ki Yiisa yetib a “Yimm nba want i mɔŋ nan i tee burchimme na, ŋaan Yennu mi i para ni. Linba ki nirɔ dukii nan li tee bonjaanne, ŋaan li ki mɔk nyɔɔt Yennu boor.

16 “Moses sennu nan Yennu sɔkiniinba sɔbu din mɔk paŋ mɔkmɔk nan Jɔɔnn nba din tan baar. Laa nyii Jɔɔnn baaru yoowa, ki bi mɔɔntir Yennu barŋanii ki jiin Yennu naan po, ki sɔɔ kur mukis u mɔŋ a wun kɔɔ Yennu naan maŋ ni.

17 Sanpaak nan tiŋ tan saa gbenn, ŋaan Yennu sennu nan bonmintika kan gbenni.

18 “Wunba yêt u ŋaapoo ŋaan kɔɔn poogano, ŋanne tee bonchonchontoonn; ki wunba mun kɔɔn poo nba ki u sɔrɔ yêto na, u mun bia tee bonchonchonne.”

*Ki jiin mɔkitɔɔ nan talasdaano Lasarus po*

19 Yiisa bia din yetib a “Mɔkitɔɔ din be, ki daaryeejaŋaakur ki u lia taŋant, ki be u yamani nan parpeenn. 20 Ki talasdaansɔɔ mun din be, ki u sann tee Lasarus, ki u mɔk fiat hei. Ki bi tuu baar nanao ki wun kar mɔkitɔɔ na ŋaatammɔb ni, 21 ki tuu loon wun di mɔkitɔɔ na jebura nba baa na; ki boi tuu baar gbaa ki lenii u fiat na.

22 “Li poorpoe ki talasdaano na tan kpo, ki Yennu malakanba jiiu ki saan nanao Abraham boor Yendouŋ ni. Ki mɔkitɔɔ na mun tan kpo, ki bi piiu; 23 ki u be kpeentiŋ biak boor, ki li mukiso bonchiann. Ki u tan yaat got ki la Abraham banfokira, ki Lasarus be u boor. 24 Nanne ki mɔkitɔɔ na yiin sanpaapo a, ‘Chanbaa Abraham, tinimin ninbaauk, ki tun Lasarus ki wun pak u niibir nyun, ki tan teen n jerinn paak ki lin

maak, kimaan n di biake muu ni na.’ <sup>25</sup> Naan ki Abraham yeto a ‘N bik, tiat faa tuu be a manfoor ni na, a tuu mok bonjanae, naan Lasarus mun mok bonbiit. Motana u be u yamanie nna na, naan fine ji be biak ni na. <sup>26</sup> Ki linba pukin, Yennu bir bootsunsun timm nan fin sinsuuk ni, ki soo kan fit nyi ki loor saan a boor ni, ki soo mun kan fit nyi a boor ki loor ti boor ni na.’ <sup>27</sup> Nanne ki mokitoo na yeto a ‘Chanbaa, li-i tee nnaie, n barimae, tumin Lasarus n baa naak, <sup>28</sup> ki wun saan kpaan n waarii banamu nba biar na, ki bi ji tan daa baat biak boor na ni.’ <sup>29</sup> Ki Abraham yeto a ‘A waarii mok Moses nan Yennu sokiniinba gbou. Bin gbiint bi maan.’ <sup>30</sup> Ki mokitoo na yeto a ‘Chanbaa Abraham, aai, nna kan saki; soo-i fiir kuun ni ki saan bi boori, nanne ki bi saa nyik bi toonbiit.’ <sup>31</sup> Ki Abraham yeto a ‘Bi-i kii gbiint Moses nan Yennu sokiniinba maan, niro-i lekii fiir kuun ni gbaa, naan bi kan sak u mobi.’ ”

## 17

### *Toonbiit labaar*

*(Matiu 18.6-7, 21-22; Mak 9.42)*

<sup>1</sup> Li yoo man ki Yiisa yet u poorpoweiteeb a “I daa dukii nan jinjammii kan baari; naan li sii bi ki teen wunba te niib tuun biit na. <sup>2</sup> Bi-i bonni jii naar ki lanno, ki lu-u mokir ni, li bo sii so nan wun te waas na yeno n tun toonbiit. <sup>3</sup> Soot i moŋ!

“A naa bik-i tuma bonbiir, fan kpaano; ki li-i tee ki u yaa u biira, fan nyik u biit ki chabo. <sup>4</sup> Li-i tee ki u tun ki biira taar munlore daar nook ni, naan

tuu baar a boor taar munlore ki yaa u biira, fan nyik chabɔ.”

*Yada labaar*

<sup>5</sup> Li yoo man̄ ki Yiisa toomiinba yetɔ a “Pukint ti yada.”

<sup>6</sup> Ki u yetib a, “Li-i tee ki i bo mɔk yada ki li yab ki baar nan kanperik binn na, i bo tuu saa fit yet kpiik na a, ‘Nabit ki saan wuu mɔkgbenjir ni,’ ki kpiik man̄ saa sak i mɔb ki set njabir.

*Ki jiin daabir toonn po*

<sup>7</sup> “Tɔn, i yenɔ-i mɔk daabir ki u ko tanmɔnn koo ki kpaar pei, ki daabir na-i nyii kpaab ki kpen, a kan yetɔ a ‘Baat yian ki tan kar ki di jeeti.’ <sup>8</sup> See ki a betɔ a ‘Liatir a kpakoliant, n̄aan lia tayeenii, ki teen jeet ki sennin ki n baar ki di ki nyu. Li poorpo ki a mun di ki nyu.’ <sup>9</sup> Chanbaa man̄ saa tur u daabir na niipoouk kimaan waa sak u mɔb na paaka-a? Aaii. <sup>10</sup> Li mun bia tee nnae i boor. Yoo nba ki i tun toonn nba ki Yennu turi na ki gbenn, yin yet a ‘Ti tee daabiyoona. Ti kpan tun linba tee tin tun na kɔɔe.’ ”

*Yiisa nba te ki gbaata piik la laafia bianjinba*

<sup>11</sup> Yiisa nba din saa Jerusalem yoo nba na, ki u gar Samaria nan Galilii sinsuuk ni, <sup>12</sup> ki tan baar digbansiar; ki gbaata piik chetɔ len, ki set banfɔkira,\* <sup>13</sup> n̄aan yiin sanpaapowa a “Chanbaa Yiisa, tinimit ninbaauk.”

<sup>14</sup> Yiisa nba lab yoo nba, ki u yetib a, “Ii saa man Yennu mannteeb boor ki bin bikini got.”

---

\* **17:12** 17.12 Bi binben̄ ni, gbaatir din ki tee wun nakin niro.

Ki bi ηmat saa Yennu mannteeb boor; ki bi ηaat maη ji saa gbenn sɔnu ni. <sup>15</sup> Ki bi yeno jen Yiisa peη ki pak Yennu nan kunkɔsaakar, kimaan waa bann nan u ηaauk gbenn na. <sup>16</sup> U din baa finfabir Yiisa tɔɔnn ki turo niipoouk. Joɔ maη din tee Samaria nirɔe. <sup>17</sup> Ki Yiisa boi a “Niib piik kaa bo la laafia-a? Ki banyia na be lia? <sup>18</sup> Bi sɔɔ ki jen a wun tur Yennu niipoouk see boorganu na kɔɔe-e?” <sup>19</sup> ηaan bet joɔ maη a “Fiit kii saa. Faa teenin yada na paake te ki a la laafia.”

*Ki jiin Yennu naan baaru po  
(Matiu 24.23-28, 37-41)*

<sup>20</sup> Tɔn, ki Farisiinba na boi Yiisa a, “Yennu naan saa baar nlee yooe?” Nanne ki u betib a “Li ki tee i saa got la Yennu naan nba saa baar bianjinba kaa. <sup>21</sup> Sɔɔ kan yet a ‘Gotir, ηanne na,’ amii ‘Li be nawa,’ kimaan Yennu naan na be i ni.”

<sup>22</sup> Nanne ki u bet u poorpoweiteeb na a, “Yoo baat ki i tan sii sunman ki i la min nisaarik Bik baaru, ηaan kan la. <sup>23</sup> Bi tan saa beti a, ‘Gotir, u be lenj,’ koo ‘Gotir, u be nna na.’ I daa saa gorii, ki bia daa waabi, <sup>24</sup> kimaan min nisaarik Bik baaru tan sii tee nan sanyikintii nba tuu nyikint ki yent sanpaapo kur nae. <sup>25</sup> Naan sinsinn n tan saa di biak bonchiann; ki mɔtana nigboun na bia tan saa yɛtin. <sup>26</sup> Nowa yoo nba din tee bianjinba na, li mun bia tan sii tee nnae min nisaarik Bik baaru yoo. <sup>27</sup> Nowa yoo, bi din di jeet ki nyu, ki kɔɔnt poob, ki jikit bi waas ki teemm jab, ki tan tuu daar nba ki Nowa kɔɔ ηaringbenjir ni ηaan nyikib; ki nyunchiɔη baar ki dii bi kur na. <sup>28</sup> Lot yoo mun bia din tee nnae; ki bi di ki nyu,

ki daa bona ki koi bonkukoit, ki buur tan, ki maa ŋei; <sup>29</sup> ŋaan daar nba ki Lot din nyii Sodom, ki sarwuuta nan muu nyii sanpaapo ki tan baa ki dii bi kur. <sup>30</sup> Daar nba ki min nisaarik Bik tan saa dokit, li mun tan sii tee nnae.

<sup>31</sup> “Li daar maŋ, joo nba be ŋaak yur paak,† u daa siik ki koo u diiuk ni a wun jii u bona; ki wunba mun bia be kpaab ni, u daa ŋmat jikin siari. <sup>32</sup> Tiat Lot ŋaapoo‡ labaar na po. <sup>33</sup> Ton, wunba ki sak wun likin u saanmaŋ n paak, u tan saa koŋ u manfoor; ŋaan wunba likin u saanmaŋ n paak, ŋooe tan saa la barmonii manfoor. <sup>34</sup> N beerie, yoo nba ki n saa baar na, niib banlee tan sii doo doonu ni, ki n tan saa jii yeno ŋaan nyik loo. <sup>35</sup> Poob banlee tan sii be ki naan dii, ki n tan saa jii yeno ŋaan nyik loo. <sup>36</sup> Jab banlee mun tan sii be kpaab ni, ki n tan saa jii yeno ŋaan nyik loo.”

<sup>37</sup> Ki u poorpoweiteeb na boio a “Ti Yomdaano, lia ni?”

Ki u jiin a, “Siaminba ki bonkpeenn be, leŋe juut tikii.”

## 18

### *Ki jiin pakooƙ nan barbuuro po*

<sup>1</sup> Li yoo na ki Yiisa yimm barjouk a wun wan-nib nan li ŋan ki bii mei Yennu yoo kura, ki daa moƙ kpinkpangbatuku, ki betib a <sup>2</sup> “Barbuuro din be dosau nna ni, ki ki tiin Yennu ki boi wun baakit nirɔ. <sup>3</sup> Pakooƙ mun din be doo maŋ ni, ki

---

† **17:31** 17.31 Bi ŋei yura paak, bi din tuu sere. ‡ **17:32** 17.32 Lot ŋaapoo din jiante ki kpant yaatann. (Pinpiik 19.26)

yoo baat u boor, ki yeeno a ‘Bumin n maan na ki turin, ki n nyi niro nba mukisirin na nuu ni.’  
 4 Njaan ki barbuuro na tuu yet. Li poorpo ki u tan dukin a, ‘N poŋ taan ki tiin Yennu, ki bia ki baakit niro gbaa, 5 njaan pakook na daamii paak, n saa tat bu u maan maje ki turo, nna-i kaa, u baaru saa turin bakinta.’ ”

6 Ki Yiisa namm yetib a “Gotir barbubiiuk daano na nba dukin bianjinba. 7 Waa yaa u saa turo monii na, ki Yennu nigannkab nba meio yonnu nan nyiook na, njo Yennu kan bu ki turibi-i? U saa taantira-a? 8 N beerie, u saa bu ki turibe yian. Njaan min nisaarik Bik-i baar yoo nba, n saa la niib nba teenin yadawa-a?”

### *Ki jün Farisii niro nan lampogaartoo po*

9 Nanne ki Yiisa yin barjouk na ki tur binba dukii bonnann bi moŋ po, njaan sian bi leeb na a:  
 10 “Jab banlee din saan koo Yenjiantu nasaakak ni a bin miar Yennu, ki yeno tee Farisii niro, ki loo mun tee lampogaartoo. 11 Ki Farisii niro na set njaan miar u moŋ dudukit ni ki yet a, ‘Yennu, n teena niipoouk, kimaan n ki tee biitdaano nan leeb na. N ki tee ninfokdaano, ki bia ki di fobiti, ki bia ki tee bonchonchonne. Niipoouk nan maa ki tee nan lampogaartoo na na. 12 N lorin mob taar munlee daa njanlore nook ni; maa tuu la linba, n bia teena yennkoo piik nook ni.’  
 13 Ki lampogaartoo na narin set dannuwa, ki ki loon wun yaat got sanpaapo, njaan pak yur ki yet a ‘Yennu, tinimin ninbaauk, kimaan n tee biitdaano.’ ” 14 Ki Yiisa namm yetib a “N beerie, lampogaartoo nae, li ki tee Farisii niro na kaa,



ki Yennu din sak u miaru ki gaarɔ, ki u ji kun. Wunba kur dont u mɔŋ, Yennu saa sikinɔ; ŋaan wunba mun sikint u mɔŋ, Yennu tan saa donnɔ.”

*Yiisa nba din gaar waas bianjinba  
(Matiu 19.13-15; Mak 10.13-16)*

<sup>15</sup> Tɔn, nisiab din baat nan bi waas Yiisa boor, a wun yii u nii bi paak. Ki u poorpoweiteeb nba la ki bi baat nan waas maŋ na, ki bi tian bi paak. <sup>16</sup> Ŋaan ki Yiisa yiin waas maŋ a bii baat u boor na, ki yet u poorpoweiteeb na a “Ŋaant ki waas maŋ-ii baat n boor na man, ki daa tiammi, kimaan bi boorue yen Yennu naan. <sup>17</sup> Barmoniie ki n beeri na, wunba ki gaar Yennu naan na, nan u tee bik na, u kan mi kɔɔ li ni faba.”

*Mɔkitsɔɔ labaar  
(Matiu 19.16-30; Mak 10.17-31)*

<sup>18</sup> Li yoo na ki yudaansɔɔ baar Yiisa boor ki tan boiɔ a, “Wanntɔŋanɔ, n saa teen nlee ki la manfoor nba kaa gbennu?”

<sup>19</sup> Ki Yiisa ŋmat boiɔ a, “Bee ki a yin ninanɔ? Niŋansɔɔ kaa see Yennu kuukɔɔ. <sup>20</sup> A poŋ mi Yennu sennu. Ŋanne tee: Daa chommi, daa kpi nirɔ, daa jaami, daa di faak siara ki biir a lɔɔ, turin a baa nan a naa baakir.” <sup>21</sup> Ki jɔɔ maŋ jiinɔ a, “N poŋ sak linba na kur n bisin niewa.”

<sup>22</sup> Yiisa nba gbat u jiinu na ki u betɔ a “Bonyennkɔɔe pɔta; kɔin linba kur ki a mɔk ki jii li likirii ki tur talasdamm, kii mɔk mɔkint Yendouŋ ni, ki ji kii waan.” <sup>23</sup> Waa gbat linba na, ki u par ji biir, kimaan u din mɔk mɔkint bonchiann.

<sup>24</sup> Yiisa nba bann nan u la parbiir na, ki u yet a “Li paar nan məkita n koo Yennu naan ni. <sup>25</sup> Li mantik paar nan məkitoo n koo Yennu naan ni ki gar laagumii n kuut kparpeenu miar ni.”

<sup>26</sup> Niib na nba gbat waa piak bianjinba na ki bi boio a, “Li-i tee nnaie, ηmee ji saa fit la tinnu?”

<sup>27</sup> Ki u betib a, “Linba ki nirɔ kan fit tumi, ηaan Yennu saa fit tuma.”

<sup>28</sup> Ki Piita yeto a, “Gotir, timm ηarin nyik linba ki ti mək nae ηaan waa-a.”

<sup>29</sup> Ki Yiisa betib a, “Barmɔniie ki n beeri, wunba kur nyik u ηaak, koo u baa, koo u naa, koo u poo, koo u waas, koo u yɔɔrib, koo u waarii, Yennu naan paaki, <sup>30</sup> u saa la li booru tingbouŋ na ni, ki lin gar waa nyik linba na; ki yoo nba baat na, u bia tan saa la manfoor nba kaa gbennu.”

*Yiisa nba pak u kuun po taar muntaa ni bianjinba*

*(Matiu 20.17-19; Mak 10.32-34)*

<sup>31</sup> Li yoo na ki Yiisa yiin u poorpoweiteeb na ki nyii namm kpin ki saa betib a “Gotir man, ti saa Jerusalem-e, leŋe ki bi saa teen min nisaarik Bik linba kur ki Yennu səkiniinba din sob ki jiin n po na, <sup>32</sup> kimaan bi tan saa soorin ki teenin binba ki tee Juu teeb na nuu ni, ki bi tan saa daanin nyatuk ki sukiin ki siin mɔsant n paak, <sup>33</sup> ki boon kpaasir, ki bia tan kpin; ηaan daa ηantaa daar ki n saa fiir kuun ni.”

<sup>34</sup> Naan u poorpoweiteeb na din ki bann barii na paaki, kimaan Yennu-e din dokin bi yan, ki bi ki bann linba ki Yiisa pak na paaki.

*Yiisa nba din nyɔɔnt jooŋ bianjinba  
(Matiu 20.29-34; Mak 10.46-52)*

<sup>35</sup> Yiisa nba din tan per Jeriko na, ki jooŋsɔɔ kar sɔnjokpin, ki mei, <sup>36</sup> ki tan gbat ki nibur gaar, ki u boi a “Bee tee?”

<sup>37</sup> Ki bi betɔ a “Yiisa nba tee Nasaref nirɔ nae gaar.”

<sup>38</sup> Ki u yiin sanpaapowa a “Yiisa, Defid yaa-boonn, tinimin ninbaauk.” <sup>39</sup> Ki sɔnliita na tian u paak a wun ŋmin; ŋaan ki u bia ŋamii yi sanpaapo a “Defid yaaboonn, tinimin ninbaauk.”

<sup>40</sup> Ki Yiisa set, ŋaan betib a bin dat jooŋ maŋ ki baar nana u boor. Waa baar kpian Yiisa yoo nba, ki Yiisa boio a <sup>41</sup> “A loon ki n tun bee ki turani?”

Ki u jiin a, “N Yomdaano, n loon ki a nyɔɔnt n ninbinae.”

<sup>42</sup> Ki Yiisa betɔ a “Nyɔɔntir! Faa teenin yada nae te ki a ninbina na la laafia.”

<sup>43</sup> Li taakpaak ni ki u ninbina nyɔɔnt ki u ji laat, ki waa Yiisa ki saa, ki dontir Yennu sann. Niib na nba la nna maŋ, ki bi kura ji piak Yennu.

## 19

*Ki jiin Yiisa nan lampogaarteeb yudaansɔɔ po*

<sup>1</sup> Li poorpoe ki Yiisa din baar Jeriko ki gaar.

<sup>2</sup> Ki jasɔɔ be leŋ maŋ ki tee lampogaarteeb yudaano, ki u sann tee Sakeus; ki u mɔk mɔkint bonchiann. <sup>3</sup> U din koor a wun la Yiisa nba tee wunba, ŋaan ki fit lau. Niib din yabit nan wun lauwa, kimaan u din tee nijinjine. <sup>4</sup> Li paak ki u chiar ki gar tɔonn po ki saa doo sinsabik a wun la Yiisa, kimaan u yaa wun gar leŋe. <sup>5</sup> Yiisa nba tan baar sinsabik maŋ boor, ki u yaat gotɔ ki yet

a “Sakeus, kakitir sik na. See ki n dii a ŋaak ni dinna.”

<sup>6</sup> Ki Sakeus kakitir sik ki foontɔ nan parpeenn, ki bi tɔk saan u ŋaak ni. <sup>7</sup> Niib na nba din la linba na ki bi ji burin ki yeen a “Jɔɔ na saan kɔɔ biitdaano ŋaak nie.”

<sup>8</sup> Li poorpo ki Sakeus fiir set ki yet Yiisa a, “N Yomdaano, gotir, n saa bɔkit n mɔkint kur ki tur talasdam, ki wunba ki n mi diiu fobit, n saa jiino taar munna.” <sup>9</sup> Ki Yiisa yetɔ a “Tinnu baar a ŋaak na niib paak dinnawa, kimaan a mun tee Abraham yaabonne. <sup>10</sup> Min nisaarik Bik baar a n lon binba bot nae ki lab ki tinnib.”

*Ki jiin daaba po  
(Matiu 25.14-30)*

<sup>11</sup> Nanne ki Yiisa yin niib nba gbiintir maan man na barjouk, kimaan bi dukii a Yiisa nba per Jerusalem na, li paak Yennu naan saa baar yiam. <sup>12</sup> Ki u yetib a, “Nijaansɔɔ din be ki tan nyii saan digbann banfokira, a bin dinno naan, li poorpo ki wun jen kpen ŋaak ni. <sup>13</sup> Waa daa din ki saan yoo nba na, ki u yiin u daaba piik ki turib salinkuna\* yenn yenn, ki betib a, ‘Ii saa man kii kpentir kpinkpouŋ nan likirii man nan maa tan saa jen.’ <sup>14</sup> Nnaan ki u doo ni niib na ki loon u maan. Waa saan yoo nba, ki bi tun toonii kpanbar na boor, a bi ki sak ki jɔɔ na n teen bi bati.

<sup>15</sup> “Tɔn, ki nijaann na saan ki saa dii naan man ki jen. Waa jen yoo nba, ki u te ki bi yiin u daaba nba ki u daan turib likirii na, a u loon wun bann

---

\* **19:13** 19.13 Salinkunn din tee ŋmaarii ŋantaa paauko.

nyoot nba ki bi la likirii nba ki u daan turib na ni. <sup>16</sup> Ki sinsinn yoo na baar u boor ki tan yeto a ‘Chanbaa, salinkunn nba ki a daan turin na, n kpent kpinkpouŋ ki la salinkuna piik.’ <sup>17</sup> Ki u chanbaa maŋ yeto a ‘N faan, a tee daabinjanoe. Faa fit dia bonmintik fanu bianjinba na, li paak, n saa tura doi piik yudant.’ <sup>18</sup> Ki wunba mun paa u paak na baar u chanbaa na boor ki tan yeto a ‘Chanbaa, salinkunn nba ki a daan turin na, n kpent kpinkpouŋ ki la salinkuna ŋanŋmue.’ <sup>19</sup> Ki u chanbaa na yeto a ‘N saa tura doi ŋanŋmu yudante.’

<sup>20</sup> “Ki loo mun bia baar ki tan yeto a ‘Chanbaa, gotir a salinkunn nae na. N daan gbin n ninfiaŋ nie ki boŋ, <sup>21</sup> kimaan n tiina, a tonu na paake. A tuu jikit linba ki tee a yar, ki bia jaan linba ki a ki buri.’ <sup>22</sup> Ki u chanbaa na yeto a ‘Fin daabibiiuk na, n saa jii a moŋ moŋ momaame ki pak biira. A poŋ mi nan n tuu tee nitouŋo, ki tuu jikit linba ki tee n yar, ki bia jaan linba ki n ki buri. <sup>23</sup> Bee teen ki a ki kpent niib n likirii maŋ, ki bin tan paanin nyooti? Maa bo tan jen na, n bo saa la n likirii nyoota.’ <sup>24</sup> Ŋanne ki u yet binba see leŋ na a ‘Gaat salinkunn maŋ u nuu ni, ki tur wunba mok salinkuna piik na.’ <sup>25</sup> Ki bi beto a ‘Chanbaa, u poŋ mok salinkuna piik.’ <sup>26</sup> Ki u jimm a ‘N beerie, wunba mok bona, bi saa pukino; ŋaan wunba koŋ bont, bi bia saa tont bonmintik nba ki u mok nae. <sup>27</sup> Ton, n datai na nba ki loon ki n teen bi bat na, ŋann baat namm nna na, ki tan kpib n numm ni na.’ ”

*Yiisa nba baat Jerusalem ki bi dontiro bianjinba  
(Matiu 21.1-11; Mak 11.1-11; Jɔɔnn 12.12-19)*

<sup>28</sup> Yiisa nba pak ki gbenn na ki u gar bi tɔɔnn, ki bi saa Jerusalem. <sup>29</sup> Ki bi tan per Bef-fej nan Betani doi nba kpia kunkonn nba ki bi yir Olif Tiinii kunkonn na; ki Yiisa tun u poorpoweiteeb na banlee, <sup>30</sup> ki betib a “Ii saa digbanbik nba be i tɔɔnn po na ni. I-i saki baar, i saa la bonjak lor, ki sɔɔ daa ki mi jakɔ. Yin lotɔ ki baar nanɔ; <sup>31</sup> ki wunba-i boi-i a ‘Bee teen ki i lotɔ?’ yin betɔ a ‘Ti Yomdaanɔe loonɔ.’ ”

<sup>32</sup> Ki bi saan la bont kur nan Yiisa nba pakib bianjinba na. <sup>33</sup> Baa saan ki saa lot boŋ maŋ yoo nba, ki bondamm lab ki boib a “Bee ki i lot boŋ maŋi?”

<sup>34</sup> Ki bi jiin a, “Ti Yomdaanɔe loonɔ,” <sup>35</sup> ŋaan dat boŋ maŋ ki baar nanɔ Yiisa boor. U poorpoweiteeb na din jii bi liant, ki paan boŋ na paak ki jakin Yiisa. <sup>36</sup> Waa jak boŋ na yoo nba, ki nisiab jikit bi chinchena nan bi liata ki lat sɔnu ni.

<sup>37</sup> Waa tan per Jerusalem ki baar sɔnsinsikir nba nyi Olif Tiinii kunkonn paak na, leŋe ki u poorpojɔɔmu na bonchiann piin ki piak Yennu nan kpianpaarii, ki mɔk parpeenn, kimaan baa din la bakitnaun toonjaana nba kur ki Yiisa tun na. Ki bi yeen a:

<sup>38</sup> “Piisin be kpanbar nba baat Yennu sann ni na paak.

Parmaasir be Yendouŋ ni; ii dontir Yennu sann sanpaapo man.”

<sup>39</sup> Nanne ki Farisiinba siab nba be nibur na ni yet Yiisa a, “Wanntoo, betir a poorpojoomu na ki bin nmin.”

<sup>40</sup> Ki Yiisa yetib a “N beerie, niib maŋ-i nmin, naan tana gbaa sii yikin piak Yennu-e.”

### *Yiisa nba mo Jerusalem teeb paak bianjiba*

<sup>41</sup> Waa din per Jerusalem na, ki u gotir ki mo doo na teeb paak, <sup>42</sup> ki yet a “Li-i bonni tee ki i bann parmaasir sonu dinna, li bo sii nan turi. Naan motana li liir i yan, ki i ki fit banni. <sup>43</sup> Yoo baat ki i datai tan saa baar, ki maa joonjouk ki lint i doo ki loon i paak lokir kur po, <sup>44</sup> ki libit i kur nan tin ki kpi-i perrr. Bi tan saa biir i nei mane chain, ki tangbiinn gbaa kan tenni. Mukisuk na kur tan saa tun, kimaan yaa ki bann Yennu tinnu yoo na paak.”

### *Yiisa nba namm Yenjiantu nasaakak bianjiba (Matu 21.12-17; Mak 11.15-19; Joohn 2.13-22)*

<sup>45</sup> Li poorpoe ki Yiisa saan koo Yenjiantu nasaakak ni, ki ber binba koi bonkobit na, ki nyinnib, <sup>46</sup> naan yetib a “Li sob Yennu gbounj ni a ‘N naak sii tee Yenmiaru naake,’ naan yimme kpintir ki teen fat-teeb kinkarboor.”

<sup>47</sup> Ton, daar kur ki Yiisa be Yenjiantu nasaakak ni ki want niib Yennu maan. Ki mannteeb yudamm nan sennu wanteeb nan tin maŋ yudamm loon bin kpiu, <sup>48</sup> naan ki fit la sonu nba ki bi saa kpiu, kimaan niib na kur din chaa tubae ki gbiin u maan.

## 20

### *Nisiab nba boi Yiisa u yiikoo po bianjinba (Matiu 21.23-27; Mak 11.27-33)*

<sup>1</sup> Dasiar Yiisa nba be Yenjiantu n̄asaakak ni ki m̄ontir Yennu bar̄an̄ii ki want niib li paak na, ki mannteeb yudamm nan sennu wantteeb nan saakab baar u boor <sup>2</sup> ki tan yeto a “Betirit, yiikolannpoe ki a m̄ok ki tuun linba na? N̄mee chaba yiikoo man̄i?”

<sup>3</sup> Ki u jiin a “N mun m̄ok buboit ki saa boi-i. Betirin man, <sup>4</sup> Jōonn nba din tuu wuur niib Yennu nyunwuru na, Yennu-e chabo li yiikoo amii nisaarike?”

<sup>5</sup> Ki bi n̄mant faa leeb baann ki yeen a “Ti-i yet a Yennu-e chabo li yiikoo, u saa boit a bee teen ki ti ki teeno yada. <sup>6</sup> Ki ti-i biaki yet a nisaariie chabo, niib na kur saa jaatit tanawa, kimaan bi teen yada nan Jōonn din tee Yennu sokiniie.” <sup>7</sup> Li paak, ki bi yet Yiisa a bi ki mi u yiikoo nba nyii siami. <sup>8</sup> Ki Yiisa betib a “Ton, n mun kan beti wunba chabin yiikoo ki n tuun linba na.”

### *Toontunna barjouk (Matiu 21.33-46; Mak 12.1-12)*

<sup>9</sup> Li yoo na ki Yiisa yin niib na barjouk a, “Jasōo din koo tilontii kpaab, ki jii kpaab na ki teen toontunna nii ni a bii gorii, ki tan yaat saan siar po ki saa yukir. <sup>10</sup> Ki punpōor yoo tan baar ki u tun u daabir a wun saan toontunna na boor ki bin turo tiloona na waan. Ki toontunna na saa boo daabir na ki jiino yann. <sup>11</sup> Nanne ki u bia tun daabiloo; ki toontunna na saa boo u mun, ki dinno fei, ki bia jiino yann. <sup>12</sup> Ki kpadaan̄o man̄



bia tun daabilɔɔ; ki bi saa paan ɲɔɔ dan ki jiiu lu. <sup>13</sup> Ɗanne ki kpadaanɔ na yet a ‘N saa teen nlee na? Laa ji be na, n saa tun n mɔɲ mɔɲ bilonkake. Ɗɔɔ ɲarin, li pasiar bi saa turo baakira.’ <sup>14</sup> Ɗaan toontunna na nba tun ninbinn ki la bik na baat na, ki bi bet bi leeb a ‘Kpadaanɔ maɲ fadiirɔe na. Ɗaant tin kpiu man, ki u faar maɲ n ji teen ti yar.’ <sup>15</sup> Ki bi sooro ki nyii nanno kpaab na kpɪɲ ki saa kpiiu.

“Tɔn, toontunna maɲ nba tun bianjinba na, kpadaanɔ na saa teemm nlee? <sup>16</sup> U saa baar ki kpibe, ɲaan bia jii kpaab maɲ ki tur siab.”

Niib maɲ nba gbat linba na, ki bi yet a “Yennu n bɔr ɲann.”

<sup>17</sup> Ki Yiisa gotib ɲaan yet a “Li sob Yennu gboun ni a

‘Tann nba ki tanmaara yêtir na,

ɲanne tan tee lotik ni tanɲann.’

Maan na paak tee bee? <sup>18</sup> Tɔn, wunba kur baa tann maɲ paak saa but bute; ɲaan tann maɲ-i baa wunba paak, see ki li nanno buk buk nan yon na.”

### *Ki jiin lampo panu po*

*(Matiu 22.15-22; Mak 12.13-17)*

<sup>19</sup> Ki sennu wannteeb nan mannteeb yudamm bann nan Yiisa nba yin barjouk nba na saan gaan bi poe; li paak, ki bi ji din koor a bin sooro li tonton na, ɲaan tiin niib na janmaanii. <sup>20</sup> Li paak, ki bi ji waa pikiio, ɲaan bia tun pikiiteeb nba kpann a bi tee popeendamme, a bin la u mɔbonkpetir, ki fit sooro ki teeno tin yudaano nuu ni. <sup>21</sup> Ki pikiiteeb maɲ tan baar bet Yiisa a

“Wanntɔɔ, ti mi nan faa yeen linba ki bia want na ŋan. A bia ki tee lukitindaanɔ, ŋaan fine bia want Yennu sɔnu nan barmɔnii. <sup>22</sup> Tɔn, ti sennu chabit nan tii pa lampo kii teen Rom tinj kpanbar Siisa amii ti daa pa?”

<sup>23</sup> Ki Yiisa bann ser nba ki bi tee na, ki yetib a, <sup>24</sup> “Wantin likirib. Tɔn, ki ŋmee naauj nan sanne be likirib na paaki?”

Ki bi yetɔ a “Kpanbar Siisa yare.” <sup>25</sup> Ki Yiisa betib a “Tɔn, ii yenn-ii pa kii teen Siisa linba tee u yar, ŋaan mun-ii pa kii teen Yennu linba tee Yennu yar.”

<sup>26</sup> Ki pikiiteeb na lek ki la u mɔbonkpetir niib na tɔnni; Yiisa jiinu maŋ din teemm jaarlituko, ki bi ji ŋmin.

### *Ki j̄in kpeemm firu po*

*(Matiu 22.23-33; Mak 12.18-27)*

<sup>27</sup> Ki Sajusiinba siab baar Yiisa boor, ŋamme din tuu yaa niib tan kan fir kuun ni na. Bi din betɔ a, <sup>28</sup> “Wanntɔɔ, Moses din sɔb sennu ki yet a ‘Nirɔ-i kɔɔn poo ki ki mar waas ŋaan kpo, li ŋan ki u naa bik n faar pakɔɔk na ki mar waas ki tur kpeemmɔ na.’ <sup>29</sup> Tɔn, jab banlore din be ki tee naanɔɔk, ki saakɔɔ po tan kɔɔn poo, ki ki mar waasi, ŋaan kpo; <sup>30</sup> ki wunba mun paa u paak na faar poo maŋ, ki mun bia ki mari, ŋaan kpo; <sup>31</sup> ki binba biar na kura tan faar poo na, ki ki mari, ŋaan mun tan kpo. <sup>32</sup> Li poor po ki poo maŋ mun tan kpo. <sup>33</sup> Ki laa ji be na, kuun fiiru daari, bi ŋmee tan sii yen poo maŋi? kimaan bi banlore na kur kɔɔnɔwa.”

<sup>34</sup> Ki Yiisa yetib a “Tingbouŋ na niib kɔont poob ki bia teen bi waas jab, <sup>35</sup> ŋaan binba ŋan nan kuun fiiru ki tan saa fiir kii be durinya paann ni na, tan kii kɔont poobi, bi bia kii teen bi waas jabi, <sup>36</sup> kimaan bi ji kan mi kpo; bi sii tee nan malakanba nae, ki bia tee Yennu waas, kimaan bi fiir kuun niwa. <sup>37</sup> Tɔn, Moses-e din wann nan kpeemm tan saa fiir kuun niwa. Moses nba din sob ki jiin tibik nba di muu po na, u din yi Yennu a, ‘Abraham Yennu, nan Aisak Yennu, nan Jakob Yennu.’ <sup>38</sup> Niib maŋ nba din kpowa na, ŋaan bi bia lek daa fo, kimaan Yennu ki tee kpeemm Yennu kaa, u tee footib Yennu-e, kimaan u tɔonn, bi kur tee footibe.”

<sup>39</sup> Nanne ki sennu wantesiab yet Yiisa a “Wantɔɔ, a jiin bonŋanna.” <sup>40</sup> Ki bi ji din jee nan bin boi Yiisa buboisiat.

*Ki jiin Masia nba tee wunba po  
(Matiu 22.41-46; Mak 12.35-37)*

<sup>41</sup> Nanne ki Yiisa boib a “Nlee ki bi yeen a Yennu Niganntɔɔ Masia tee Defid yaaboonni?”

<sup>42</sup> Kimaan Defid mɔŋ mɔŋ sob Yan gbouŋ na ni a ‘Yennu din yet n Yomdaano a, Karin n niidiitu po

<sup>43</sup> mɔkmɔk nan maa tan saa jii a datai ki teemm a taakpakta.’

<sup>44</sup> Defid nba din yiin Masia a ‘Yomdaano’ na, nlee ki Masia tee ŋɔɔ Defid yaaboonni?”

*Ki jiin sennu wanteeb binbeŋ po  
(Matiu 23.1-36; Mak 12.38-40)*

<sup>45</sup> Niib na kur numm ni ki Yiisa din yet u poorpoweiteeb a <sup>46</sup> “Soot i mɔŋ man nan sennu

wannteeb; ŋamme loon bii lia liatbaant, kii lin kii somm, kii bia kii gaan burchinfoontii dai ni; bi-i koo Yenjiantu diit ni, bi loon bii kaar nijaana kaanii nie; bi-i saan jaamm ni, bi bia loon yudamm kinkaani boae; <sup>47</sup> ŋamme bia di pakoi fobit; ŋaan ji tuu jenna ki mei Yennu ki yukii, a bin kpann niib nan bi tee yentinnae. Bi tubdatu tan sii bi bonchiann.”

## 21

*Ki jiiin pakook piinii po*  
(Mak 12.41-44)

<sup>1</sup> Ŋanne ki Yiisa got lint ki la mokita kpeent likirii Yennu piinii lakir ni; <sup>2</sup> ki u bia la pakotalasdaano mun kpeen likbina ŋanlee\* Yennu piinii lakir na ni. <sup>3</sup> Ki Yiisa yet a “Barmoniie ki n beeri na, pakotalasdaano na kpeen ki gar soo kura, <sup>4</sup> kimaan bi kur paat bi likchiant na nie, ŋaan pakotalasdaano na kpan jii linba ki u yaa wun di na kure ki kpeen.”

*Yenjiantu ŋasaakak na biiru po*  
(Matiu 24.1-2; Mak 13.1-2)

<sup>5</sup> Ŋanne ki siab din piak Yenjiantu ŋasaakak na po, ki yeen baa fanjir nan tanjana nan piinii nba ki bi tur Yennu na bianjinba. Ki Yiisa yetib a <sup>6</sup> “Yaa laat linba kur na, ŋaan yoo baat ki bi tan saa tut li kur ki lu tij ni, ki li tanyennkoo kan tenn ki paa leer paaki.”

*Mukisuk nan biak labaar*  
(Matiu 24.3-14; Mak 13.3-13)

\* **21:2** 21.2 Likbina ŋanlee: li kobii ŋanlee din tee daar paauko.

<sup>7</sup> Waa pak nna maɲe, ki bi boio a “Wanntoo, bee yooe ki linba na tan sii tee? ki li nyinn tan sii tee nlee, li-i yaa lin teeni?”

<sup>8</sup> Ki u yetib a “Ii mi man ki bi tan saa kpanni. Niib bonchiann tan saa jii n sann ki yeen a ‘Mine tee Masia,’ koo ‘Masia yent yoo pera.’ Li nibooru, i daa waabi. <sup>9</sup> I saa gbat tobii nan kunkona po, ɲaan i daa te ki li moki janmaansooruku, kimaan li kpaa talas nan linba na kur n tun sinsinna, ɲaan li ki wann nan durinya gbennu baat li tonton nae.”

<sup>10</sup> Ki u ɲamm yetib a “Nibooru nan nibooru tan saa kon nan leeb, ki kpanbar nan kpanbar mun tan saa took ki kon nan leeb. <sup>11</sup> Tinj jijek-jaana nan nikuuk nan kon tan saa baa tingbouɲ na lokir kur po. Niib bia tan sii laat nyinsaakara nan linba sii mokib janmaansooruk sanpaapo. <sup>12</sup> ɲaan linba na kur kan teen daann kaawa, ki bi saa soori ki dinni biak, ki kubini Yenjiantu diit yudamm nii ni, ki kooni dansarii; ki bi tan saa saan nani kpanbara nan tinj yudamm boor ki bin bu i buut, kimaan yaa waan na paak. <sup>13</sup> ɲanne tan saa te ki i la yaak nba saa pak n po ki turib. <sup>14</sup> Li paak, ii tan soor i moɲ man, ki daa te ki li daamii nan yaa saa pak jiin bianɲinba buut maɲ yoo, <sup>15</sup> kimaan li yooe ki n saa turi yan nan mɔbona nba ki i tan saa pak, ki i datai kan fit nyann i mɔbona koo ki noini. <sup>16</sup> ɲaan i baanba nan i naanba, nan i yoorib, nan i waarii, nan i ɲaateeb, nan i yooɲnba moɲ tan saa nyi i poor ki fikisiri; ki bi tan saa kpi i siab. <sup>17</sup> Ki soo kur tan sii nami, kimaan yaa waa-n na paak. <sup>18</sup> ɲaan i

yut yennkoo gbaa kan guti. <sup>19</sup> I-i kii nyik n weiu, i tan saa la manfoor nba kaa gbennuwa.

*Ki jiin Jerusalem biiru po*

*(Matiu 24.15-21; Mak 13.14-19)*

<sup>20</sup> “Naaan yoo nba ki i tan la kunkonkonna lint Jerusalem, yin bann nan li yaa lin biire na. <sup>21</sup> Li yoo maŋ, binba tan be Judea yent ni, bin chiar ki do kunkona; ki binba mun be Jerusalem, bin nyi ki yaat; ki binba mun be digbankpinii-kpinii na ji daa baat doo maŋ ni, <sup>22</sup> kimaan li yoo tan sii tee tubdatu yooe. Linba na kur tan saa teen nan laa sob Yennu gbouŋ ni bianinba nae. <sup>23</sup> Yoo maŋ ni, li tan sii bi ki teen podamm nan binba dia walai, kimaan biak bonchiann tan saa baar tiŋ na paak, ki Yennu wutoor tan saa do niib maŋ paak. <sup>24</sup> Ki kunkonkonna tan saa baar ki kpi bi siab nan jukbanjai, ki bia tan saa soor siab ki saan namm tini kur po, ki teemm yommii. Ki binba ki tee Juu teeb na tan saa yent Jerusalem mokmok nan bi yoo nba tan saa gbenn.

*Yiisa jenu labaar*

*(Matiu 24.29-31; Mak 13.24-27)*

<sup>25</sup> “Nyina tan sii be yonnu ni nan nmaarik ni nan nmaabira ni. Ki tingbouŋ na ni mun, parbiir tan saa baar digbana ni, ki janmaanii bia tan sii be, kimaan mokgbenjir nyunpana nba tan sii fu bonchiann na paak. <sup>26</sup> Ki linba be sanpaapo kur tan saa damm ki nmat, li paak, ki janmaanii tan saa jek niib, yoo nba ki bi guu linba yaa lin tan baar tingbouŋ na ni na. <sup>27</sup> Li yooe ki bi tan saa la ki min nisaarik Bik dokit sanpagbouŋ ni ki baat

nan panchion nan yentsaakar. <sup>28</sup> Ki linba na nba-i tanji piin teenu, yii mok parcheenn, kimaan i tinnu yoo pera.”

### *Sinsabik nyinn labaar*

*(Matiu 24.32-35; Mak 13.28-31)*

<sup>29</sup> Njanne ki Yiisa yimm barjouk a “Gotir sinsabik nan tiinii kur. <sup>30</sup> Yaa tuu la ki tiinii man faat bintir, i ji tuu bann nan siok pere na. <sup>31</sup> Nnae mun, yoo nba ki i tan laat ki linba na nba kur tuun, yin bann nan Yennu naan pera.

<sup>32</sup> “Barmoniie ki n beeri na, motana nigbouj na kan kpo ki gbenn kaawa ki linba na kur n tumi. <sup>33</sup> Sanpaak nan tij tan saa gara, njan n maan njarin kan mi gari.

### *Ii guu man kii mei Yennu*

<sup>34</sup> “Ii mi man ki daa te binbenj na daamii-i, nan dayibu nan li yiaru boonti, ki n baaru daar tan saa kpir baar, <sup>35</sup> ki daar man tan saa nyak niib kur nba be tingbouj na ni nan tanbar nae. <sup>36</sup> Ii guu man kii mei Yennu yoo kur ki wun turi pan nba saa te ki i nyann bikinu kur nba tan saa baar, ki bia set min nisaarik Bik tounn.”

<sup>37</sup> Ton, daar kur Yiisa din be Yenjiantu njasaakak ni, ki want niib Yennu maan, ki din tuu tan saan nyiok ki saa be kunkonn nba ki bi yir Olif Tiinii kunkonn na paak; <sup>38</sup> ki sanyiok ni ki niib kur baat u boor, Yenjiantu njasaakak ni, ki gbiintir u maan.

## 22

*Yudamm nba lor a bin kpi Yiisa bianjinba  
(Matiu 26.1-5; Mak 14.1-2; Joonn 11.45-53)*

<sup>1</sup> Yoo nba din tan per nan bin teen jaamm ki nman boroboro nba kaa datin, ki bi yi jaamm man yukitgar\* tiaru jaamm na, <sup>2</sup> ki mannteeb yudamm nan sennu wannteeb din koor a bin la baa saa teen bianjinba ki kpi Yiisa, naan tiin niib na janmaanii.

*Judas nba sak nyii Yiisa poor bianjinba  
(Matiu 26.14-16; Mak 14.10-11)*

<sup>3</sup> Li yoo na ki Sintaanii koo Judas, wunba ki bi yiu Iskariot, ki u bia tee Yiisa poorpoweiteeb piik nan banlee na yeno. <sup>4</sup> Ki noo Judas saan ki saa pak nan mannteeb yudamm nan bi kunkonkonna yudamm bianjinba ki u saa wannib ki bin soor Yiisa. <sup>5</sup> Ki bi ji mok parpeenn ki sak nan bi saa pa Judas likirii. <sup>6</sup> Ki u sak bi lor man, ki ji piin loon sonu nba ki u saa jii Yiisa ki kubin bi nuu ni, yoo nba ki niib na kaa.

*Yiisa nba tee siir a wun di yukitgar tiaru jaamm bianjinba*

*(Matiu 26.17-25; Mak 14.12-21; Joonn 13.21-30)*

<sup>7</sup> Boroboro nba kaa datin na jaamm daar nba ki bi yaa bin kpi pegana ki teen yukitgar tiaru jaamm jeet na, <sup>8</sup> ki Yiisa tun Piita nan Joonn doo na ni, ki betib a, “Ii saa man ki saa teen yukitgar tiaru jeet na siir ki tin di.”

<sup>9</sup> Ki bi boio a “Lee ki a loon tin saan teen siiri?”

\* **22:1** 22.1 Yennu malaka din kpii Ijpt teeb bijakpera, naan yakir Israel yab. (Nyinu 12.29)



<sup>10</sup> Ki u betib a “Yoo nba ki i baat doo na ni, i saa la jasoo ki u jii nyunsoor. Ii waau nan nyaak nba ki u saa koo; <sup>11</sup> yin bet li nyaak daano a ‘Wanntoo na yaa ti boia a saamm diiuk nba ki noo nan u poorpoweiteeb yaa bin koo di yukitgar tiaru jaamm jeet na be lee?’ <sup>12</sup> Ki u saa wannii ditootuk nba yab ki poŋ teen siira; ki yin teen jeet man lej.” <sup>13</sup> Ki bi din saan ki set saa la bont kur nan Yiisa nba betib bianinba na; ki bi ji teen jaamm man jeet siir.

*Ki jii ti Yomdaano jeet dinu po*

*(Matiu 26.26-30; Mak 14.22-26; 1 Korint teeb 11.23-25)*

<sup>14</sup> Jaamm na jeet dinu yoo nba tan baar, ki Yiisa kar a wun di; ki u toomiinba piik nan banlee na mun kar a bin di nano. <sup>15</sup> Ki u yetib a “Li mantik want n par ni nan min nan yimm n lakin di yukitgar tiaru jaamm jeet daannewa ki biak n lian baarin. <sup>16</sup> N beerie, n ji kan mi ki di jaamm na mokmok nan yoo nba ki barmonii jaamm na tan saa teen Yennu naan ni.” <sup>17</sup> Nanne ki u jii nyunnyunman nan tilooa nyun, ki tur Yennu niipoouk, naan yetib a “Gaat na man ki chent i leeb ki nyu. <sup>18</sup> N beerie nan laa jii dinna ki saa, n ji kan mi nyu tilooa nyun na, see ki Yennu naan tan baar.”

<sup>19</sup> Nanne ki u jii boroboro ki tur Yennu niipoouk, ki nmit nmit ki turib naan yetib a “Linba nae tee n gbanant ki n yaa n jii chab, i paak. Ii yoo kii tee nna kii tian n po.” <sup>20</sup> Dinu na poorpoe ki u bia jii nyunnyunman na nan tilooa nyun na, ki yetib a “Tilooa nyun na tee Yennu

molorpaanne, linba ki n lor nan n sɔn, ki li nyii i tinnu paak.

<sup>21</sup> “Gotir man, wunba yaa wun nyi n poore na, ηɔɔe kar ki di nanin na. <sup>22</sup> Min nisaarik Bik set saa kpo nan Yennu nba senn bianjinba nae, ηaan bonbiir sii be wunba yaa wun nyi n poor na paak.”

<sup>23</sup> Ki bi ji din piin ki boi bi leeb a, “Ti ηmapoe yaa wun tun linba na?”

### *Saakɔtuk paak mɔniɔk*

<sup>24</sup> Li poorpoe ki mɔniɔk baar u poorpoweiteeb maη sinsuuk ni, ki bi nɔi ki yeen a ηmee tee nijaanni. <sup>25</sup> Ki Yiisa yetib a “Tingbouη na ηaateeb kpanbara dia bi niib nan ninmɔnne, ki niib bia yi bi yudamm ‘bi sommteeb,’ <sup>26</sup> ηaan yimm ηarin, li ki tee nna. Wunba tee nijaann i ni, see ki u teen nan tarik na; ki yudaano mun n teen nan daabir na. <sup>27</sup> Tɔn, ηmee tee nijaann ki gar lɔɔ, wunba di jeet, koo wunba teene? Li ki tee wunba di na kaa-a? Naaan min ηarin be i sinsuuk ni nan toontunno nae.

<sup>28</sup> “Yimm poη be nanin n jinjammii ni yoo kur. <sup>29</sup> N Baa Yennu nba dinnin naan bianjinba na, nnae mun ki n yaa n dinni naan, <sup>30</sup> ki yin di ki nyu nanin n naan ni, ki bia tan kar naangbant paak ki bu Israel teeb† booru piik nan banlee na buut.”

*Yiisa nba yet a Piita saa nɔi a u ki miu bianjinba (Matiu 26.31-35; Mak 14.27-31; Jɔɔnn 13.36-38)*

---

† 22:30 22.30 Juu teeb sanleere tee Israel teeb.

<sup>31</sup> Ki Yiisa yet Simonn Piita a “Simonn, Simonn, gbiintir, Sintaanii barin a wun la yaak nba ki u saa bikini, ki lenni nan baa tuu lenn dii na, ki laan i tee dii amii fouŋo. <sup>32</sup> Nnaan fin Simonn, mine miar Yennu a paak, maa a yada daa baa; ki yoo nba ki a ji jen n boor ni, a tot a naa waas.”

<sup>33</sup> Ki Piita jiin a, “N Yomdaano, li-i lekii tee dansarik koo kuumie, n teen siira nan min nan fin n saan.”

<sup>34</sup> Ki Yiisa beto a “Piita, n beerae, nyioƙ na kojouk daa kan bui kaawa ki a saa noi taar muntaa a a ki mimi.”

*Ki jiin binbenpaan po*

<sup>35</sup> Nanne ki Yiisa boib a “Maa din tumi doi ni, ki i ki dia likboorrii koo kaliit koo taasaat na, i din pot siari-i?”

Ki bi jiin a, “Aaii.”

<sup>36</sup> Ki u yetib a “Motana, wunba mok likboorrik koo kaliuk, wun jiiir; ki wunba mun ki mok jukbanjiak, wun koi u liatir ki daa. <sup>37</sup> Mine beeri na, li sob Yennu gbouŋ ni a ‘Bi teeno nan baa tee toonbiitdamm bianjinba nae.’ Ki bi set saa teenin nnae, kimaan linba kur ki bi sob ki jiin n po Yennu gbouŋ ni na, li set saa tuma.”

<sup>38</sup> Ki bi yeto a “Ti Yomdaano, gotir, jukbanjai nanlee-e na.”

Ki u yetib a “Naant man.”

*Yiisa nba miar Yennu nan ninmonn bianjinba  
(Matiu 26.36-46; Mak 14.32-42)*

<sup>39</sup> Nanne ki u nyii leŋ ki saan Olif Tiinii kunkonn paak, nan waa poŋ tuu tee bianjinba na, ki u poorpoweiteeb weio saan. <sup>40</sup> Waa saa

baar lej, ki u betib a “Ii mei Yennu man ki i tan daa koo jinjammii ni.”

<sup>41</sup> Nanne ki u chat bi boor ki saan nan faa tuu jaa tann ki lin fokit bianjinba na, ki saa gbaan tinj ni ki miar Yennu, <sup>42</sup> ki yet a “N Baa, li-i tee a loomm, daa nyaant ki n koo bonbiir nba baat n paak na ni; nyaan nyaant ki a loommo n tun, ki li daa tee n loommu.” <sup>43</sup> Ki malaka nyii sanpaapo ki dokit u paak ki toto. <sup>44</sup> U din dii biak bonchiann ki miar Yennu nan u yaak kur, ki naauk tan pu ki toot ki naan son.

<sup>45</sup> Ki u tan fiir Yenmiaru ni ki nmat u poorpoweiteeb na boor, ki saa la ki bi goont, kimaan parbiir nba banjib na paak. <sup>46</sup> Ki u boib a “Bee teen ki i goonti? Fiit kii mei Yennu man ki i tan daa koo jinjammii ni.”

*Baa soor Yiisa bianjinba*

*(Matuu 26.47-56; Mak 14.43-50; Joonn 18.3-11)*

<sup>47</sup> Waa din daa piak namm na, ki u la ki nibur baat. Ki Judas nba tee u poorpoweiteeb piik nan banlee na yeno, gar bi toonn, ki tan baar Yiisa boor a wun moot u tankpinn.† <sup>48</sup> Ki Yiisa boio a “Judas, a mootir min nisaarik Bik tankpin a a nyi n poori-i?”

<sup>49</sup> Li yoo na ki u poorpoweiteeb na la linba yaa lin teen na, ki boi Yiisa a “Ti Yomdaano, ti kon namm nan jukbanjai-i?” <sup>50</sup> Nnaan ki bi yeno taan kakit choo mannteeb yudaano daabir niidiitu po tubir ki pot.

<sup>51</sup> Ki Yiisa betib a “Nyikin man,” nyaan siin joo na tubir ki li jen li bianj.

† **22:47** 22.47 Bi din tuu moot bi yoonsbae ki foontib.

<sup>52</sup> Nanne ki Yiisa boi mannteeb yudamm nan bi kunkonkonna yudamm nan saakab nba baar a bin sooro na a “N tee fat-tooe ki i baar nan jukbanjai nan gbajara-a? <sup>53</sup> N poŋ tuu yoo be nani daar kur Yenjiantu nasaakak ni, njaan ki i ki somi. Ton, njaan yoo na lek tee yimm nan bunbonn paŋ daano Sintaanii yare.”

*Piita nba din noi a u ki mi Yiisa bianinba*

*(Matiu 26.57-58, 69-75; Mak 14.53-54, 66-72; Joonn 18.12-18, 25-27)*

<sup>54</sup> Li yoo na ki bi ji din soor Yiisa ki saan nanao mannteeb yudaano njaak ni; ki Piita ji saa waa u poorpo banfokira. <sup>55</sup> Njaak maŋ ni, niib din joo muu dindonsinsuuk ni ki kar linta, ki Piita tan koo ki kar pukimm. <sup>56</sup> Waa kar lej, ki bonpotoontunyeno lau muu yentu ni, ki goto sirrr, ki tan yet a “Joo na tuu be nan Yiisa.”

<sup>57</sup> Ki Piita yeto a “Bonpobik, n ki miu.”

<sup>58</sup> Laa yann waaminna, ki jasoo mun lau ki yeto a “Fini, a tee u poorpoweiteeb yenoe.”

Ki Piita yeto a “Kai, joo na, li ki tee min kaa.”

<sup>59</sup> Laa bia yann waaminna, ki jaloo nna mun bia yet a “Yaunwa, barmoniie, joo na tuu be nanao, kimaan u mun bia tee Galilii niroe.”

<sup>60</sup> Ki Piita jiino a, “Joo na, min taan ki mi linba ki a yeen na kaawa.”

Waa daa piak nae ki kojouk fan bui. <sup>61</sup> Ki Yiisa jiant got Piita; ki Piita ji tiar noo Yiisa mabona na, waa yet bianinba a “Nyiok na, kojouk daa kan bui kaawa ki a saa noi taar muntaa a a ki mimi.” <sup>62</sup> Ki Piita ji nyii nanyer ki saa bui fabin bonchiann.

*Baa woontir Yiisa ki boou bianjinba*

*(Matiu 26.67-68; Mak 14.65)*

<sup>63</sup> Li poorpoe ki Yiisa guuteeb na daano nyatuk ki boou, <sup>64</sup> ki jii chinchenn ki bobin u numm po njaan faau ki bia yeenɔ a, “Bukitir wunba faa-a na.” <sup>65</sup> Ki bi pak biir u sann bonchiann ki sukiiɔ.

*Baa baar nan Yiisa buut boor bianjinba*

*(Matiu 26.59-66; Mak 14.55-64; Jɔɔnn 18.19-24)*

<sup>66</sup> Laa yent sanyiɔk ni ki Juu teeb saakab nan mannteeb yudamm nan sennu wannteeb taan kar bi yudamm tituk kaanu; ki guuteeb na baar nan Yiisa bi boor. <sup>67</sup> Ki bi betɔ a “Fi-i setiki tee Yennu Niganntɔɔ Masia-ie, fan betit.”

Ki u jiin a, “Mi-i beti, njaan i pon kan teenin yada gbaa, <sup>68</sup> ki mi-i munii biaki boi-i buboit, i kan sak jiin n buboit manji. <sup>69</sup> Li kan yukiri ki min nisaarik Bik sii kar Yabint Yennu niidiitu po.”

<sup>70</sup> Ki bi kura boiɔ a, “Ki nann fine tee Yennu Bija-a?”

Ki u jiinib a, “Nan yaa kpan yaa na.”

<sup>71</sup> Ki bi yet bi leeb a “Ti pon ji loon siaradamm bia poe na? kimaan ti gbat u mɔnɔ mɔmaama.”

## 23

*Tij yudaano Pailat nba bu Yiisa buut bianjinba*

*(Matiu 27.1-2, 11-14; Mak 15.1-5; Jɔɔnn 18.28-*

*38)*

<sup>1</sup> Nanne ki niib na kura fiir jii Yiisa ki saan nano Pailat\* boor. <sup>2</sup> Leɲe ki bi ji din piin ki want

---

\* **23:1** 23.1 Pailat din tee Rom teeb kpanbar Siisa yudamm yeneɔ.

u biit ki yeen a “Ti la nirɔ na ki u biir ti niib ki yaa bi daa pa lampo ki teen Kpanbar Siisa, ki yeen a ɲɔɔe tee Yennu Niganntɔɔ Masia, ki bia tee kpanbar.”

<sup>3</sup> Ki Pailat boio a “Fine tee Juu teeb kpanbar na-a?”

Ki u jiin a “Nan faa yaa na.”

<sup>4</sup> Ki Pailat yet mannteeb yudamm nan nibur na a, “N ki la joo na biit-i.”

<sup>5</sup> Ki niib na bia yakii nan Pailat ki yeen a “U want niib wannu nba te ki bi fiir jirjir. U din piin ki want Galilii niibe ki tan saan Judea doi ni kura, nan waa tan baar nna na.”

### *Bat Herod nba bu Yiisa buut bianjinba*

<sup>6</sup> Pailat nba gbat nna na ki u boib a “Joo na tee Galilii nirɔe-e?” <sup>7</sup> Waa bann nan Yiisa nyii Galilii yent nba ki Bat Herod yen na, ki u ɲaan ki bi saan nana Herod boor, kimaan ɲoo Herod mun din be Jerusalem li yoo. <sup>8</sup> Herod ponj din tuu gbia Yiisa po, ki loon wun lau ki li yukira. Waa din tan la Yiisa yoo nba, ki u ji mɔk parpeenn bonchiann, ki loon Yiisa n tun bakitnaunj toonn ki wun la. <sup>9</sup> Li paak, ki u boi Yiisa buboit bonchiann; ɲaan ki u ki jiinɔ siari. <sup>10</sup> Mannteeb yudamm nan sennu wannteeb mun din see leŋ ki piak nan ninmɔnii ki biir Yiisa. <sup>11</sup> Ki Herod nan u kunkɔnkɔnna ji sian Yiisa ki daanɔ nyatuk, ki tan gbabinɔ chinchennann ki jiinɔ Pailat boor. <sup>12</sup> Li daar mane ki Pailat nan Herod soor leeb yooɔ, ɲaan bi din tuu tee dataie.

*Pailat nba chab a bin kpi Yiisa bianjinba  
(Matiu 27.15-26; Mak 15.6-15; Jɔɔnn 18.39–  
19.16)*

<sup>13</sup> Ki Pailat yiin mannteeb yudamm nan Juu teeb yudamm nan nilee<sup>14</sup> ki tan yetib a “I baar nan nirɔ na ki yaa u kpann niibe. Gotir, n bu u buut i numm nie, ki ki la u biit nba ki i yaa u tun maŋi. <sup>15</sup> Herod mun bia ki la u biiti. Li paake ki u jiinto ki teent na. I lawa-a? Jɔɔ na ki tun bisiat ki li jaŋ nan kuumi. <sup>16</sup> Nann amii n saa boou kpaasire, ki ŋaau ki wu saa.”

(( <sup>17</sup> Binn kur, yukitgar tiaru jaamm yoo, Pailat din tuu fabir ki nyinn dansarkɔɔrɔe, ki ŋaan ki wun saan yann.)) <sup>18</sup> Ki nibur na tian sanpaapo ki yeen a “Kpin jɔɔ na. Nyint Barabas ki ŋaau.” <sup>19</sup> (Barabas moyêtuk nba ki u din mɔk doo na ni nan u nikpinu na paake, ki bi din kɔɔnɔ dansarik.) <sup>20</sup> Nnaan ki Pailat bia lek loon wun nyinn Yiisa ki ŋaau, li paak ki u bia ŋamm pak nan nibur na; <sup>21</sup> ki niib na mun bia tian sanpaapo ki jiint Pailat a “Kpaamo dapunpunn paak! Kpaamo dapunpunn paak!”

<sup>22</sup> Ki Pailat boib taar muntaa ni a, “Bee paake? U biit mantik tee lannpoe? N ki la linba ki u tun ki li jaŋ nan kuumi. Nann amii, n saa boou kpaasire, ki ŋaau ki wuu saa.”

<sup>23</sup> Nnaan ki niib na bia lek tian tintianii a wun kpaai Yiisa ki tabinɔ dapunpunn paak; ki bi tintianii maŋ tan nyann Pailat. <sup>24</sup> Ki Pailat ji chab a baa loon bianjinba na, lin tun nna, <sup>25</sup> ki nyinn jɔɔ nba ki bi loon wun ŋaau na, wunba ki bi din kɔɔnɔ dansarik, kimaan u moyêtuk nan u



nikpinu paak na, ɲaan chabib Yiisa nan baa loon lin teen bianjinba maɲ.

*Baa kpaɔ Yiisa ki tabinɔ dapunpunɔ paak bianjinba*

*(Matiu 27.32-44; Mak 15.21-32; Jɔɔnn 19.17-27)*

<sup>26</sup> Li yoo na ki kunkɔnkɔnna jii Yiisa ki saa nanɔ, ki saa took jasɔɔ ki u sann tee Simonn, wunba din tee Sairene jɔɔ, ki u nyii digbankpin nna ni ki baat Jerusalem; ki bi soorɔ ki jii Yiisa dapunpunɔ na ki bukinɔ, ki u waa Yiisa poor.

<sup>27</sup> Ki nibur waa Yiisa ki bi saa. Bi ni maɲ poosiab din waa ki bui fabin u paak. <sup>28</sup> Ki Yiisa tan jiant bi paak ki yetib a “Jerusalem poob, i daa bui n paaki, ɲaan kii bui i mɔɲ nan i waas paak. <sup>29</sup> Gbiintir, yoo baat ki niib tan sii yeen a ‘Pookanmata nba ki mar waas ki mɔɔmm biiri, ɲamme mɔk parpeenn.’ <sup>30</sup> Li yoo maɲe ki niib tan sii yeen jɔɔt nan kunkona a ‘Baan ti paak ki piint.’ <sup>31</sup> Muu-i di tana, ki dagbira jiki-i?”

<sup>32</sup> ɲanne ki bi ji din jii doyeerteeb banlee ki pukin Yiisa paak a bin kpib. <sup>33</sup> Baa din baar siaminba ki bi yi Yukpabuk na, leɲe ki bi kpaɔ Yiisa ki tabinɔ dapunpunɔ paak, ki bia kpaɔ doyeerteeb banlee na dapunpuna paak, ki yeno be Yiisa diitu po, ki loo na mun be u gaɲ po. <sup>34</sup> Ki Yiisa yet a, “N Baa Yennu, nyikin chab niib na, kimaan bi ki bann baa tuun linba na paaki.”

Bi din tɔ naatɔɔte ki chent u tiat. <sup>35</sup> Ki niib na see ki gorii; ɲaan ki Juu teeb yudamm na daanɔ nyatuk ki yeen a “U tuu tint leeb; li-i tee ki u set tee Yennu Niganntɔɔ Masia naie, wun tinn u mɔɲ.”

<sup>36</sup> Ki kunkonkonna na bia daano nyatuk, ki tan baar nan damiituk ki teeno, <sup>37</sup> naan yaa, “Li-i tee ki a set tee Juu teeb kpanbarie, fan tinn a moŋ.”

<sup>38</sup> Bi bia din sob sobinii ki tabin dapunpunn na yur paak, ki li yet a “Juu teeb kpanbare na.”

<sup>39</sup> Ki doyeerteeb nba taab na yeno sukii Yiisa ki yaa, “A ki tee Masia kaa-a? Tint a moŋ naan mun tinnit.”

<sup>40</sup> Ki loo na tiau ki yet a “A ki tiin Yennu-u? kimaan fin nan noo be tubdatyennkoo nie na.

<sup>41</sup> Timm naarin nan nan li tubdatu, kimaan bi jiiintit pankpera nba ki ti tuu tuun nae; naan joo na naarin ki tun bisiati,” <sup>42</sup> naan bet Yiisa a “Yiisa, yoo nba ki a dii a naan, a tan tiar n po.”

<sup>43</sup> Ki Yiisa beto a “Barmoniie ki n beera na, dinna, min nan fin sii be Paradais† ni.”

*Yiisa kuun labaar*

*(Matiu 27.45-56; Mak 15.33-41; Joohn 19.28-30)*

<sup>44</sup> Li din tee yonsuuk nie, ki yonnu ji dokin, ki digbann na kur ji bonn mokmok nan yenlekir, kut muntaa yoo. <sup>45</sup> Ki chinchenn nba din tuu joo ki puun Yenjiantu diiuk sinsuuk ni na ji soor bokit. <sup>46</sup> Ki Yiisa tan yikin sanpaapo ki yet a “N Baa Yennu, n jikit n seek ki kubint a nuu ni.” U yet nnae naan ji kpo.

<sup>47</sup> Ki kunkonkonna yudaano nba la linba teen na, ki u pak Yennu ki yet a “Barmoniie, joo na set tee popeendaano.”

<sup>48</sup> Ki nibur nba lakin lej a bin la linba tee na, din la linba tun na, ki ji nmat kun nan parbiir

---

† **23:43** 23.43 Bi bia yi Yendouŋ “Paradais-e,” ki li paak tee siaminba ki parpeenn bonchiann be.

ki pakin yura. <sup>49</sup> Ki u yooŋnba kur nan poob nba nyii Galilii nanao din be leŋ ki see banfokira ŋaan gorii linba tuun.

*Yiisa gbanant piinu labaar*

*(Matiu 27.57-61; Mak 15.42-47; Jooŋn 19.38-42)*

<sup>50-51</sup> Jasoo din be ki u sann tee Joosef, ki u nyii Juu teeb doo nba ki bi yir Arimatea na, ki din tee niŋanao nba ki bi chorimo, ki u guu Yennu naan baaru. U din tee Juu teeb yudaan-yenoe, ŋaan u din ki sak nan Juu teeb yudaanleeb lora, nan bi toona nba ki bi tuun teen Yiisa na. <sup>52</sup> Ki joo man saan Pailat boor ki saa miaro a wun turo Yiisa gbanant; ki u chabo. <sup>53</sup> Nanne ki u saan kpaat gbanant na dapunpunn na paak, ki jiiu pobin katinj ni, ki piiu kapaaunj ni, linba ki bi poŋ din jaar tanpiiuk lokir ni na, ki bi din daa ki pii soo kaauk manj ni. <sup>54</sup> Li din tee daar nba ki bi tee siir ki jiin foon daar na poe, ki foon daar ji yaa lin piin.†

<sup>55</sup> Ki poob nba nyii Galilii ki waa Yiisa na din wei Joosef, ki saa la Yiisa kaauk nan baa piiu bianjinba. <sup>56</sup> Nanne ki bi ji din ŋmat kun ŋaak ni, ki saa teen siir ki ŋamm kpanunubit nan tulaarii.

Ki foon daar§ ki bi din foi nan Yennu sennu nba want bianjinba na.

## 24

*Yiisa kuun firu labaar*

*(Matiu 28.1-10; Mak 16.1-8; Jooŋn 20.1-10)*

† **23:54** 23.54 Bi foon daar tuu piin yoo nba ki yonnu siike.

§ **23:56** 23.56 Foon daar din tuu piin Asuma daajouoko ki saa tuu Sibit daajouok.

<sup>1</sup> Lasir daar sanyafaar, ki poob manj nyii saan kaauk na boor nan bi kpanunubit nan tulaarii nba ki bi poŋ ɲamm na. <sup>2</sup> Baa baar leŋ ki bi la ki katangbenjir na nyakit kaauk na mɔb paaka, ki birint ki saa dɔɔ. <sup>3</sup> Ki bi kɔɔ kaauk manj ni ki ki la Yiisa gbanant, <sup>4</sup> ki ji biar see jiaa. Li taakpaak ni ki jab banlee dɔkit set, ki lia liatnyinyira; <sup>5</sup> ki li teen poob na janmaansooruk, ki bi gbaan ki tibin, ki bi yugbia siit tiŋ ni. Ki jab na boib a “Bee ki i loon footɔɔ kpeemm ni? <sup>6</sup> U kaa nna. U fiira. Tiat man waa daan yeti bianjinba, yoo nba ki u daan be Galilii na, <sup>7</sup> a bi tan saa soor ɲɔɔ nisaarik Bik ki jiiu teen biiddamm nuu ni ki bin kpaau tabin dapunpunn paak, ɲaan u tan saa fiir kuun ni daa ɲantaa daar.”

<sup>8</sup> ɲanne ki poob na ji tiar u maan manj, <sup>9</sup> ki ji seet kaauk na boor ki ɲmat kun, ki saa yet linba kur tun, ki tur u poorpoweiteeb piik nan yenɔkɔɔ na, nan binba be leŋ na kura. <sup>10</sup> Poob manj sanae din tee Meeri Magdaliinn, nan Joana, nan Meeri nba din tee Jeems naa na; ki pooleeb pukin bi po ki be namm. <sup>11</sup> ɲamme din bet Yiisa toomiinba barii manj; ki toomiinba na ɲarin dukii nan li tee poob maame, ki bi ki teemm yada. <sup>12</sup> ɲaan ki Piita lek fiir chiar saan kaauk na boor, ki saa tibin got ki la katiŋ na dɔɔ li kuukɔɔ; ki u ji ɲmat kun ɲaak ni nan jaarlituk, linba tun manj paak.

*Emaus sonu paak labaar*  
(Mak 16.12-13)

<sup>13</sup> Li daar mane ki bi ni banlee din saa digbanbik nba ki bi yi Emaus na. Leŋ nan Jerusalem din tee nan maar ɲanlore nae. <sup>14</sup> Ki bi

din somm piak nan leeb ki jiin linba kur tun na po. <sup>15</sup> Baa piak ki faa labaar nan leeb yoo nba na, ki Yiisa moŋ nakimm ki lakin tok namm; <sup>16</sup> ŋaan ki li liirib ki bi ki banno. <sup>17</sup> Ki u boib a “I somm piak bee?”

Ki bi set nan ninbiik. <sup>18</sup> Ŋanne ki bi yeno, wunba sann yi Kleopas na boio a “A kuukoŋe tee saamo nba be Jerusalem, ki tan ki gbat linba tun leŋ daa ŋanlelee na-a?”

<sup>19</sup> Ki u boib a “Lannpoe?”

Ki bi yeto a “Ki jiin Nasaref niro Yiisa na po; joŋ na daan tee Yennu sokiniie, ki tun toonjaana; ki u maan bia daan mok paŋ; ki u pent Yennu nan niib kur para. <sup>20</sup> Ki ti yudamm nan mannteeb yudamm jiu ki teeno barbuuro nuu ni a wun bu u buut, ki yet a u ŋan nan kuume; ki bi tan kpaau dapunpunn paak. <sup>21</sup> Ti tuu daan nan ŋoŋe tan saa nyinn timm Israel teeb\* ti datai nuu ni; ŋaan dinna tee daa ŋantaae na laa tun. <sup>22</sup> Ŋanne biak, ki ti ni poosiab pakit u po ki li yaar litit, kimaan baa saan kaauk maŋ boor sanyafaar na, <sup>23</sup> bi saa ki la u gbananti. Baa jen yoo nba, ki bi betit a ŋamm saa la Yennu malakanba nan bi numm; ki malakanba maŋ yetib a Yiisa jen u manfoor niwa. <sup>24</sup> Ŋanne ki ti siab tan saan kaauk maŋ boor, ki saa la nan poob nba doŋ betit bianjinba na, ŋaan bi ki la Yiisa.”

<sup>25</sup> Ki ŋoŋ Yiisa betib a “Bee yankpeensime ki i mantik moki, ki mei nan yin teen Yennu sokiniinba maan kur yada. <sup>26</sup> Li kpaas talase nan Yennu Nigannto Masia n di biak maŋ, ki

---

\* **24:21** 24.21 Juu teeb sanleere tee Israel teeb.

la baakir.” <sup>27</sup> Nanne ki u wantib u barii nba sob Yennu gbouj ni na kur paak, ki piin Moses sobu ni ki saan tuu Yennu sokiniinba kura sobu ni.

<sup>28</sup> Ton, ki bi tan per digbanbik nba ki bi saa na; ki Yiisa teen nan u gaare na. <sup>29</sup> Ki bi gooro a “Biat nant nna, kimaan yonnu baawa, ki li ji bonte.” Li paak ki u weib koo. <sup>30</sup> Ki u tan kar a wun di namm; nanne ki u jii boroboro na ki tur Yennu niipoouk nnaan bokit ki turib. <sup>31</sup> Li yoo na ki bi numm po ji yent, ki bi banno. Li taakpaak ni ki u lir bot. <sup>32</sup> Ki bi ji beer leeb a “Waa bo piak nant sonu ni ki wantit linba sob Yennu gbouj ni paak na, li bo ki tee nan muu na kaa ti para ni-i?”

<sup>33</sup> Li taakpaak ni ki bi fiir nmat Jerusalem, ki saa la u poorpoweiteeb piik nan yeno na nan siab, ki bi lakin leeb. <sup>34</sup> Nanne ki u poorpoweiteeb na betib a “Ti Yomdaano set fiire nan barmonii. U dokit Simonn paaka.”

<sup>35</sup> Ki niib banlee na mun betib linba teen sonu ni, nan waa tan bokit boroboro yoo nba, ki bi banno.

*Yiisa nba dokit u poorpoweiteeb paak bianinba  
(Matiu 28.16-20; Mak 16.14-18; Joonn 20.19-23;*

*Toona 1.6-8)*

<sup>36</sup> Baa beerib linba na, li taakpaak ni ki Yiisa set bi sinsuuk ni ki yetib a, “Parmaasir-ii be i paak.”

<sup>37</sup> Ki jijekit nan janmaanii koob hei, kimaan bi mi a bi la siara bonfuntikare. <sup>38</sup> Nanne ki u boib a, “Bee ki i yan puti? Bee ki birsuk be i ni?” <sup>39</sup> Gotir n nii nan n taa man, ki bann nan li set tee mine. Siimin ki bann nan mine. Bonfuntikar ki mok gbanant nan kpaba, nan yaa la ki n mok bianinba na.”

<sup>40</sup> Waa yet nna maŋ ki u wannib u nii nan u taa. <sup>41</sup> Naan ki bi para penn paak ki bi ki teen yada nan li tee ŋoɔe; ki li yaar litib. Ki u boib a, “I mɔk jesiat nna-a?” <sup>42</sup> Ki bi jii janpurikir bonjinn ki turo; <sup>43</sup> ki u gaar ŋman bi numm ni.

<sup>44</sup> Nanne ki u betib a “Ii tian man n mɔmaan nba ki n daan wanti maa daan be i boor yoo nba na, a n barii kur nba sob Moses sennu ni, nan Yennu sɔkiniinba sobu ni, nan Yennu gbouŋ nba ki bi yi yanii na ni kpaa talas nan li kur n tan tun ki gbeen.”

<sup>45</sup> Nanne ki u ji yênt bi numm, a bin bann linba sob Yennu gbouŋ ni na paak, <sup>46</sup> ki yetib a “Li sob a Yennu Niganntɔ Masia saa di biak ki kpo, ki tan fiir kuun ni daa ŋantaa daar; <sup>47</sup> a bin saan ki mɔont u sann ni, a niibi-i nyik bi biit, Yennu saa nyik chabib; a bin piin mɔont barii maŋ ki tur Jerusalem teeb, ki bia mɔont tur nibooru kur.”

<sup>48</sup> Ki u betib a “Yimme tee linba na siara damm. <sup>49</sup> Nnara, mine yaa n tan turi n Baa Yennu Seyeen nba ki u senn mɔsonn a u saa turi na. Ii daa biar kii be Jerusalem na mɔkmɔk nan yoo nba ki Yennu Seyeen maŋ saa nyi sanpaapo ki sik i paak ki turi paŋ na.”

*Yiisa nba doo Yendouŋ ni bianjinba  
(Mak 16.19-20; Toona 1.9-11)*

<sup>50</sup> Nanne ki Yiisa nyii namm doo maŋ ni ki saan per Betani. Leje ki u saa donn u nii sanpaapo ki teen piisin bi paak. <sup>51</sup> Waa teen piisin bi paak yoo nba, ki u nyikib ŋaan doo Yendouŋ ni. <sup>52</sup> Ki bi ji jiantɔ ki tan ŋmat Jerusalem nan parpeenn bonchiann, <sup>53</sup> ki ji din

be Yenjiantu nasaakak ni yoo kura, ki piak dont  
Yennu sann.



**Yennu Gbouj Mɔɔr**  
**Bimoba: Yennu Gbouj Mɔɔr Bible**

copyright © 2003 Wycliffe Bible Translators, Inc.

Language: Bimoba

Contributor: Wycliffe Bible Translators, Inc.

All rights reserved.

2020-11-16

---

PDF generated using Haiola and XeLaTeX on 29 Sep 2022 from source  
files dated 11 Jul 2022

00d89ba0-4677-52d9-9bc5-aa3d7c5c966d